

افتكاسات زوج محظور

حلقات كوميديا " إلهام و ممدوح "

الطبعة الأولى

2020م- 1442هـ

ديوان العرب

للنشر و التوزيع



ملحوظة: حقوق الطبع جميعها محفوظة للمؤلف

عنوان الكتاب: افتكاسات زوج محذور

اسم المؤلف: إيمان العادلي

التصنيف الأدبي: حلقات كوميديا

رقم الإيداع: 2020 / 17326

الترقيم الدولي: 4 - 55 - 6830 - 977 - 978

تصميم الغلاف: محمد وجيه

التدقيق اللغوي: د. هبة ماردين

التنسيق الداخلي: محمد وجيه

رقم الطبعة: الطبعة الأولى

المدير العام: د. فادية محمد هندومة

دار ديوان العرب للنشر والتوزيع - مصر - بورسعيد

جوال: 00201211132879

البريد الإلكتروني: mohamedhamdy217217@gmail.com

حقوق الطبع والنشر لهذا المصنف محفوظة للمؤلف، ولا يجوز بأي صورة إعادة النشر الكلي أو الجزئي، أو نسخه أو تصويره أو ترجمته أو الاقتباس منه، أو تحويله رقمياً وإتاحته عبر شبكة الإنترنت، إلا بإذن كتابي مسبق من المؤلف أو الناشر.





افتكاسات زوج محظور

حلقات كوميديا

إيمان العادلي





هَذَا

إلى كل زوج حاول إظهار إبداعاته
أثناء الحجر الصحي بسبب كورونا...
إلى كل زوجة تحملت فوق طاقتها
تصرفات لم تكن موجودة قبل الحجر.
إلى كل من يحب اليوميات الكوميدية.

مقدمة

مدوح زوج مصري أصيل زي أي زوج، بس الحظر عمل عمايله معاه
وغير شوية من صفاته
خلاه زهقان وطهقان، وبالتالي فكر يعمل ايه يسلي بيه صيامه والحظر،
كمان فقرر يدخل المطبخ ويعملنا افتكاسات وحوارات.

إلهام بقى يا عيني عليها، زوجة مصرية عسولة، ومتحملة جوزها وعمايله.
ما هو محظور يا حبة عيني، والست الشاطرة تتحمل جوزها في حظره
وصيامه.

أما بقى رهف وخالد فهما بونبونة البيت، وبرضو البنزين الي بيولعوا بينهم.

عموماً هسيبكم كل يوم تتابعوا عمايلهم

الحلقة الأولى

- إلهام: صباح الخير يا حبيبي اصحى بقى العصر قرب يأذن هو ده الصيام
برضو.

ده أنا بصحى كل يوم من الصبح بدري ولا فارق معايا صيام ولا غيره
ياعيني علينا بقى الستات في الصيام والله لنا الجنة يا روحي
ممدوح يا حبيبي اصحى وفوق بقى عاوزين طلبات للبيت علشان أجهز
الأكل الساعة 2 الظهر أهو ولسه مش عارفة هعمل إيه أكل
- ممدوح: اعملي اي حاجة موجودة في التلاجة، مكسل أنزل والله حاسس
إني مرهق.

- إلهام: يوووه... أنت كده علطول يا حبيبي كسلان، علطول في الصيام
بص هات لنا فراخ علشان الولاد مبيحبوش اللحمه.
- ممدوح: يوووه... عليكى أنتي ما ياكلوا اي حاجة من الموجود
دلحك ده هيتلف الولاد.

- إلهام: حرام عليك يا ممدوح دول صايمين طول اليوم.
- ممدوح: ما هما نايمين يعني شايفهم طول اليوم بيتعبوا.
- إلهام: ماشي يا حبيبي أنت كده علطول، خلاص هعمل كباب حلة
ومكرونة.

- ممدوح: مكرونة ايه محدش بياكلها في الصيام وبتتري، ولا هو أكل
وخلص.

- إلهام: طيب ماشي بلاش مكرونة، هعمل الأكل وبعدين أعمل صينية
كنافة تستاهل بُقك يا حبيبي.

- ممدوح: لا... لا... متعملش سيبها أنا هعملها.

بكرة بقى نعرف ممدوح وإلهام والحلقة الثانية عملوا ايه.

الحلقة الثانية

- إلهام: حبيبي يلا بقى قوم إلحق صلي العصر، المغرب هياذن خلاص، وأنا خلصت الأكل وعملت أحلى كباب حلة هتاكوا صوابكم وراه.
- ممدوح: هقوم أهو أتوضأ وألحق أصلي العصر، بقولك إيه متعملش السلطة هعملها أنا وأظبطها.
- إلهام: ماشي يا حبيبي هسيبها لك.
- (بصراحة دخلة الرجالة المطبخ بتبهده، هلاقي البقدونس وقشر- البصل في كل حطة يا سلام لو يسبني أعمل أنا السلطة).
- ممدوح: حبيبتى أنتي بتكلميني؟
- إلهام: لا لا يا حبيبي ده أنا بكلم نفسي في المطبخ بسليني هههههه.
- ممدوح: شفتي السلطة بتاعتي، ولا سلطة الشيف الشريبي.
- إلهام: آه.. آه يا حبيبي ربنا ما يجرمنا منك ولا من سلطاتك.
- (يا لهوي أرضية المطبخ كلها بقدونس وقشر- بصل وطماطم، أهو ده اللي خدته من عمايلك للسلطة)
- ممدوح: بتقولي حاجة يا إلهام
- إلهام: لا لا... مبقولش

يلا يا ولاد الأذان هياذن حد منكم يجي يساعديني ويحط الرز في الأطباق
ويوزع السلطة الي عملها بابا.

- الأذان أذن يلا تعالوا

- حلو أوي كباب الحلة يا ماما تسلم إيديكي

- إلهام: تسلموا يا حبايبي

- ممدوح: والسلطة مفيش تسلم إيديك يا بابا

- الولاد: تسلم الأيادي يا بابا سلطة تجنن بصراحة

- ممدوح: استنوا بقى أفطر وأوريكم عمال الشيف شربيني

- إلهام: (آه ياني من افتكاسات جوزي وعميله)

- ممدوح: بتقولي حاجة يا حبيبتي

- إلهام: لا يا حبيبي ده أنا بكلم نفسي من حلاوة السلطة

استنونا بكرة ونعرف ممدوح هيفتكس ايه تاني في المطبخ

الحلقة الثالثة

- إلهام: حلوا الأكل النهاردة يا ولاد
ايه رأيك يا حبيبي عملته زي ما بتحبه بالظبط علشان متقولش إن حماتي
بتعمله أحلى مني.
-الولاد: تسلم إيديك يا ماما الأكل يجنن فعلاً.
-ممدوح: تسلمي يا ست الكل بس برضو أكل الحاجة أحلى هههههه
-إلهام: طبعاً يا حبيبي
-ممدوح: أنا هاعمل لكم حاجة حلوة أوي، ومفاجأة هاتكلوا صوابكم
وراها.
-إلهام: طبعاً يا حبيبي أنت هتقولي مانا مجرباك بس ايه هي الأول علشان
قلبي الصغير لا يتحمل
-خالد: يا ماما اصبري مش بابا قال مفاجأة أكيد زي كل مرة
وبصوت واطي (سلة الزبالة موجودة)
-رهف: ضحكت بصوت عالي وبسرعة غمزت لها مامتها بعنيها مامتها في
إشارة إن باباها يزعل ويخلي الليلة سودة
-ممدوح: أنا شايف حركات وهمسات وضحك منكم ولا بيتهيألي
-إلهام: أبداً يا حبيبي احنا بنقول إيه هي المفاجأة ومستنين
ودخل المطبخ وزى العادة تخبيط وتكسير ومش عارفين بيعمل ايه

وفجأة.....

ممدوح: بعد نصف ساعة طلع ومعه طبق فيه كنافه شكلها روعة

-ممدوح: حد يقدر يعمل الحلاوة دي يا رهف

ايه رأيك يا خالد؟ شايفين الحلاوة والجمال مش ماما الي مش عارفة تعمل

حاجة وعمال تجري في البيت شمال ويمين زي خيل الحكومة

-إلهام: حلو أوي يا حبيبي والله شكلها روعة تسلم إيديك ندوق بقى

ونشوف الجمال، وهي بتعض على شفايفها من الغيظ ودخلت أخذت شاور

تنزل بيهم الضغط الي جالها وهي بتكلم نفسها كالعادة (ربنا يستر وتطلع

حلوة)

-رهف بصوت عالي: يا ماما ايه دااا مش معقولة كل يوم افتكاسة تعبنا يا

ماما ياما

-إلهام: خير في ايه أبوكم ولع فينا ولا في ايه

-خالد: يا ماما يا حبيبتي مش قولتلك الراجل دا ما يدخلش المطبخ تاني

خلاص كفاية افتكاسات

-رهف: ماليش دعوة مش عارفة أكل حاجة حلوة في البيت ده

-إلهام: طيب في إيه الكنافه حلوة وشكلها حلو أوي

-رهف: طيب شوفي كده يا ماما

هاقي الشوكة والسكينة كانت المفاجأة

استنونا بكرة مع إلهام وافتكاسات ممدوح ونشوف ايه المفاجأة

الحلقة الرابعة

- رهف: ماما يا ماما شوفي الكنافة دي مش عارفة أطلعها من الصينية
- إلهام: مالها يا حبيبتي في ايه
- خالد: ماما الحق الكنافة يا ماما
- إلهام: ايه الحرب قامت ولا ايه مالها الكنافة
- رهف وخالد: تعالي بنفسك يا ستي وشوفي
- إلهام: ايه ده يا لهووي دي ايه دي
- يا ممدووووح يا ممدووووح
- حرام عليك دي حجر صوان مش كنافة يا خسارة الكنافة والسمن البلدي
- والسكر، أنت عارف السمن بكام ولا السكر بكام؟! حرام عليك
- ولا الكنافة بكام ده الكيلو ب20 ج
- كل يوم تدخل المطبخ وتفتكس في حاجة وتبوظها لنا
- حرام عليك يا حبيبي
- كفاية عليك السلطة والرز
- ممدوح: في ايه هي جريمة ولا جريمة يعني ما أجدع الشيفات بيغلطوا
- برضوايه يعني!! وبعدين أنا دخلت على النت وعرفت الغلطة فين
- وهصلحها لكم

- هي ساعة كمان واتفرجوا على أجدع صينية كنافة فيكي يا مصر
- إلهام: لا كفاية كده وحرام بصراحة، بص يا حبيبي أنت تدخل الأوضة وتستريح شوية، ولا أقولك شوف كام مسلسل كده وأنا هظبطها لك وأخليها أجدع صينية كنافة
- ممدوح: لأ يا هانم علشان تنسبها لنفسك إنك أنتي الي عملتيها محدش مصلحها غيري
- يلا وسعي كده وفضولي المطبخ
- رهف وخالد: ربنا يعوض علينا
- إلهام: آه ياني من جوزي وافتكساته آه يا ضغطي ياني
- (نفسى أرميها في أقرب باسكت زباله ونستريح كلنا)
- ممدوح: بتقولي حاجة يا حبيبتي
- إلهام: لا يا حبيبي بكلم نفسي كالعادة
- ممدوح: أنا داخل أظبطها واستنوني بقى سلام
- بكرة بقى نشوف ممدوح وافتكساته وإلهام والي جرى لها

الحلقة الخامسة

- ممدوح: يعني أنا كل يوم أزعم المطبخ ده مش بينظف ليه الأطباق والصحون كلها مش نظيفة
- إلهام: ايه بس يا حبيبي مالك صاحي بدري النهاردة ليه ده الساعة ماجتش 10 لسه مش عوايدك يعني
- ممدوح: أنا بقولك المطبخ تقولي صاحي ليه
- إلهام: أنت عاوز تعمل مشكلة وخلاص يا حبيبي ولا ده بسبب الكنافة بتاعتك الي فشلت يا روجي ومنفعش لها عملية الإنعاش الي عملتها لها هههههه
- أنت بتنسي ولا ايه لما بتعمل حاجة في المطبخ بتقلبوا من فوقه لتحتة ويبقى عامل زي بيت الأشباح وتسبب الأطباق ويبقى عاوز يتنسف هههه
- ممدوح: أنا برضو السبب؟! أنتي دايماً مش بيعجبك أي حاجة بعملها
- إلهام: إزاي يا روح الروح هي بس الكنافة بتاعة امبارح هي الي غلطانة إلا بالحق يا حبيبي هو أنت حطيت إيه علشان تبقى حجر كده ههههه
- ممدوح: أقولك أنا ماشي من وشك ومش داخل المطبخ تاني ومتحاييلش عليا أعمل سلطة ولا حتى رز

- إلهام: عادي زي كل يوم يغضب زي الأطفال ويخرب الدنيا
- رهف: إيه يا ماما مش قولتك كبري دماغك وبلاش خناقات
- إلهام: إسألني أبوكي شوفي أنا كام ألف مرة أطنش وهو يغلط ويطلع أرفه عليا هو يعني وحده الي صايم
- خالد: خلاص يا ماما بعد كده سيبه يعمل ويفتكس الي هو عاوزه واحنا الضحايا وأمرنا لله
- (أهو أحسن من النكد برضو)
- ممدوح: يا ست هانم هانفطرايه النهاردة ولا هتفضلي اليوم كله في موقعة الكنافة
- إلهام: اتفرجوا والله هاسبيلكم البيت واطفش علشان كده كتيرر عليا ضغطي علي عليا
- اية يا حبيبي عايزايه بس
- ممدوح: هانفطرايه يا هانم
- إلهام: أي حاجة موجودة وخلاص
- ما أنت منزلتش تجيب لنا حاجة من الخناق طول النهار
- ممدوح: مش قولتك اتصلي بالديلفيري يجيب لحمه وخضار
- إلهام: المصروف خلص من يومين أعمل إيه

- ممدوح: ده لسه ماعدش من الشهر إلا 18 يوم أروح فين أنا مش
مديكي مصروف الشهر
- إلهام: أنت يا روجي هاتجني مش كل يوم تحرق لنا حاجة ونرميها في
السلة

أستنونا بكرة مع إلهام وافتكاسات ممدوح ونشوف آخرة الصيام معاه

الحلقة السادسة

- ممدوح: ها يا هانم هتفطرينا ايه النهاردة
- إلهام: ايه رأيك يا حبيبي عندنا بواقي فراخ أظبطها لكم وأعملها شاورما ولا أفرمها بحبة بصل وبقدونس وأعملكم أحلى كفتة فراخ
- ممدوح: بواقي يا هانم ايه اللي بتتكلمي عنها دي
- ده يدوب صدر ودبوس اللي فاضلين هيعملوا إيه دول وأحنا 4 أفراد
- إلهام: أعمل ايه كلف يا سيدي اطبخي يا جارية
- بص يا حبيبي أدخل نام وهدى أعصابك وحتلاقي فطار 5 نجوم
- (يارب صبرني ومنفجرش في الراجل ده قال على رأي المثل أقرع ونزهي)
- ممدوح: بتقولي حاجة يا إلهام
- إلهام: لا لا يا حبيبي بكلم نفسي بس
- حبيبي لو مش جايلك نوم قوم ساعدني واغسل معايا الكام طبق دول
- ممدوح: شفتي بقى أهو أنتي الي بتجرجريني للمطبخ أهو وبعد كده تزعلي
- إلهام: خلاص يا حبيبي حقك عليا تعالى بقى ساعدني شوية
- ممدوح: لأ أنا هنزل أجيب لكم طلبات وأقابل واحد صاحبي على ما تجهزي الفطار
- إلهام: (أحسن برضو)

- ممدوح: بتقولي حاجة يا حبيبي
- إلهام: لأ مبقولش مبقولش
- ممدوح نزل وإلهام دخلت المطبخ عملت أجمل كفتة من بواقي الفراخ
ومعاهم رز مفلفل وطبق سلطة 5 نجوم
- وفاجأة ممدوح رجع وجايب الطلبات ومخبي كيس وراه
- إلهام: إيه يا حبيبي الي ورا ظهرك ده
- ممدوح: ده كيس بسبوسة جاهز جبتة هعمله
- أهو جاهزة الطريقة عليه ولا افتاكسات ولا غيره
- أصلي وأنا نازل عارفة جارتنا أنغام
- إلهام: أيوه مالها جارتنا أنغام بقي؟ أتقابلتوا في الركن البعيد الهادي
- ممدوح: أنتي كده طول عمرك نيتك السيئة سبقاكي
- أنا قصدي يا حبيبي وأنا نازل على السلم شमित ريحة البسوسة من شقتها
- وقلت أعمل لكم زيها وأوريكم عمايل الشيف حسن
- إلهام: يا لهوويي يا أنا من عمايلك
- وافتاكسات جوزي
- استنونا بكرة ونشوف ممدوح عمل ايه مع البسوسة وافتكس فيها ولا لأ.

الحلقة السابعة

- ممدوح: إلهام فين صواني البسوسة؟ مش لاقيةها علشان نويت خلاص أدوكم أجمل بسبوسة
- إلهام: عندك يا حبيبي في الرف الي فوق (ربنا يستر يا رب وتطلع حلوة)
- ممدوح: بتقولي حاجة يا حبيبتي
- إلهام: لأ يا قلبي ده أنا بكلم نفسي بس
- خالد: ماما يا ماما
- إلهام: نعم أيوة طول اليوم ماما ماما في ايه
- خالد: انت خلص يا ماما مش بيفتح الفيس
- إلهام: خلص ايه ده الي خلص ده أبوك لسه دفعة من 15 يوم هو أنت وأختك بتشربوه
- خالد: بنشوف المسلسلات يا مامتي من غير إعلانات بنشوفها على النت أنا ورهف ووطي صوتك ل بابا يسمعنا ويخلي يومنا مش فايت
- إلهام: يا لهووي يا أنا منكم ومن باباكم وافتكاساته
- رهف: الله يا ماما ريحة بسبوسة تجنن في الشقة
- صوتكم عالي ليه يا حبيبتي واياه الريحة الجميلة دي
- إلهام: باباكي بيفتكس بسبوسة في المطبخ ادعوا ربنا تطلع حلوة

[illegible]

بكرة بقي نعرف رھف بتزعق ليه واياه أخبار البسوسة

الحلقة الثامنة

- إلهام: في ايه يا رهف مالك؟
- رهف: تعالي هنا المطبخ يا ماما علشان تشوفي الحلاوة معايا
- إلهام: جاية أهو آه ياني مش عارفة أرتاح شوية بعد الفطار زي الناس
- خالد: ماما يا ماما ادفعلنا النت بقى ووالله آخر مرة نشربه
- خلاص يا حبيبتي رمضان هيخلص ومش هنشوف مسلسلات والنبي يا ماما وحياتي عندك
- إلهام: استنى أشوف موضوع النت ده بعد ما أدخل المطبخ وأشوف رهف ماها
- إلهام دخلت المطبخ ووراها خالد وعيونه كلها انتظار وتوقع لافتاكسة جديدة من باباه وكله أمل يطلع توقعه غلط وياكل أجمل بسبوسة
- رهف: اتفضلي يا ماما طلعي لي حطة من الصينية دي عاملة زي الطوب وعليها حتت إزاز بتبرق
- شوفي افتكاسات بابا أحنأ تعبنا يا ستي
- إلهام: وريني كده يا لهوووووي إيه ده دي ناشفة حجر وإيه الأزاز الي بيبرق عليها ده
- عوضنا على الله في البسبوسة والسكر والسمن

- رهف: وأحنا ذنبنا ايه يا ستي بفضل كده فيران تجارب ل بابا
- خالد: هههههههه أبونا بقى ولازم نتحملة في صيامه وحظه
- وبعدين كده يا عبيطة يا رهف هنطلب تجديد الباقة بقلب جامد هههه
- إلهام: أوعوا من وشي وسعوا كده
- ممدوح يا ممدووووح تعالي هنا
- ممدوح: خير يا حبيبتي البسبوسة لحستكم من جمالها أنا عارف هههه
- إلهام: تعالي بس المطبخ وأنت تعرف يا روجي
- ممدوح قام من قصاد التلفزيون ودخل المطبخ بكل ثقة وفجأة لاقاهم
- كلهم واقفين وعلى وشهم علامات هو عارفها قبل كده كثير كل ما يفتكس
- حاجة وتبوظ
- ممدوح: ها خير يا إلهام وأنتم يا ولاد مالكم كده زي بندول الساعة
- واقفين
- إلهام ورهف وخالد: في صوت واحد
- البسبوسة حجر يا بابا عاوزه النجدة تطلعها من الصينية
- إلهام: حبيبي وبكل هدوء وبرود أهو ومن غير ما أقول يا لهووي
- إيه الي حصل وايه الأزاز الي على الوش ده
- يلا حبيبي اعترف لنا عملتها أزاي
- ممدوح: مفيش عملتها زي ما مكتوب على الكيس أنا هرفع قضية على
- الشركة دي علشان الطريقة مش مضبوطة

- إلهام: الشركة هي الي مش مضبوطة برضو ولا أنت افتكست من الآخر
اعترف يا حبيبي وقول علشان المرة الجاية تطلع حلوة يا حبي
-خالد ورهف: هو في مرة جاية يا عيني علينا في البيت ده
-إلهام: بس يا واد أنت وهي خلوا أبوكم يعترف
يلا يا حبيبي اعترف
- ممدوح: مفيش يا حبيبتي أنا عملت شربات تقيل وحلو كده زي cbc
سفرة وضفت عليه ليمونة مجالها بس كده يا قلبي
-إلهام: محدش يحوشي سبوني عليه يا لهووي ياني
بتفتكس ليه وتحط ليمون على شربات البسبوسة
-ممدوح: حبيت أضيف التاتش بتاعي
-إلهام: ياهووووي يا ضغطي ياني
بكرا بقى نكمل ونشوف ممدوح هيفتكس ايه تاني وإلهام هتعمل معاه ايه

الحلقة التاسعة

-إلهام: حبيبي يا نور عيني أبقى أسأل واستشيرني يا روجي قبل ما تفتكس
وتحط ليمون لشربات البسبوسة

-ممدوح: هو الليمون زاد حبتين يا حبيبتي، لكن والله كان شربات يجنن
المرّة الجاية هحط نقطتين بس علشان يطلع سيرب تخين كده زي الشيف
حسن

-إلهام: وهو في مرات تانية يا روجي (آه يا مرارتي ياني من جوزي وعميله)
التليفون بيرن

-رهف: مامااا خالتو على الفون تعالى كلميها

-إلهام: خلاص يا حبيبي أكلم أختي وأرجعلك نشوف البسبوسة دي
أهلاً يا سامية وحشتيني فينك يا بنتي وحدوتة بقى وكلام ستات وسامية
بتشتكي لها من جوزها وأنه مش بيساعدها ولا بيغسل حتى كوبية فيه
وأنها بتحسدها على جوزها ممدوح وأنه بيدخل المطبخ ويساعدها فيه
وإلهام تضحك وتقولها آه جوزي مفيش في افتكاساته اتنين يا حبيبتي كانت
مصر خربت ههههه

سامية أختها نبهتها لكحك العيد والبسكوت الي هيعملوه

لأن بره غالي وعلشان ظروف الحظر وكم انزلوا قبل الحظر يجيبوا لبس العيد للولاد

-إلهام: آه يا سامية فكرتيني ده الوقت خلاص بييجري ومفيش وقت

أما أقول لممدوح حبيبي بقى علشان يستعد

يلا سلام يا حبيبي ونتفق ننزل قبل الحظر

-إلهام: ممدوح يا حبيبي فينك يا قلبي ممدوح

-رهف: (بصوت واطي) بابا في المطبخ من وقت ما بتكلمي خالتو يا ماما

- إلهام: ممدوووح بتعمل ايه عندك يا لهووي ياني

- ممدوح: مفيش يا حبيبي بعملكم سلطة جديدة بالفاصوليا والفلفل

تجنن جبت طريققتها من النت بس مش لاقى مايونيز ففكرت في بديل بس

هعملكم مفاجأة أصبري

-إلهام: طيب أنا خلصت البامية وسبكتها تمام من بدري وقبل الفطار

هعمل حبة رز

وعاوزاك يا حبيبي نتكلم كده في شوية حاجات

-ممدوح: ماشي يا حبيبي أخلص السلطة ونتكلم

على فكرة يا حبيبي أنا لاقيت البامية ناقصة فيه وزودتها لك فيه

-إلهام: فتحت الحلة ولاقيت البامية الي سبكتها وسوتها باللحمة بتعوم في

المية

يا لهوووووي يا أناا من افتكاسات جوزي

آه يا ضغطي الي علي عليا
البامية باظت يا ممدوح من افتكاساتك
أسبكها تاني أزاي
أعمل ايه ياني
-ممدوح: متعملش يا حبيبتى أنا هظبطها وأرجعها زي الأول بعد ما أعمل
السلطة
-إلهام: لأ سيب البامية في حالها وأنا هظبطها وأمرى لله
تفتكروا إلهام هتعرف تظبطها
وممدوح هيفتكس إيه تاني في السلطة
بكره هنعرف آخر عمايله

الحلقة العاشرة

-إلهام: ممدوح يا حبيبي ممكن تفضيلي المطبخ وتخرج شوية أظبط الكارثة
الي عملتها في البامية

-ممدوح: بصي يا حبيبتي احنا نشيل البامية من الحلة ونركنها على جنب
مع اللحمه ونسوي الدمعة تاني ونسبكها وبعدين نرجع البامية واللحمة
تاني

ها.... ابه رأيك حبيبتي هصلح غلطي أهو

-إلهام: أمممم فكرة برضو حلوة

بس أوعدي يا حبيبي بلاش تفتكس تاني وحياتي

-ممدوح: هههههه صعب الوعد ده يا حبيبتي بس هحاول

يلا بقى شوفي هتعملي ايه وسيبني أظبطك البامية وأعملكم سلطة
الخضار بالمليونيز

هههههه هتتجننوا من حلاوتها

-إلهام: ماشي يا حبيبي هروح أظبط السفرة وأنشر الغسيل وأشوف الولاد

الي بيشربو انت بيعملوا إيه

(ربنا يستر وميولعش في المطبخ)

مدوح فصل البامية واللحمة في طبق وكمل تسوية الدمعة الي كانت عامت
وهدي النار وسابها تتسبك وبدأ يعمل السلطة
سلق الخضار وخطبه وخطه في الطبق ونسيبه يكمل سلطته ونشوف إلهام
والولاد صوتهم عالي ليه

-إلهام: رهف تعالي ساعديني وأنشري الغسيل على ما أشوف الي ورايا

-رهف: يوه يا ماما خليه بعد الفطار تعبانة والله مش قادرة أقوم

-إلهام: طبعاً تعبانة من كتر النوم أنتي وأخوي بتاع المسلسلات

خالد قوم يلا ساعديني وجهز السفرة معايا

-خالد: طيب يا ماما هقوم أهو، تعبانا وجسمي مكسر

ماما قلتي لبابا عاوزين لبس العيد، كل أصحابنا اشتروه وأحنا لأ

-إلهام: طيب قوم يا فالح الأول وبعدين ندخل معاركنا مع أبوك لما يخرج

من المطبخ ونشوف آخر افتاكاسته

-رهف: بصوا بقى مهما يفتكس النهاردة نقوله الله وجميل وتسلم إيديك

الحلوة دي علشان يوافق نجيب لبس العيد

شغلوا الجي وخطبوا الدي يا ماما

-إلهام: جي ايه ودي ايه يا واد أنت وهي

انت خلاص بوظ دماغكم

بس فكرة برضو إننا نشجعه لغاية ما يوافق على طلباتنا وكحك العيد

والبسكوت كمان

يلا بقى جهزوا السفرة على ما أدخل المطبخ أشوف أبوكم اتأخر ليه
 ممدوح يا حبيبي ايه الأخبار
 -ممدوح: يلا حبيبتى ظبطت البامية أهو تجنن واتسبكت وصلحت غلطتي
 وأدي الرز مفلفل أهو ويجنن
 ودي بقى السلطة واووووو تجنن
 -رهف وخالد: هيببييه المغرب أذن ندوق بقى
 البامية جميلة تسلم الأيادي
 -إلهام: بصراحة حلوة عرفت تظبطها يا حبيبي ههههه الحمد لله
 -خالد: أدوق السلطة بقى بموت فيها يا بابا
 بس هي لونها غامق ليه
 -ممدوح: مش مهم اللون يا ابني المهم الصنعة والطعم
 دوقوا بقى وقولولي ايه رأيكم
 -إلهام ورهف وخالد: ايه ده يعع
 ثاني يا بابا افتكاسات ثاني
 بكرة نعرف ممدوح افتكس ثاني في السلطة أزاي

الحلقة الحادية عشر

-إلهام: تيه ده يا ممدوح السلطة مالها طعمها غريب كده ليه ولونها غامق يا حبيبي

مش لونها أبيض كده والخضار مصفر

-رهف وخالد: يع يا بابا فيها طعم غريب

بس هناكلها يا حبيبي (عاوزين نعدى الليلة ونجيب لبس العيد ونجدد باقة
(النت)

-رهف: آه يا حبيبي هناكلها يعني هناكلها (آه يا بطني ياني بس كله يهون
علشان لبس العيد)

-إلهام: ها يا ممدوح سيبك من الولاد وقولي مالها السلطة دي يا حبيبي (يا
ترى افتكست ايه تاني يا جوزي آه يا مرراتي بس لازم أسمع كلام الولاد
وأكبر الجي)

-ممدوح: عجبتمكم صح

دي بقى سلطة خضار الشيف ممدوح ههههه وسر من أسراري المطبخية

-إلهام: قول بقى يا حبيبي سر الخلطة

-خالد وrehf: قول بقى يا بابا عرفنا السر في الجمال ده (آه يا غلبنا يا نانا
من عمايل أبونا وبطننا الي وجعتنا)

-ممدوح: هههههه مصرين برضو
 هفولكم سر وصفاتي الممدوحية
 بصوا بقى سر الطعم الغريب الجميل ده أنا فكرت وقدحت زناد الموهبة
 عندي وخطيت مستردة مع حبة كاتشب بدل المايونيز
 عملت صوص خاص بيا هههههه
 أيه رأيكم

-إلهام: مستردة يا ممدوح مع كاتشب يا لهووووي
 حرام عليك
 مستردة على خضار مسلوق في السلطة أزي يا حبيبي
 -ممدوح: هي دي الشطارة والعبقرية ايه رأيكم ههههه
 -إلهام ورهف وخالد: آه آه حلو يا بابا بس متكررهاش تاني
 خلي اختراعاتك حصرية يا حبيبي مرة واحدة بس (لحسن كده هنموت
 بصراحة)

-إلهام: آه أنا من رأي الولاد برضو
 الوصفة تتعمل مرة واحدة حصري وكده فلة شمعة منورة
 بقولك يا حبيبي عاوزه أتكلم معاك
 واحنا بنحبس كده بكوبيتين الشاي الي يظبطوا الدماغ دول
 -ممدوح: خير يا روجي قولي
 أنا مبسوط أوي النهاردة علشان الوصفة عجبتكم

- إلهام: ربنا يبسطك علطول يا حبيبي
- رهف وخالد: (خشي عليه يا ماما بالتقيل علطول قبل ما يصحصح لنا)
- ماشي يا بابا ماشية معاك يا مشهيصنا وصفات يا قمر
- إلهام: يلا يا واد أنت وهي على أوضتكم وسبوني أقول الكلمتين
- ممدوح: ايه يا حبيبتي داخله مجلس الأمن ولا إيه ما تقولي عاوزة ايه
- إلهام: بص يا حبيبي العيد بعد 4 أيام
- عاوزين نجيب لبس العيد والكحك والبسكوت
- ممدوح: لبس إيه وبسكوت إيه يا هانم
- إيه مفيش أي تفكير خالص، مفيش كورونا، مفيش إحساس بالمسؤولية
- إلهام: يعني ايه يا ممدوح
- سامية أختي أحسن مني ولا أختك اعتدال ولادها أحسن من ولادي
- علشان يجيبوا لبس العيد واحنا لأ، ولا الكحك والبسكوت كمان
- مفيش عيد من غيرهم
- ممدوح: يبقى مفيش
- بكرا هنشوف ممدوح وإلهام هيكملوا خناقهم ولا ممدوح هيسمع كلامهم
- انتظرونا بكرا

الحلقة الثانية عشر

نستكمل بقى حوار العيد والكحك والبسكوت
 إلهام: يعني ايه مفيش بسكوت ولا كحك ولا لبس عيد للولاد يا ممدوح
 -ممدوح: هو كده زي ما قولتلك وسمعتي بودانك
 قال لبس العيد قال في أم الكورونا دي، هوايه مفيش عندك تفكير ولا
 إحساس!!
 -إلهام: يعني ايه وماله الإحساس يا سي ممدوح ومال لبس العيد للعيال
 والبسكوت والكحك
 كل الناس اشترت الكحك وأولهم أختك اعتدال هي وعيالها وأختي سامية
 كمان
 يعني أنا وعيالي الي هنتحرم من اللبس والكحك في وسط العيلة
 أهى أهى أهى يا فرحتهم فيا
 -ممدوح: فرحة ايه الي فيكي دي
 كبري دماغك كده واعقلي يا إلهام وخلي عندك وعي وخافي على العيال وعلى
 نفسك
 لبس إيه الي هتنزلي تشتريه ده
 أنا يستحيل أوافق على كده أبداً وعيطي واعلمي ما بدالك

أنا قلت مفيش لبس عيد ولا نزول
سامعة الكلام
وأوعي من وشي كده خليني أقوم أضربلي فنجان قهوة بدل الوش الي
جبتھولي في دماغي ده
(ستات فاضية واللہ ودماعھم تعبانة قال أختھا وأختي وكلام فاضي توب
عليا يارب من هبل الستات ده)
-إلهام: كده يا ممدوح بتسبني وتقوم واحنا مرسناش على بر والعيد خلاص
قدامه يومين
أهئ أهئ أهئ
أنا مش قعدالك في البيت ورايحة عند ماما ولما تشوف حل وتعرف قيمتي
وتقدر أبسط حقوقي أنا والولاد هبقى أرجع
-ممدوح: يوووه أدي الي أنتي فالحة فيه كل خناقة أروح لماما وتعرف قيمتي
أقولك روعي يا إلهام وبرضو مفيش لبس العيد ها
-خالد ورهف: يوووه ماما بابا
استوب بقي وكفاية خناقات ممكن تسمعونا شوية وتعرفوا رأينا في الموضوع
ده لو سمحتوا خمسة هدوء واسمعونا
-ممدوح: ماشي يا سي خالد أنت وست رهف
ما هي هزلت بس يلا يمكن الحل يجي منكم
-إلهام: ماشي هسمعكم عاوزين إيه بس واللہ لحمشي برضو وأروح لماما

- خالـد: يا ماما يا حبيبتي لو معجبكيش كلامنا أمشي عند تيتا
إيه رأيك يا حبيبتي اتفقنا
- إلهام: ماشي اتفقنا لما أشوف آخرتكم أنتم وأبوكم
بكرة بقى هنعرف خالد ورهف هيعملوا إيه وأزاي هيحلوا مشكلة إلهام
وممدوح

استنونا....

الحلقة الثالثة عشر

رهف وخالد عندهم فكرة يفضوا بيها الأشتباك بين إلهام وممدوح
بس يا ترى هتعجب إلهام وممدوح هيوافق
ده الي هنعرفه

-ممدوح : ها ياسي خالد أنت وست رهف ايه أفكاركم النيرة الي هتتحفوني
بيها

-رهف وخالد: بلاش تريقة يا بابا لو سمحت قبل ما تسمعنا
-إلهام: أفضلو قولوا وكده كده أنا رايحة ل ماما وأبقوا عيدوا مع أبوكم
لوحدكم .. ها

-رهف وخالد: يوووة أصبري يا ماما كده وصلوا بينا على النبي
-إلهام وممدوح: اللهم صلي وسلم على نبينا أفضل الصلاة والسلام
-رهف وخالد: بصوا بقى حبايب قلبنا بابا وماما

أحنا مش عيال ودماعنا كبيرة وعمليين
-ممدوح: نعم يا خويا أنت وهي.. عمليين

عمليين أزاي يعني

-خالد: يوووه يا بابا أصبر علينا وسبني أعرض الفكرة عليكم بس بالله
عليك متتريقش علينا

شوفوا أحنا مش عاوزين لبس العيد
 -إلهام: نعم يا واد أنت وهي.. بقى أنا بكافح معاه وبتخانق علشانكم
 وحسيب البيت علشان يجيب لكم اللبس وأنت تقول مش عاوزين لبس
 العيد

أنا مش هسمع الكلام الفاضي ده
 شكلك متفق مع أبوك أنت ومقصوفة الرقبة رهف
 -خالد : يا ماما أسمعي الفكرة الأول وبعدين أتكلمي يا حبيبتى لو
 سمحتى

-ممدوح : في ايه يا إلهام ما تسمعي العيال عاوزين يقولوا ايه ولا أنتي كده
 دائماً الي مش على مزاجك متسمعهموش وتصمي على الي في دماغك لو
 غلط

-إلهام : أنا يا ممدوح الي بصمم برضه على الي في دماغي وأنا الي بمسك في
 الغلط

طب والله ما أنا

-خالد ورهف: يوووه يا ماما والنبي ما تحلفي واسمعي بقى علشان خاطرنا
 وحية تيتة عندك أسمعينا بقى
 -إلهام: طيب قولوا خلينا نخلص من أم القعدة دي

-خالد ورهف: بصوا يا حبايب قلبنا أحنا مش عاوزين لبس العيد لأننا فعلاً مش هننزل من البيت وعلشان كورونا ومش هنعرف نشتري أي حاجة وكمان أحنا عندنا لبس كتير

-ممدوح: عفارم عليكم يا عيال ولاد ممدوح فعلا (الحمد لله العيال عاقلين لأبوههم)

-إلهام : انت بتقول حاجة يا ممدوح

-ممدوح: لأ يا حبيبتى ده أنا بقول عيال عاقلين
هاكملوا يا عيال وبعدين

-خالد ورهف: وبما أننا محبوسين في البيت من كورونا ولا بنخرج ولا بنروح نادي ولا بنقابل صحابنا ف أحنا هنقترح يا بابا أقترح يرضي ماما ويرضيك ويسعدنا

-إلهام : قول يا ابن ممدوح ما أنت طالع لأبوك في افتاكساته

-ممدوح : افتاكسات ايه يا إلهام بتاعتي دي ما تحسني كلامك قدام العيال

-خالد ورهف : يوووه يا ناس حرام عليكم سبونا نقول الكلمتين

-إلهام: طيب خلصوني وقولوا

-خالد ورهف: بما أننا محبوسين وكده ف أحنا هناخد فلوس لبس العيد وأقل كمان ونجيب دراع للعبة بابجي الي بنلعبها مع أصحابنا وكلبسات

للفون وكل حد فينا ياخذ 200 ج بس

تمن لبس العيد وهنشتري الدراع أونلاين يعني لا هننزل ولا هنشتري من
الشارع وبكده هتسعدونا أنا ورهف بالعيد وهنفرح أوي باللعب
بالدراعات دي

موافقين يا بابا

موافقة يا ماما وأهو تقولي لخالتو وعمتو العيال خدوا الفلوس وجابوا الي
نفسهم فيه ومحبوش لبس هما أحرار وكده لا ولاد خالتي ولا عمتي أحسن
مننا

-ممدوح: أنا موافق يا ولاد هو يعني هدف **400** ج في الزمن المهبب ده بس

حلوة الفكرة المهم تتبسطوا

ها يا إلهام ايه رأيك في فكرة الولاد

-إلهام: خلاص طالما هما عاوزين كده أنا موافقة

الي يفرحهم يفرحني

-خالد ورهف: الله عليكم وأنتم رايقين وحلوين كده

ربنا يخليكم لنا يارب

-إلهام: والكحك والبسكوت يا سي خالد ولا أنت عامل خطة مع أبوك

بقولكم ايه كله إلا الكحك والبسكوت والله لأمشي عند ماما

ولا أنا حقي مهدور في البيت ده

-خالد: يا ماما اصبري

هقولك على الكحك والبسكوت يا حبيبتي أصبري
بكرا بقى نعرف فكرة خالد ورهف للبسكوت والكحك وبالذات العيد
خلاص بعد بكرا

أنتظروني...

الحلقة الرابعة عشر

- إلهام : ها يا أبو العريف أنت وأختك هتعملوا ايه في الكحك والبسكوت
 -خالد ورهف : بص يا بابا وأنتي كمان يا ماما أحنا قدامنا يوم للعيد وبابا
 حالف ما حد يشتري كحك ولا بسكوت ولا حد نازل
 يبقى نعمله إحنا يا حبيبتي في البيت وكده نرضي كل الأطراف
 وأنا ورهف هنساعدك ونسهر معاك
 -رهف: آه والنبي يا ماما زي مامة تسنيم صاحبتى بيعملوه في البيت
 وبتقولي بيطلع جميل أوووي
 -ممدوح : ههههههه أنا موافق يا ولاد وأنا كمان هعمل معاكم وتبقى ليلة
 يا عمدة ههههههه
 -إلهام : إمممم هي فكرة حلوة
 بس تساعدوني لكلكم علشان نلحق ننجز الكحك والبسكوت والبيتفور
 -ممدوح : بيتفور ايه بقى متفقناش عليه أنا قلت كحك وبسكوت بس
 ولا هي حلوانة في سلوانة وشوية وتقوليلي قراقيش ولا نكشير والذي منه
 هما كحك وبسكوت بس بلاش خوته دماغ ومصاريف كمان
 الكورونا يا ناس الرحمة
 -إلهام : يووه يا ممدوح هو أنا أرضي بالهم ومش عاجبك ولا ايه

ماله البيتفور يعني لما أعملي 2 ك مع الكحك والبسكوت هما دول الي
هيقصفوا أجل الميزانية يعني

مش تحمد ربنا إن الكورونا رحمتك 6 أني أشتريهم شوف الكحك برة بكام
ب 120 ج ولا البسكوت ب 90 ج والبيتفور الي مش عاجبك ب 140 ج
ولا هو عند منك وخلاص يا ممدوح

شوف بقى أنت والعيال يا أعملهم على بعض يا بلاش مش عاملة حاجة
والاتفاق لاغي وهروح ل ماما
ها

-خالد ورهف : يووووه تعبوتنا معاكم بقى وزهقتونا كل حاجة تتخانقوا
عليها وتعاقدوا بعض

خلاص يا بابا مجاش على البيتفور يا حبيبي وبعدين رهف بتجبه
مش كده يا رهف

-رهف: أيوه يا بابا أنا مجبه ومبحبش الكحك يا حبيبي

يرضيك رهف حبيبة قلبك متاكلش بيتفور إهئ إهئ إهئ

-ممدوح : خلاص بطلي زن وعياط وأنتي زي أمك كل شوية تعيطي

خلاص اعملوا بيتفور موافق

وأنا هعمل معاكم ونخترع بقى

-إلهام : خلاص أستبيننا وهطلب الطلبات للخبيز ديلفري بس ليا شرط
والي أوله شرط أخره نور

-ممدوح وخالد ورهف: خير يا ماما قولي الشرط خيلنا نخلص

-إلهام: ممدوح تساعدني آه بس تحت رعايتي
يعني ممنوع افتكاسات يا حبيبي
ده خبيز وهنكلفه يا حبيبي والغلطة فيه بفورة

موافق يا روجي

-خالد ورهف: قول موافق يا بابا والنبي علشان نلم الليلة دي بقى

-ممدوح: موافق وأمري لله مع أنكم هتتحرموا من تاتشتي ولمساتي
العبقرية

موافق يا حبيبتي

إلهام اتصلت بالسوبر ماركت وجابت الطلبات كلها
بكرا بقى نشوف هيخبزوا أزاى

الحلقة الخامسة عشر

الديلفري جاب الطلبات والدقيق والسكر والبيض ونشوف
-إلهام : رهف تعالي ساعديني في المطبخ علشان نخلص الكحك والبسكوت
رهف: حاضري يا ماما وسي خالد بقي موقعه ايه من المطبخ
-خالد: أنا هدور ماكينة البسكوت وهقطعه كله وهقطع البيتفور بالمكبس
الحاجات دي عاوزة رجالة زينا تستحمل ههههههه وكده هكون
ساعدتكم النص بالنص
-إلهام: يلا يا رهف أضربي السمن والسكر بسرعة بالمضرب وضيفي البيض
خلينا نخلص البسكوت
-رهف: حاضري يا ماما أهو شغالة شغل نار
-ممدوح: ماشاء الله عليكم منورين المطبخ والله
مش حاسين إنكم ناقصكم حاجة
-رهف وإلهام : ناقصنا ايه؟؟
-ممدوح : أنا طبعاً ولمساقى اللولية
فسحي كده يا رهف أنا اللي هساعد ماما وأكمل عجن البسكوت
هي قلبة واحدة مني والعجينة هتبقى فل الفل
-إلهام : يالهوويي يا ممدوح

هتساعدني يبقى تحت رعايتي وتعمل الي هقوله
أستبيننا يا دوحة

-ممدوح : حاضري يا روجي من عنيا

-إلهام : ضربت البيض والسمن والسكر كويس يلا ضيف عليهم اللبن
والنشادر والدقيق وقلب يا حبي

-ممدوح : أهو يا قلبي عجينة تجنن أهو تسلم إيديك يا دوحة يا خطير
(أنا هحط شوية كاكاو سر كده من أسرارى على حبة عجينة ويبقى بسكوت
شوكلاتة ولا عمائل الشيف حسن)

-إلهام: بتقول حاجة يا ممدوح

-ممدوح : لا لا يا حبيبتي مبقولش حاجة ده أنا بنادي على خالد يجي يشغل
الماكينة

-خالد: أنا أهوووو تحت النظر .. وجاهز أهو

خالد ورهف قطعوا البسكوت كله ورهف سوته في الفرن ونفذوا وعدهم
وساعدوني وطلع جميل

-ممدوح: رهف لما يتبقى ربع كمية العجين قوليلي أنا الي هقطعه في المكنة
رهف وخالد قايمين بالواجب ويبسوا البسكوت وأنا أنتهزت الوقت وعجنت

الكحك كمان وسبته يخمر على ما البسكوت يخلص

-رهف : بابا تعالي يلا ربع العجين أهو الي قلتلي عليه

-خالد : بابا أنت ناوي على ايه

بلاش افتاكسات والنبي ل ماما تقلب العيد علينا

-ممدوح: كده برضه يا خالد مش واثق في إمكانيات بابا

-رهف: من ناحية واثقين ف أحنا واثقين في إمكانياتك وافتكاستك

ههههههه

-خالد: الحق يابابا افتكس بسرعة قبل ماما ما تخلص الفون مع خالتو

بس ايه نتفق الأول

-ممدوح: نتفق على ايه

-خالد ورهف: لو الدنيا باظت احنا مشفנקش ولا نعرف

ولو الدنيا حلوة كده وافتكاستك نجحت يبقى النجاح لنا كلنا

أتفقنا يا سي بابا

-ممدوح: اتفقنا يا ولاد إلهام

رهف هي ماما لسه بتتكلم في الفون

-رهف: آه بتتكلم مع خالتو سامية

ويحكوا في الفون عن الكحك والبسكوت وعمایل إيديها وههههههه

وأنها سابت المطبخ أمانة في إيدي أنا و خالد

ممدوح بقى ميقدرش يعيش من غير ما يفتكس

افتكس ايه بقى هقولكم فوراً

-ممدوح: رهف ناولني بسرعة الكاكو و حبة لبن صغيرين

-رهف: أستر يارب

أنا مليش دعوة يا بابا ياختراعك
 أدي اللبن والكاكو أهو وأعمل الي عاوزه بسرعة
 -خالد : يلا بسرعة يا بابا أخلص وأعجن بسرعة أنا مراقب ماما أهو لسه
 بتتكم في الفون

ممدوح عجن كاكو مع حبة لبن وضافهم لعجينة البسكوت وبسرعة خالد
 قطع البسكوت ورهف دخلته الفرن يستوي مع الكحك
 -إلهام : رهف خلصتي البسكوت أنتي وخالد
 ودخلتي الكحك في الفرن يستوي
 -رهف: أيووه يا ماما بسوي الكحك أهو والبسكوت خلاص قرب يخلص يا

حبيبتي

أستريجي أنتي شوية على ما أخلصهم ونعمل البيتفور يا حبيبتي
 (أستر يارب لما ماما تشوف افتاكسة بابا)
 -إلهام: ماشي يا حبيبتي بس أوعي البسكوت ولا الكحك يتلسعوا منك
 -رهف: حاضر يا ماما

الوقت عدى ورهف وخالد سوا الكحك والبسكوت وكمال بسكوت ممدوح
 بالشوكولاتة

إلهام دخلت المطبخ تشوف الحاجات وهوب شافت بسكوت الشوكولاتة
 -إلهام: يا لهوووووي ايه البسكوت ده أنا معملتوش
 ممدوددودو يااااا رهف

الحلقة السادسة عشر

بعد افتكاسة ممدوح وبسكوت الشوكلاتة الي يجن
 -إلهام : واووو يا ممدوح طعمه شوكلت يجن يا حبيبي
 تعيش وتفتكس لنا افتكاسات روعة كده مش بتخسر يا حبيبي
 -ممدوح : أحم أحم وسعوا كده شوية لأجدع شيف في مصر
 علشان تعرفوا بس قيمة دماغي لما بتفتكس ههههه
 -رهف وخالد : ايه يا عم بابا ما أحنا معاك في الأختراع ده ولا نسيت
 جبنا الكاكو وعجنه وأنا الي قطعته من الماكينة ولا نسيت
 -رهف : وأناااا يا بابا سويته في الفرن وخذت بالي منه
 -إلهام : خلاص كلكم نجاح جماعي
 ندخل بقى على البيتفور وننجز
 أنا هعجنه لكم وأقسمه نصين أبيض وشوكلت وخالد يقطع ورهف تسوي
 في الفرن و....
 -ممدوح : وأناااااا أعمل أيه يا حبيبي
 -إلهام : ههههههه تاخد بالك معاهم يا حبيبي على ما أروق الشقة بسرعة
 كده وأمسخ وأمع
 تكونوا أنتم خلصتم البيتفور

- ممدوح: ترويق ايه بس يا حبيبتى هو في حد هيجلنا في الكورونا دي
ولا أحنا هنروح لحد
- إلهام : عادة بقى يا حبيبي زي الكحك والبسكوت كده وبعدين أنا هروق
الشقة على الوش كده من غير هبد ولا خبط هههههههه
- ممدوح: ماشي يا حبيبتى
رهف يا رهف
- رهف: ايوة يا بابا أنا أهو في المطبخ
- ممدوح: جايلك يا حبيبتى أهو
بقولك يا رهف هاتي شوية عجينة بيضاء من البيتفور
- خالد ورهف: ليه يا بابا
هتفتكس ايه تاني
- رهف: بقولك بقى الافتكاس ممنوع هنا ماما عجت نوعين أبيض
وشوكلت
- ممدوح: أسكتي أنتي وهاتي ربع العجينة وشوفي اختراعات أبوكي الي تجنن
العقل دي
- خالد ورهف: بابا أحنا هنقولك
ممدوح: عارف لو خير أنتم معايا لو باظت الدنيا أبقي لوحدي
- ممدوح خد العجينة وافتكس ألوان طبيعية موجودة في المطبخ إلهام بتجيبها
للدوناتس وعمل حبة عجينة أحمر وحبة أخضر

- رهف وخالد : يا لهوووووي يا بابا
 ماما هتدبجنا لما تشوف الألوان دي
- ممدوح : أسكتوا أنتم أيش فهمكم في المطبخ
- إلهام : رهف أوعي تحرقى البيتفور خلىنا نخلص ونشوف الي ورانا
- رهف : حاضر ياماما
- الشقة أترتبت وخلصت والبيتفور استوى كله وريحته تجنن والفطار قرب
 خلاص
- إلهام : وروني كده ايه ده يا لهوووي بيتفور أحمر وأخضر
 يا لهووي من جوزي وعمايله
- ممدوح : طبعاً ما أنتي مش متابعة الجديد والموضة السنة دي في الوان
 الكحك والغريبة يا هانم من المسلسلات الي بتشوفها
- إلهام : مسلسلات ايه دي ده يدوب 5 مسلسلات بس شوف أختك
 بتشوف 7 ولا سامية أختي بتشوف 6 وبعدين متاخذنيش في دوكة ايه
- الألوان دي الي عملتها
- دلوقتي أختي تضحك عليا لما تشوفه
- ممدوح : أختك دي زيك مش متابعة الجديد ولا بتحب التغيير
- التغيير يا حبيبتي سنة الحياة ههههه
- إلهام : ماشي يا ممدوح ماشي

ممكن تنزل بقى تلحق تجيب لنا الفسيخ والرنجة قبل الأذان ما يأذن
ونشوف موضوع الألوان ده بعدين
-ممدوح: فسيخ ايه ده متفقناش عليه يا هانم أحنا أتفقنا على الكحك
والبسكوت بس
-إلهام: يعني ايه ده عادة زي الكحك والبسكوت وكل سنة بتجيبه لنا
أشمعنى السنة دي يعني هتمكر علينا
كل الناس جابت فسيخ ألا أنا أهى أهى
كل حاجة بجبها بعذاب وبخناق معاك
-ممدوح: يووووه زني بقى وعكنني علينا علشان الفسيخ والرنجه
وأنسي كورونا والي أنا فيه ده
حرام عليكى ده دول وحدهم يطلعوا ب300 ج كمان
-إلهام: إهى إهى طول عمرك بتعكنن عليا أهى أهى
-ممدوح: خلاص هنزل أجيب ولا تزعلي يا حبيبتي وجهزي الفطار
وبعد الفطار نشوف بيتفوري الي بالألوان
-إلهام: كل سنة وأنت طيب يا حبيبي وربنا يخليك لنا
بكرا العيد ونشوف ممدوح وإلهام هيعملوا أيه

الحلقة السابعة عشر

الأذان أذن وفطرنا آخر يوم في رمضان و.....

-إلهام: كل سنة وأنتم طيبين حبايب قلبي وكل رمضان وأحنا بخير وربنا
يخليك لنا يا دوحة ياروح قلبي

-ممدوح: كل رمضان وأحنا طيبين يا حبايي وأعيش وافتكس لكم ههههه

-رهف وخالد: وأنت طيب يا بابا وأنتي طيبة يا ماما ربنا يخليكم لنا

-إلهام: أما أدوق البيتفور الملون افتكستك يا دوحة الي هتفضحنى بيه
وسط أخواتي والمجتمع ههههههه

بيتفور أحمر وأخضر يا دوحة يا لهووي

-ممدوح: أيش فهمك أنتي في الجديد في السوق أنا متابع الجديد السنة دي
وكله بالألوان يا حبيبتي

المهم دوقى كده وقوليلي رأيك

-إلهام: أممممم طعمه حلوى يا حبي الأحمر يجنن أما أدوق الأخضر بقى
واوو يجنن والله تسلم الأيادي يا حبي (بس هقول للناس ايه لما أقدمه لهم)

-ممدوح: بتكلمي نفسك يا حبي من الحلاوة ههههههه

-إلهام: آه آه من الحلاوة (ده أنا بفكر في الافتكاسة بتاعتك هقولهم ايه)

الحمد لله مفيش حد هيجلنا من كورونا وأسترت من عند ربنا

-خالد : بابا حبيبي فين العيدية

-رهف : وأناااا كمان يا حبيبي عاوزة العدية

-ممدوح : عديات ايه هو في حد هيخرج وبعدين أنا مش أدتكم فلوس

اللبس، مفيش عديات هو أنا هلاقيها منين ولا منين كحك وبسكوت

ورنجه وفسيخ ولبس، هي كلمة مفيش عديات ولا في خروج من البيت

-إلهام : يوووه يا ممدوح متعكننش على العيال في العيد مجتش على العدية يا

حبيبي

-ممدوح : لأ بقى جات عليها

مفيش عديات وكلمة وقتتها وخلاص في ليلتكم دي لأقلبها ضلمة

عليكم في ليلة العيد

-رهف : إهئ إهئ إهئ عاذرة عدية مليش دعوة زي صحابي

-خالد : وأنا كمان عاوز العدية يا بابا ليها مشروع عندي متكتك له

-ممدوح : مشروع ايه يا أبو مشروع ده احنا محظورين كلنا يا حبيبي في

البيت ومفيش خروج من البيت

-إلهام : يوووه يا ممدوح دايماً أنت كده تبوظ اللحظات الحلوة وتنكد

علينا

ما تديهم العيدية وأنا هعمل حسابي في ميزانية الشهر الجديد هختصر- من

المصاريف وبالذات مصاريفهم

يعني أعتبرها يا حبيبي سلفة من الشهر الجاي و...

- خالد: ماماااا سلفة ايه ياستي دي الي هتخصميها الشهر الجاي دي
 -إلهام: (غمزت بعينها ل خالد)
 خلاص يا خالد أسمع الكلام وبعدين أنت بتخرج فين يعني
 -خالد: ماشي يا بابا موافقين سلفة من الشهر الجاي مراعاة منا لظروف
 كورونا وغلو الأسعار
 -ممدوح: كده أستبيننا ومش هنكد عليكم
 نادي على رهف أختك وتعالوا خدوا العيدية
 (الواحد لازم يكون حمش وكلمته متنزلش أبداً)
 -إلهام: بتقول حاجة يا حبيبي
 -ممدوح: لا يا حبيبتي ده أنا بنادي على الولاد
 خد يا خالد عيديتك أهو 200 ج
 مخصموين الشهر الجاي
 -خالد : خلاص يا بابا لازم تفكرني وتنكد عليا
 عموما كل سنة وأنت طيب يا حبيبي
 -ممدوح : رهف تعالي خدي عديتك يا حبيبة بابا
 -رهف : حبيبي يا بابا كل سنة وأنت معانا يا حبيبي
 -ممدوح : كل سنة وأنتم طيبين حبايب بابا

-إلهام : يا سلام مفيش عيدية لكي يا إلهام على تعبك معانا طول رمضان
ووقفتك في المطبخ
كده يا ممدوح إهئ إهئ مش مسمحاك
-ممدوح : أنتي الكل في الكل يا روح ممدوح وعيديتك أهى مجهزها يا حبيبتي
-إلهام : تسلمي يا حبيبي ربنا يخليك لنا وميحرمننا منك
-ممدوح : ويخليكي ليا
بس إعملي حسابك مخصومة برضه من مصروف الشهر الجاي
-إلهام : نعم يا سي ممدوح بتقول ايه

بكرة نكمل ونشوف ممدوح وإلهام والعيدية والعيد

الحلقة الثامنة عشر

-إلهام : بتقول ايه يا ممدوح عديتي مخصومة من مصر-وف البيت للشهر الجاي

-ممدوح : يا حبيبتي قولي طيب صباح الخير يا حبيبي
كل سنة وأنت طيب يادوحة وتعملي لنا كوبيتين شاي وطبق بسكوت
وكحك من إيديكي الحلوة دي نفطر بيهم يوم العيد
ولا نمتي وصحيتي على النكد

-إلهام: وهو كان تمر فيك تعبي طول رمضان ووقفه المطبخ شهر بحاله وفطار
وسحور وشاي وقهوة أنت وعيالك
أخرتها تقولي عديتك مخصومة زيهم

ليه أن شاء الله وهو أنا كنت جبت لبس العيد ولا خدت منك حساب
الكوافير أنا كمان زي ما عيالك عملوا إهئ إهئ

-ممدوح : يا حبيبتي أحنا في العيد والناس صاحية بتضحك في وش بعض
وبيغنوا العيد فرحة وأنتي صاحية على النكد برضه
الله يرحمه سعد زغلول لما قال مفيش فايدة

-إلهام: إهئ إهئ ما هو كله منك بتعشق تنكد عليا حتى في العيد
ومستخسر فيا عيادية وكلمتين حلوين في العيد بعد تعبي شهر كامل

-خالد : بابا مش راضي ينزلني أتمشى مع صحابي شوية في الشارع زهقت
يا ماما وصحابي أتفتت معاهم وهيعدوا عليا أقولهم ايه يعني بابا حبسني في
البيت

يرضيكي يا ماما يضحكوا عليا

-ممدوح : والله عال وكمال أتفتت معاهم وظبطت الليلة من غير إذني يا
سي خالد طيب ايه رأيك ما أنتش نازل

-إلهام : خلاص يا ممدوح سيبه ينزل شويه مع صحابه وهيلبس الكمامة
والجفلز وياخد باله
مش كده يا خالد

-خالد : آه والنبي يا بابا مش هقلع الكمامة وهاخد الكحول في جيب
والنبي والنبي يا بابا

-ممدوح : يووووه على حنية قلبي دي الي مضيعاني معاكم
خلاص أنزل بس تاخد بالك وتعمل تباعد بينك وبين الناس مترين على
الأقل وأوعاك تشرب حاجة من الشارع سامع
خالد : حاضر يا حبيبي ربنا يخليك ليا

-رهف : عيني يا عيني على الحنية
طيب بص يا حبيبي أنا كمان هنزل أتمشى مع صحابتي وناكل جلاس بس
مش هندوب في قلوب الناس هههههه
-ممدوح: ما هي كملت يا هانم أنتي وعيالك

أفضلني أخرجي يا رَهف بنفس تعليمات خالد سامعة
- رَهف : حاضر يا حبيبي هروح ألبس صحابي قربوا يعدوا عليا
- ممدوح: والله عال حتى رَهف مضبطة صاحبها
إلا أنت يا دوحة الي قاعد ومحذور
- إلهام: حبيبي يا حبيبي يا روجي
ممکن أروح شوية عند مامتي وهلبس الكمامة زي العيال
- ممدوح: ايه بتقولي ايه يا هانم

بكرة هنعرف ممدوح هيعمل أيه مع إلهام

الحلقة التاسعة عشر

-إلهام: ايه يا دوحة بقول هخطف نفسي- كده زي العيال وأخرج أروح
لما متي في العيد وأقول ل سامية أختي تيجي معايا
-ممدوح: والله عال العال كله بياخد قرارات وبينفذها مع نفسه ومفيش
راجل هنا ناخذ رأييه يا هانم
مفيش خروج من البيت فاهمة
-إلهام: إهئ إهئ مش فاهمة ها
وهنزل أروح ل ماما وحكم سامية تيجي معايا
هو ايه ده مقدرتش على العيال عاوز تتحكم فيا إهئ إهئ
-ممدوح: تحكم ايه يا هانم يا عاقلة
أنا خايف على مامتك وعلى مامتي دول ناس كبار في السن المفروض نخاف
عليهم ومنروحش لهم
شفيتني روح لأمي ولا لحد من أخواتي
إعقلي يا إلهام وخافي عليهم
لكميتها فون وفهميها وهي أكيد فاهمة وخايفة على نفسها
-إلهام: بس أنا نفسي أروح ل ماما يا ممدوح وأعيد عليها دي وحشتني
ومشفتهاش من قبل رمضان

-ممدوح : يا حبيبي لازم تتحملي علشان تحميها وتكون بخير
أستهدى بالله كده وقومي كلميها وعقلي أختك سامية هي كمان
وأنا هقوم أجهز لك الفسيخ والرنجة وأحط تكات ممدوح وحركاته
ومستنيك يا حبيبي في المطبخ

-إلهام : طيب يا حبيبي هكلم ماما فون وأفهمها إني خايفة عليها وأكلم
سامية أفهمها برضه وأجيلك نجهز الغدا على ما العيال يجيوا
ممدوح دخل المطبخ وهو مبسوط لأنه عرف يقنع إلهام واليوم نقد من النكد
اليومي

وبدا بتجهيز الفسيخ والرنجه وطبعاً منسيش يحط افتكاساته وتكاته
إلهام : دوحة حبيبي كلمت ماما وفهمتها لاقيتها فعلا خايفة حد يروح لها
زي ما قتلي يا حبيبي وسامية كمان أقتنعت بكلامي
-ممدوح : طيب تمام تعالي بقى طلعي الأطباق على السفرة وجهزيها على ما
أكلم الولاد وأشوفهم أتأخروا ليه

-إلهام : عيوني يا حبيبي
واووايه تقطيعه الفسيخ الي تجنن دي وكمان مشهيه طحينة يا تكاتك
يا دوحة

والرنجه كمان مقطعها هههههه بالمسطرة (برضه منسيش أنه مهندس)
ومهندس لنا الرنجة

والبصل يا لهووي يجنن مرصوص أزاي كده يا حبيبي

وايه الطبق الغريب ده الي فيه طحينة وشكله غريب عن الطحينة
وفين البطارخ الي أنا جيبها
ممددودح فين البطارخ يا حيي ده أنا جايها مخصوص العيال بيحبوها
موووت

وايه الطبق العجيب ده
-ممدوح: عجبك التقطيع والتجهيز يا روحي وشفتي رصة البصل في الطبق
مزاج يا حيي وتاتشات الشيف ممدوح
-إلهام: برضه مقلتلش فين البطارخ وايه الطحينة الغريبة دي
-ممدوح: ما هو أنا بقى عملت طبق الشيف ممدوح
هتاكلوه وتتننوا من حلأوته

ضربت البطارخ مع الطحينة والليمون وبصلية في الخلط وطلع الطبق
الجميل ده

-إلهام: يا لهووووووي يا ممدوووح
البطارخ راحت

آه ياني يا إلهام وعمائل جوزي فيا
وافتكاساته

أقول للعيال ايه

بكرا هنعرف العيال عملوا ايه
وافتكاسة ممدوح أخبارها ايه

الحلقة العشرون

-إلهام : البطارخ يا دوحة تضربها في الخلاط ليه
حرام عليك يا راجل ده أنا مستنياها من أول رمضان
يا لهوويوي يا أناااا على افتكساتك ... طيب أسألني شور عليا
-ممدوح : في ايه يا إلهام هو أنا عملت جريمة يعني
ما الشيف شربيني عمل كده بس هو ضرب الرنجه الصراحة يعني وأنا بقى
حطيت تاتشاتي الممدوحية وعملت البطارخ
بطلي زعيق ولما تدوقي أبقي أحكمي
-إلهام: يا حبيبي يا عمري البطارخ دي تتاكل كده بحالها والواحد يحس بيها
وهي بتقرقرز كده في بقه مش تقولي ضربتها مع الطحينة وبقت عجينة في
بعضها... يا عيني عليك يا إلهام من افتاكسات جوزك وعميله
-ممدوح: يوووه بقى أفضلي ولولي كده وفتحي عيون العيال أنها وحشه
علشان مياكلوش وتسدي نفسهم ما أنتي كده غاوية تنكدي علينا
إلهام: أنا برضه الي بنكد عليكم يا ممدوح
اقولك أنا الي ضربت البطارخ وعجنتها حلو كده أرتحت
-خالد: في ايه يا ماما أنتي وبابا صوتكم طالع على السلم
هو أنتم كده علطول حتى في العيد

-إلهام : معلش يا أبني الكورونا والحظر وعمايله مع أبوك نصيبنا نتحمل
إدعي لنا يا ابني يزيع الغمة دي
يمكن دعوتك تتقبل

-ممدوح: أنتي بتدعي عليا يا إلهام وبتقولي للواد يدعي كمان
ده أنتي بقى ناوية على نكد مفتوح (أوبن داي) كده
-إلهام : ما هو مفيش فيك فايدة طول عمرك كده نيتك سيئة ودايماً ظالمني
إهـى إهـى

-ممدوح: أيوووة وبتعيطي كمان يعني تدعي الدعوة عليا وتعيطي
ده الستات دي ملهاش حل والله
-إلهام: إهـى إهـى أنا بقول ل خالد يدعي يزيع الغمة الي هي كورونا علشان
الحظر يتفك و.....

-ممدوح: كمي كمي وترتاحي من قعدتي في وشك ليل نهار مش كده
-خالد: يوووه وبعدين معاكم بقى هو أنتم مبتتعبوش
كفاية خناق بقى

حقك عليا يا بابا وحقك عليا يا ماما
النهاردة عيد

خلاص يا بابا ماما مقصدتش الي وصلك
-إلهام : قول لأبوك الي دايماً ظالمني وحاططني في دماغه ولا فارق معاه عيد
ولا غيره

- ممدوح: خلاص حصل خير وسامحتها
- إلهام: نعم نعم تسامحني على ايه إن شاء الله
هو أنا اللي ضربت البطارخ في الخلط
- خالد: البطارخ بخ
- إلهام: آه افتاكسة أبوك بتاعة العيد
- رهف: سلامو عليكم يا قمرات أنا جيت
ايه مالكم مقطعين بعض ليه هههههه
- ممدوح: مفيش يلا غيري هدومك وتعالى نتغدى
- إلهام: أه تعالي وأنتي تعرفي مقطعين بعض ليه
السفرة جهزت والأكل أتحط
الرنجة والفسیخ جاهزين والطحينة كمان وافتاكسة ممدوح البطارخ
المضروبة
- خالد ورهف: واووو يا بابا البطارخ تجنن كده... تسلم إيديك وتفانينك
- ممدوح: بمجد يا ولاد عجبتمكم
قولوا لأمكم الي منكدة عليا من الصبح
- إلهام: تسلم إيديك يا حبيبي طعمها تحفة وجديد
- ممدوح: تسلمولي وبكرة بقى هعملكم اختراع جديد
أستنوني بكرة ونشوف يوم جديدمع إلهام وممدوح

الحلقة الواحدة والعشرون

-إلهام : صباح الخير يا حبيبي
كفاية نوم بقى وكسل هو العيد قال كده قوم يلا أتنشط على ما أجهزلك
الشاي والبسكوت

-ممدوح: صباح الفل حبيبي الواحد جسمه مكسر من رمضان والسهر
وبعدين فطار ايه ده أنا شعبان من أكلة رنجة أمبارح والبطارخ اختراعي
ههههههه

-إلهام: ههههه طيب قوم يلا ومتفكرنيش تاني مجريمتك بتاعة البطارخ
عاوزه أنساها ... ها

-ممدوح: جريمة يا إلهام برضه ما أنتي أتهبتي عليها إمبارح أنتي والعيال
وكلتوا صوابكم وراها

-إلهام : (قال أتهبنت قال ده أنا والعيال بنلم الليلة علشان الجيران
ميسمعوش صوتنا)

-ممدوح: بتقولي حاجة يا روجي

-إلهام: لا يا حبيبي ده أنا بكلم نفسي بسليني ههههه

يلا تعالي جهزت الشاي والبسكوت

-خالد : صباح الخير يا ماما فين الشاي بتاعي والبسكوت

-إلهام : صباح النور يا حبيبي
ولع على الشاي وأنا هحط لك البسكوت والكحك
-رهف :وأنا كمان يا مامتي فطريني معاه
-إلهام: مفيش صباح الخير يا ماما ولا قايمة على الأكل (مفجوعة زي
أبوكي)
-رهف : صباح الفل يا مامتي وبطي تكلمي نفسك ها
عارفة أنا كلامك ده معاها هههههه
-إلهام: طيب يا ذكية افطري يلا أنتي وأخوكي وأخلصوا
-خالد : هتغدينا ايه النهاردة يا ماما
-إلهام : غدا ايه يا حبيبي أنت وهي وهو
مفيش غدا ولا هدخل مطبخ 3 أيام
أجازة يا حبيبي أنت وهي
خلاص بح قفلت البوفية وهريح
30 يوم شغالة زي الفلبينية فيه
ايه مليش نفس أريح وأشوفي فيلمين ولا أمسك الفيس بوك بتاعي الي
قربت أنسى صفحتي شكلها ايه
-خالد : ايه يا ماما كل ده
بتحسسيني أننا خطفينك وبنعذبك

- ممدوح : هههههه حلوة الفلبنية دي عجبتني يا إلهام
- إلهام : عجبتك ماشي يا حبيبي يهمني انبساطك برضه
- عموما بقى المطبخ مقفول مش هدخله 3 أيام ولا هطبخ حتى ورك نملة بقولكم اهو
- هو ايه مليش نفس أريح ولا مليش أهل يسألوا عليا
- ممدوح : أهلك مش فاضيين في الكورونا مقدمكيش غيرنا وشك في وشنا
- خالد: يعني ايه يا ماما هتغدى ايه يعني
- إلهام : وأنا مالي التلاجة عندكم والي عاوز ياكل ياكل براحته أما أنا أجaaaaااااا... أغنيها لكم
- رهف : وأنا يا ماما اتغدى ايه ... ايه الظلم ده يا ماما
- دي ندى صاحبتى مامتها عاملة النهاردة مكرونة بشاميل وبفتيك
- إلهام : روجي عندها يا أختي وكلي هناك أما أنا أنسينى 3 أيام
- رهف : بابا يا بابا تعالى شوف مراتك دي عاملة تمرد وهتسبنا نموت من الجوع
- ممدوح : إلهام أنتي بتتكلمي بجد يا حبيبتي هتجوعينا 3 أيام ولا بتهزري
- إلهام : ايه الهزار اني أعجز 3 ايام من المطبخ يعني
- هو أنا مش بني أدمة ولا ايه

-ممدوح: حبيبي براحتك بس المفروض كنتي تعملي لنا أكل الأول يكفيننا
وقت أجازتك وتظبطي لنا الدنيا وأعجزى براحتك
-إلهام : يا سلام يا سلا لم وأنا هستفاد ايه أن شاء الله
ممدوح خد عيالك كده وإبعدوا عني آه وكلوا الي تاكلوه أنا مالي
ووسع كده خليني أدخل أوضتي أكلم صحابي وأشوف الفيس بتاعي
-ممدوح : اي بالراحة عليا يا حبي
-خالد ورهف : بابا ده بينها بتتكلم بجد وعملت إضراب
هنعمل ايه يا سي بابا ده أحنا هنجوع
-ممدوح : فشر تجوعوا أزاي ودوحة موجود
أنا بعون الله هأكلكم 3 أيام الأضراب بتاعها وهوريكم الشيف الي
جوايا ... روحوا اوضتكم وأنا هدخل المطبخ وهوريها
-خالد ورهف : (ربنا يستر من افتكاستك الي هتخلص علينا الله
يسامحك يا ماما سلمتينا تسليم أهالي ل بابا)
-ممدوح : بتقولوا حاجة يا عيال
-خالد ورهف : لا يا حبيبي مبنقولش
ده احنا بنقول ربنا يخليك لنا يا حبيبي
بكرة هنشوف ممدوح افتكس ايه غداً للعيال وهل هينجح ولا هيعك
كعاداته



مدوح نزل يحيب الطلبات وتأخر شوية
 -إلهام : هو ايه آخر أبوكم كده هاتيلي الفون يا رهف أرن عليه.
 إلهام بترن على الفون مردش والثانية مردش والثالثة رد
 وقالها أهو يا حبيبتى على السلم أهو
 -إلهام: أهلا يا سي دوحة ايه أخر كده واه صوت الضحك الي على السلم
 ده

-ممدوح: دي أنغام جارتنا كانت بتسلم عليكي والكلام جاب بعضه معاها
 وسألته على تسبيكة البيتزا
 -إلهام: نعم يا بتاع الركن البعيد الهادي تسبيكة ايه دي الي سألتها عليها
 وأنا إن شاء الله اتخطفت ولا ايه ولا دخلت في غيبوبة ما تسألني أنا يا سي
 دوحة ولا تسبيكة الست أنغام جاية من الركن البعيد
 -ممدوح: يووووه أنتي كده يا إلهام تعشقي النكد
 ركن بعيد ايه وأنغام ايه

وبعدين هو مش أنتي عاملة إضراب ومانعنا نسألك 3 أيام
 -إلهام : أمممم أيوه بس مش لدرجة تسأل أنغام جارتنا
 في استثناءات برضه هسمح بيها يعني
 متاخذنيش في دوكة ها وتبعدني عن الموضوع يا سي دوحة
 -ممدوح : خلاص يا إلهام لو قابلتها على السلم تاني هحط وشي في الحيط

مرضية

-إلهام: أما أشوف

هدخل بقى أوضتي أكمل الأستكنيص بتاعي وأهدي أعصاي من عمايلك

-ممدوح: (أحسن برضه)

-إلهام : بتقول ايه

-ممدوح: مبقولش ده أنا داخل المطبخ أهو

أعجن البيتزا

ممدوح دخل المطبخ وبدأ في البيتزا

بكرة نعرف عمل ايه

وأخبار افتكاساتة ايه

الحلقة الثالثة والعشرون

- رهف: بابا يا حبيبي أجي أساعدك وأجهز معاك البيتزا والحشوات
- ممدوح: آه تعالي جهزي الزيتون والفلفل وقطعيلي الفراخ تحت صغيرة وشوفي أخوكي عاوزاها بايه
- رهف: خالخالد عاوز البيتزا بايه
- خالد: أنا مجبها بالسجق أوعي تعملها ليا بالفراخ بقولك أهو
- رهف: طيب أنا مش هعمل حاجة أنا هجهز ل بابا الحشوات بس
- بابا خالد عاوزها بالسجق أشرتيت سجق يا حبيبي مع الطلبات
- ممدوح: جبت كل حاجة معايا زي المكتوب بالظبط
- يلا وسعي بقى وأطلعني من المطبخ وسيبي الشيف دوحة يضبطلكم أحلى بيتزا ولا بيتزا هت
- رهف: (ربنا يستر) ماشي يا حبيبي لو عوزت مساعدة ناديني
- إلهام: رهف تعالي هنا
- أبوكي سيباه لوحده في المطبخ بيهب ايه روجي يلا معاه ساعديه
- رهف: يوووة يا ماما هو طردني منه بالذوق وقالي خلاص مش عاوزة مساعدة مني
- ما تروحي أنتي يا ماما بصي بصة على السريع كده

-إلهام: لأ يا حبيبتي أنا أجازه من المطبخ 3 أيام والنبي لو ولع حتى ما
هدخل أطفيه

ده أنا أتهرت منكم في رمضان

بريح يا ناس يومين أجازه يا بشر

-رهف: أنا مالي بقي وربنا يستر وبابا ميخربهاش ونلاقي حاجة ناكلها
الوقت عدى وممدوح في المطبخ ساعتين وخبط ورزع وصواني تقع وهيصه
وفجأة

-ممدوح: خالد رهف إلهام تعالوا بقي شوفوا عمايل إديا وكل واحد ياخذ
البيتزا بتاعته

يا سلام يا دوحة يا جامد أنت

-خالد ورهف: الله يا بابا شكلها تحفة السجق والفراخ بتاعتنا

وماما مرجريتا وأنت ايه دي يا بابا

-ممدوح: عملتها بالجمبري كل واحد ومزاجه

كلوا بقي وقولوا رأيكم

-خالد: (هي تخينة أوي زي ما تكون عيش كده ليه وفيها طعم غريب
مش عارفه)

(أه يا بطني ياني)

-ممدوح: ها يا خلودة ايه رأيك

- خالد : أه أه حلوة يا بابا بس تخينة شوية
- ممدوح : أنت اللي مبتفهمش في البيتزا المهم الطعم أخباره ايه
- خالد: حلوة يا حبيبي تسلم إيدك بس هو في طعم غريب كده منش عارفه
- ممدوح: طعم إديا وحياة عنيا هههههه
- رهف: ايه ده يا بابا في طعم غريب في الفراخ والبيتزا تخينة أوووي
- إلهام: أوعي كده منك ليه أما أشوف بتاعتي
- أيه ده يا ممدوح البيتزا فيها طعم غريب أنت عملتها أزاي
- عملتها زي ما كتبتلك الطريقة
- ممدوح : وأعملها بطريقتك ليه هو أنتي مش إجازة يا هانم مالي ومال
- طريقتك بقي
- إلهام : ماشي يا حبيبي يا جوزي ممكن تقولنا تاتشك الممدوحي كان ايه
- ممدوح : المهم ايه رأيكم الأول في عمايل إديا
- خالد ورهف وإلهام: تجننن يا بابا
- قولنا بقي عملت ايه علشان ناكل
- ممدوح: حديكم السر بقي وأمري لله أنا حطيت زيت زيتون في العجينة
- إلهام: ها قول علطول يا حبيبي أعصابي لا تتحمل
- ممدوح: وقلت بقي يا دوحة بدل ما أعجنها بزبادي عجنتها بحليب
- وأتوصيت بزيت الزيتون في العجينة علشان تطلع هشة حطيت كوية
- ونص

وعملت شاورمة الفراخ بزيت الزيتون علشان تبقي صحية
بس هو يعني نسيت حاجة صغيرة كده أفكرتها بعد ما رشيت الصلصة
والجبين

-إلهام : ايه يا حبيبي يا نور عيني قول

-ممدوح : نسيت الخميرة بس

-إلهام ورهف وخالد : يا لهووووووي يا أناااااا من بابا وافتكساته

أستنوني بكرة ونشوف ممدوح ثاني يوم هيا كلهم ايه

الحلقة الرابعة والعشرون

-إلهام : خلاص يا دوحة الي حصل أمبارح والبيتزا الي العيال رموها
ومحدهش كلها بسبب افتاكساتك واختراعاتك ننساها يا قلبي
وخلينا في النهاردة يوم جديد يا حبيبي أتفقنا
-ممدوح : مالها البيتزا يعني كانت جميلة وطعمها جديد هو مش طعم بيتزا
يعني لكن كانت حلوة
أنتي الي مش بيعجبك اي حاجة أعملها
ده أختراع أنا عملته أسمه بيتزاوي
وبعدين أنتي مش إجازة كمان يومين يبقى مالك بقى ومال الي عمله
النهاردة
-إلهام: ما هو يا دوحة يبقى جعانة برضه وعاوزة أكل حاجة مفيدة
عموما براحتك يا حي
-ممدوح: آه براحتي
وادي خالده أنت ورهف هتاكلوا ايه النهاردة
رهف وممدوح: والنبي يا بابا نطلب حاجة ديلفري النهاردة بلاش تفتكس
قصدنا تتعب يعني وتعمل أكل
-ممدوح: ديلفري وأنا عايش وموجود لا ممكن أبداً

-مدوح: لا ياسقي كتر خيرك وخدي أجازتك كاملة هعرف أصرف نفسي-
بنفسي ده أنا دوحة

-إلهام: ايه يا حبيبي واخد الفون معاك ليه هههههه هتدخل على اليوتيوب
ولا ايه

-مدوح: لأ لأ يوتيوب ايه ده

-إلهام: وريني كده أمال ماسكه متبت فيه كده ليه وواخده معاك المطبخ
الله ده نتفكشين من أنغام جارتنا نعم نعم وجروب ستات لكن حلوين
ايه ده يا سي ممدوح

يا نهار ملوش شمس

ممدوح طلقني بقولك

طلقنننني

بكرة هنشوف ممدوح وإلهام

وكارثة جارتهم أنغام

ولا النجرسكو كمان

الحلقة الخامسة والعشرون

-ممدوح: أنتي أتعجننتي ولا ايه طلاق ايه يا مجنونة ده الي بتقوليه عيب عليكى ووطي صوتك لا العيال يسمعو الهبل ده

-إلهام: هبل يا سي ممدوح

آه أنا هبله ومجنونة وعاوزة أطلق

كفاية عليك ست أنغام جارتنا وتعليقاتها ليك ولا الجروب ده كفاية أسمه يخليني أطلق وبالتلاته قال ستات ولكن حلوين قال

إهى إهى

-خالد: في ايه يا ماما مالك صوتك عالي ليه وبتعيطي ليه

-إلهام: أسأل أبوك يا سي خالد وأنت تعرف بس أنا مش قاعدة له في البيت

خليه ياخد راحته على الآخر إهى إهى

-خالد: كل ده ليه يا ماما بلاها نجرسكو ولا كريب ولا أي حاجة

إلهام: أتنبيل على عينك أنت كمان نجرسكو ايه يا زفت

أبعد من وشي والله ما قاعدة لكم في البيت

-ممدوح: عيب يا إلهام تعمي كده قدام العيال

تعالى نتفاهم جوه لوحدا

-إلهام: مش هتفاهم أنا شفت الجريمة بعيني إهى إهى

- ممدوح : جريمة ايه يا مجنونة ده جروب وكل الناس فيه وهي بعثتي طلب
صداقة ودخلتي فيه أنتي مجنونة ولا ايه
- إلهام : ومدخلتنيش أنا ليه وأنا ست أهو زيتها
- ممدوح : (أنا مش شايف أيتها ست)
إلهام : بتقول ايه
- ممدوح : بقول هو أنتي ست ده أنتي ست الستات يا حبيبتى وده جروب
طلع ولا نزل وكله مشاكل وطبخ وكده يعني
- إلهام : يبقى تطلقني يا
- ممدوح : ايه
- إلهام : تدخلني الجروب بنفسك لأروح لجارتنا إنغام وأجيبها من شعرها
وأشوف جوزها سي محي مش لامها ليه
ها قلت ايه
- ممدوح : هدخلك الجروب علشان تتهدي وتسكتي بس أنا مبتتهددش يا
هانم تجيبها من شعرها ولا قفاها حتى ولكن والله يا إلهام
لو لاقيتك بتعلقي لحد من الجيران الرجالة هتعرفي شغلك
- إلهام : جيران مين تاني
يا لهوووووي يا أناااا من الحظر وعمايله
بكرا هنشوف مين الجيران
وإلهام هتوافق على شرط ممدوح ولا هيكملوا خناق

الحلقة السادسة والعشرون

-إلهام : جيران مين دول الي في الجروب يا سي ممدوح والي مش عاوزني
أعلق لهم

-ممدوح : مفيش دي سوسن الي في العمارة الي قصادنا ومديحة الي بعدنا
بعمارتين و.....

-إلهام : نعم نعم يا لهووي سوسن ومديحة ده أنا معرفتش أسمهم ألا منك
يا سي ممدوح

كمل كمل وعرفني على ستات شارعنا

-ممدوح: في ايه يا إلهام جيرانا من زمان والحظر عرفني عليهم يا حبيبتي
وأنا بشتري الطلبات من السوق والله ستات عثلات أبقي أتعرفي عليهم

-إلهام: يا لهوووووي عاوزة أتطلق بقولك

-ممدوح: طلاق ايه يا هبله أنتي وايه الي جرى، كل ده علشان جروب
وهدخلك فيه بس إياكي تعلقي لأي راجل فيه، بقولك أهو ولا هههه ولا
أغضبني ولا اي زفت، أنا حمش وبغير عليك

-إلهام: حمش وبتغير عليا يا لهووي إهـى إهـى وأنت مقضيها جروبات
وساييني مطحونة في رمضان وبعدين محي جوز الست أنغام ورفعت جوز
الست سوسن وتوفيق جوز مديحة مش غيرانين عليهم ليه في الجروب.. ها

-ممدوح: الله الله وأنتي تعرفي أسماء البهوات منين وأنتي مش عارفة أسماء
مراتهم يا هانم ده أنتي يومك مهبب النهاردة وهخليه أسود من شعرك و...
-إلهام: أيووون خدني في دوكة علشان متقوليش موقف جوزاتهم
-ممدوح: ماشي يا إلهام هوووو
جوزاتهم مش معانا في الجروب هما بس لكن في رجالة غريبة في الجروب
أنتي تعرفي أسمائهم منين إنطقي
-إلهام: أي أي يا حمس بالراحة على أيدي
عرفتهم من السوق برضه يا دوحة
زيك كده بس بالإحترام آه
-ممدوح: ماشي يا إلهام اصبري عليا
-إلهام: ماشي يا حبيبي دخلني الجروب يلا ولا أقولك هات الفون كده
أدخل نفسي وأشوف الجروب
أيه ده يا دوحة عامل باس ورد للفون
إهئ إهئ يا لهوووي دي محصلتش من يوم ما أتجوزتك
ممدوح طلقني طلقنننني
بكرة هنكمل ونشوف ممدوح وإلهام والحظر وعمايله

الحلقة السابعة والعشرون

بعد خناقات ومشاحنات وتحقيقات إلهام هديت بس بعد ما دخلت
الجروب ووعدت ممدوح هتعلق للستات بس وملت ممدوح شال باسورد
الفون ووعده إنها مش هتمسكه من غير إذنه
-إلهام: صباح الخير يا حبيبي أنا لاغيت أجازتي المطبخية وهجهز لكم
الأكل

كفاية الي حصل و الي جرى

-ممدوح: صباح الخير وإعلمي الي عمليه

جرس الباب بيرن وإلهام في المطبخ بتجهز الفطار

-ممدوح: ممكن يا حبيبي تفتح الباب اصل ايدي مش فاضية

-ممدوح: هو يعني أنا البواب بتاعكم خلي أي حد يفتح أنا تعبان وجسمي
مكسر ولسه مفقتش

-إلهام: يووووه العيال سهرانيين للصبح ومحدث هيعبرني لو جبتلهم
ميكرفون وناديت كمان

-ممدوح: اصطبحننا واصبح الملك لله .. حاضر.. مين

-إلهام: أصبر شوية

مين يادوحة ده محصل الكهرباءا

ادخل يادوحة يا حبيبي أنت مالك على الصبح هي غلطتي أنا يارطني كنت
فتحت وخلصنا

-ممدوح: بتقولي حاجة يا مدام (لاياحبيي بكلم نفسي)

-ممدوح: ايه اتجنتی

-إلهام: أنت بتقول فيها

أدخل كمل نومك (نوم الظالم عبادة)

-ممدوح: شكلك فعلا دماغك ضرب

-إلهام: هاجهز لك فطار ولا هاتكمل نومك

-ممدوح: لا هانجهزة مع بعض

-إلهام: لا أنا بقي الى هروح أنام جهزه مع نفسك بقي

-ممدوح: یعنی ایه مع نفسک

-إلهام: يوروه أنت عاوز تعمل مشكلة وتتلحك وخلص

-ممدوح : وبعدين استني هنا يعني ايه المحصل يناديكي باسمك

-إلهام: تاني ياممدوح شكلى كده هاعمل جريمة النهاردة

آه يانااااني من الحظر وسنينه وعمايله مع جوزي ممدوح

أُستنوي بكرة ونكمل ممدوح وافتكاساته وكمان الحظر وعمايله معاه

الحلقة الثامنة والعشرون

بعد الخناقات والمشاحنات والغيرة وسنينها الي جات مع الحظر

إلهام وممدوح فطروا وشربوا الشاي وهوبة

-خالد : ماما هتغدينا ايه النهاردة

-إلهام : مفيش مساء الخير صاحي على الأكل علطول (طالع لأبوك همك

على بطنك)

-خالد : مساء الخير والسعادة

ها هنتغدى ايه النهاردة بعد خناقتك على الصبح أنتي وبابا والراجل بتاع

الكهربا

ماما (بصوت واطي) بابا الحظر خلاه صعب أووي وبقى يدقق في كل حاجة

-إلهام: أيوه يا واد زي مايكون كان مسافر ومش عايش معانا

-خالد: هتأكلينا ايه بقی النهاردة

-إلهام: سبانخ

-خالد: ماما أنتي عارفة اني ماباكلش سبانخ.. طبخاها ليه بقی؟

-إلهام: عشان فيها حديد وهتقوي مناعتك من الكورونا

-خالد: وأنتي مالتيش في أكل ربنا كله حاجة تزود مناعي غير السبانخ؟

-إلهام: والله مش عاجبك أكل أمك روح كل برة.

- خالد: مانتی عارفة إن فيه حظر تجول ومفیش محلات أكل مفتوحة
- إلهام: خلاص يبقى كل سبانخ
- خالد: مش عايز سبانخ.. أنا هتغدى ساندوتش جبنة
- إلهام: مفیش جبنة..
- خالد: مفیش ازاي؟ دي التلاجة كانت مليانة إمبارح
- إلهام: مانا رشيت عليها ملح وخزنتها علشان الحظر
- خالد: هحمر بطاطس من الي في الفريزر
- إلهام: واد أنت بطل صداع وعلى الله تقرب من التلاجة
- خالد: طيب أكل ايه دلوقتي يعني؟!
- إلهام: كل سبانخ من بتاعة أمك
- خالد: ماما أنا عايش معاك من زمان وأنتي عارفة إني ما مجبهاش
- إلهام: مش عاجبك أكل أمك روح كل برة
- خالد: والحظر؟
- إلهام: مش مشكلتي
- خالد: بالآآآآ يا بالآآآآ تعالي شوف الست مراتك وعمايها
- ممدوح: يادي الوش الي أنا فيه ... مش كفاية الحظر
- إلهآآآآآ يا إلهام في ايه
- بكرة هنعرف في ايه وياترى إلهام هتركب رأسها وتعمل سبانخ ولا ايه

الحلقة التاسعة والعشرون

- إلهام : أيه بتزقق ليه بصوت عالي
-ممدوح : أنا اللي بزقق ولا أنتي وابنك اللي صوتكم جايب آخر الدنيا
ومش عارف أقعد منكم
-خالد : ألحقني يا بابا وشوف مراتك
-إلهام : هعمل سبانخ جريمة دي بزود لكم الحديد وكرات الدم الحمراء
علشان كورونا
ابنك بسلامته مش عاجبه السبانخ
-خالد: يا بابا طول عمري مباكش سبانخ وماما عارفة كده
هو أنا كنت مسافر يعني ورجعت
-ممدوح : حلوة السبانخ كلها حديد يا خالد دوقها أنت بس وتهتعجبك (لم
اليوم النهاردة معاها شكلها ناوية علينا شايف ناكشة شعرها أزاى وبتبرق
لنا)
-إلهام : بتقول حاجة يا دوحة
-ممدوح : لا لا ده أنا بقنعه بالسبانخ
مش كده يا خالد
مشيها سبانخ النهاردة وأنا هعوضك

- خالد : مش واكل سبانخ ومتعملش مصلحة على حسابي ... ها
- ممدوح : مصلحة ايه يا كلب جيل منيل بستين نيلة
- طيب هتاكل سبانخ غصب عنك ... ها
- إلهام : أيوه كده خليك حمش ووريهم العين الحمراء واقف معايا إيد واحدة كده خلي العيال دي تتربي
- خالد: هنام لغاية بكرة وصحيني عالفدا لما تغيري السبانخ وربنا على الظالم والمفتري
- ممدوح: صلح الدعوة ياواد وخليها الظالمة والمفترية
- أروح أنا في الرجلين في دعوة غلط ليه هو أنا ناقص مش كفاية الحظر
- إلهام : بكرة عاملة بصارة.
- خالد : أنتي بتعانديني صح
- إلهام : مابتحبش بصارة أمك روح كل برة
- خالد : آه ماهي فرصتك وجاتلك عشان تنتقمي مني.
- خالد وإلهام مش هيخلصوا النهاردة
- بكرة هنعرف عملوا ايه

الحلقة الثلاثون

- إلهام وخالد ماسكين في بعض
وإلهام دماغها وألف سيف تعمل سبانخ وتاني يوم بصارة
-إلهام : بالظبط كده هنتقم منك أفتكربقى كل المرات الي أترىقت فيها
على أكي عشان المطاعم كانت مفتوحة لك أفتكربقى كل اللوبيا والمسقعة الي
رمىتهم لما طلبت دليفري
-خالد : إهئ إهئ بتنتقمني من إبنك طيب مش هديلك الفرصة تشمتي فيا
برضه وهعمل إندومي
-إلهام : رميته عشان بيحب كورونا
-ممدوح : هو مش كان بيحب سرطان؟
-إلهام : لا ما هو أترقى
-ممدوح : الحظر غيرك وبقيتي تقولي أفيها كمان
-خالد : أفيها ايه الي بتقولها لك يا بابا وعجباك ده وهي بتبهدل في ابنك
ومجوعاه
-إلهام : مش عاجبك إفيها أمك روح أسمع إفيها بره
-خالد : خلاص ها أكل عيش حاف فيه عيش ولا رميته هو كمان؟

-إلهام : بما إن الفرن بقى بيقفل بدري علشان الحظر انا نَشَفْتُ قلقاس
وطحنته وخبزت بيه عيش

-خالد : يالهوي على سنيي السوداء

-ممدوح : مالك ياواد بتندب زي الستات ليه

-خالد : هو فيه حد بيطحن قلقاس يا ماما؟

-إلهام : الشيف حسن عملها قبل كده وأنا بقى افتكست وعملت بيه
عيش ما أبوكم من أول الحظر ييفتكس ومتكلمتش وعاجبكم أنت
وأختك ولا هو الافتكاس في إيد اليتيمة عجة

-ممدوح : لا يا إلهام بقى كده أوفريا حبيبتى وهو أي حد يعمل حاجة
نقلدها؟

فين شخصيتك المستقلة؟

وبعدين انتي مخبزتيش من سنة 90 جاية تشغلي الفرن دلوقتي بعد ما
صدى من الركنة عشان تخبزي عيش مقلقس؟

-خالد: قولها والنبي يا بابا دي بينها هتطلع الحظر عليا لوحدي

-إلهام: مش عاجبك عيش أمك روح كُل برة.

-خالد: مش واكل خالص ياماما هعمل دايت الماية عشان ترتاحي

-إلهام: والله براحتك بس قبل ما تشرب خد بالك أنا معبية الفلتر عصير
لمون عشان المناعة

- خالد : أقوم انتحر طيب؟
ما أنتي عارفه اني ماجبش الليمون يا ستي
- إلهام : مش عاجبك مية أمك روح إشرب من البحر
- خالد : أمممممم خليكي معايا ثواني
ألو.. الحجر الصحي؟
لو سمحت كنت عايز أبلغ عن حالة
أيوه يافندم أي عمالة تعطس
وتكح كحة ناشفة ودرجة حرارتها فوق الأربعين
- إلهام : انت بتبلغ عن أمك؟
- ممدوح : والله مش عاجبك حجر ابنك حجر الحكومة برة أحسن
أستنوني بكرة ونعرف خالد المسكين هيعمل ايه مع إلهام والحظر وعمايله

الحلقة الواحدة و الثلاثون

بعد خناقات وحبشتكنات إلهام مع خالد والي حصل والي جرى
نشوف

-إلهام : عاوز تبلغ عن أمك يا خالد إهئ إهئ
علشان طبق سبانخ ولا حتى بصارة يا خسارة تربيتي فيكم
-رهف : وأنا مالي بقي بتجمعي ليه أنا هاكل سبانخ وبصارة كمان
-ممدوح : آه منك يا سوسة أنتي (طالعة لناس في بالي طالعة واكله نازلة
واكله)

-خالد: أيوووه أنا بقي الابن العاق واقولك أنا اللي أكلت الجبنة .. ها
مرضية يا ماما وأستني بقي البوليس جايلك يوديك الحجر
-إلهام: إمشي يا واد من وشي على الصبح بدل ما أطلع جناني عليكم
-ممدوح: وأنا مالي يا ستي أنا راضي بالي هتطبخيه يا عنيا وبعدين مالها
السبانخ دي حتى كلها حديد

-خالد: أيوووه كده فلة هبلغ على أثنين مش واحد
يأما تطبخلي حاجة غير السبانخ
-إلهام: تصدق يا واد ياخالد صعبت عليا والدمعة فرت من عيني

-ممدوح : يا حبة عيني ما أنا كمان أكل عيشنا مقفول ومحل البلاي
 سيتشن محظور ومشروع ملاعب الترتان وحمّام السباحة مع زمائلي
 محظورين يا عنيا وأنتي مش راحمة .. طالع نازل تقولي هات هات ...
 العيال محظورة وبتاكل يا دوحة ... ودوحة يجيب لما خلاص روجي طلعت
 منكم متفكر نيش يا إلهام وسيني في غلي ده أنا مشفتش منك طقم
 الحنية ده وأكل عيشنا مقفول يا حنية

قال سامية أختها قال يا حبة عينها مشروعها مقفول

-إلهام: يوه أنت كده ما تصدق تمسك في سلبية من سلبياي وتفتحي فيها
 ما تتسددش .. بص بقى على بلاطة كده سامية هتغير النشاط يعني هتعيد
 تدويره

-ممدوح: نعم يا مثقفة سلبياتك وسكتنا لكن ايه دي كمان هتعيد
 تدويره دي

-إلهام: بص من الآخر كده هتغير النشاط وأنا هشاركها في النشاط
 الجديد وعاززة فلوس منك علشان أشاركها

-ممدوح: يا لهووي على ممدوح وسنينه وعلى الغلب الي أنا فيه

وكورونا وعيالك وكمان مشروع يا إلهام

طب تعالالي بقى وأنا هخلي يومك محصلش

-إلهام: يا لهووي يا أناااا يا عيال الحقوني من ابوكم

بكرا هنعرف إلهام وممدوح عملوا ايه

الحلقة الثانية و الثلاثون

ممدوح مسك في إلهام علشان قالت له على المشروع وعاززة فلوس و
تعالوا نعرف

-ممدوح: تعالي هنا يا إلهام بقولك وقعتك سودة معايا زي شعرك كده

-إلهام: إهئ إهئ إحقوني يا عيال

طيب أهدأ بس وهشرحلك المشروع

-ممدوح: قصدك التدوير يا هانم ده أنا هروح فيكي السجن وأرتاح

-رهف: في ايه يا بابا مالكم

ماما بتجري كده ليه

-خالد: ههههه أنه انتقام السماء

سبحانك يارب هههههه

-إلهام: امشي يا واد أنت والبت دي من وشي وسعولي كده خلوني اجري من

أبوكم

عيب كده يا ممدوح فضحتنا الجيران سمعوا صوتي

إهدأ كده بس وهشرحلك

-ممدوح: جيران ها ده الي أنتي شايله همه بس

-إلهام: (يافرحة أنغام جارتنا فيا)

أهدي يا حبيبي كده وصلي على النبي بس
- ممدوح: هيبويه اللهم صل وسلم وبارك عليه أديني أهو سكت ومش
هجري وراكي
تعالى بقى بالراحة كده وفهميني ايه التدوير ده
أديني هادي أهو
- خالد: ايه يا بابا تهدى أزاى
الله وكم ان هتسمع منها
لا لا يا بابا مكافش العشم
- ممدوح: إخرس يا واد متسخنيش تاني
إلهام: بس يا واد أنت وأختك وسيبوني أتكلم
ممدوح يا حبيبي تعالي ندخل أوضتنا على ما أجيب كوبيتين الشاي وطبق
حاجة حلوة يستحق بقك يا روجي
- ممدوح: ماشي يا هانم أما اشوف اخرك
- إلهام: كيكة أهو لحبيبي وكوبيتين في الخمسينة مزاج أهو
- ممدوح: خشي في الموضوع علطول
إلهام: بصي يا دوحة هنعيد تدويره يعني ههغير النشاط علشان يمشي- مع
الحظر اليومين دول
- ممدوح: إخلصي بقولك
- إلهام: أهو متسرعنيش وأنا مسترسلة

احنا من الآخر كده هنعمل مشروع أكل تجهيزات أكل وأفراح كله منزلي
ويتوصل دليفري للناس وهنعمل جروب لكده والدنيا تحلو يا دوحة
-ممدوح : ها كملي كملي عاوزه الفلوس ليه
-إلهام : اصطبر منا هقول أهو
عاوزين بوتجازات وأفران وصواني والذي منه يعني لزوم الطبخ
بص بقى عاوزه 20000 ج نصيبي ها
-ممدوح : يا لهوووووي يا أناااا من مراقي
محدث يمسكني.

أستنوني بكرة وهنعرف عملوا ايه

الحلقة الثلاثة و الثلاثون

ممدوح سمع ال 20000 ج وأتجنن

وأسيبكم بقى تعرفوا بنفسكم

-ممدوح : 20000 ايه يا روجي

أستني كده أما أسلك وداني

ها أنا سمعت غلط

مش كده يا إلهام

إلهام : إهئ إهئ سمعت صح يا دوحة نصيبي معاها بالنص في المشروع

20000 ج

والنبي وافق يا حبيبي على المشروع ده بيكسب كتير

صحاب ليا أتنقلوا نقلة ايه من مكسبه

-ممدوح: ده أنا الي هنقلك نقلة إنما ايه عنب هريحك خالص

محدث يحوشي

تعاليلي هنا

-إلهام: يالهوي يا عيال ألحقوني

-خالد: يوووة يا بابا كل يوم خناق تعبنا منكم وزهقت أنا شخصيا

والنيعمة لأسبلكم البيت ها

- رهف: يوووه يا بابا تعالي كلم نناه فوفة على الفون الأرضي
- ممدوح: ماشي يا إلهام إتصال ماما ده شالي عنك أخلص واجيلك علشان
أنقلك النقلة الي نفسك فيها
- إلهام: إهئ إهئ انا كده مظلومة معاك و دايمًا كاسر نفسي- وسط أخواتي
وعيلتي وعمرك ما عملتي حاجة نفسي فيها
- رهف: بس يا ماما بقى بطلي عياط
اكيد بابا هيهداً ويفكر في مشروعك يا حبيبتى
- ممدوح: أيوه يا ماما أزيك يا حبيبتى وحشاني أوي
- فوقية: (ماما ممدوح)
أزيك يا حبيبي مال صوتك طالع ليه أكيد مراتك إلهام مزهقك بطلباتها
- ممدوح: مفيش يا حبيبتى أنتي وحشاني الكورونا بعدتني عنك أني اشوفك
كل يوم
- فوقية: وانت يا حبيبي وحشني موووت بس قولي مالها مراتك دي
- ممدوح: أسكتي يا ماما ده أنا مليون منها وساكت
الهانم عاوزه تعمل مشروع وعاوزه 20000 ج تدخل بيهم شريكة فيه مع
أختها سامية
- فوقية: سامية أختها الفاشلة بلا نيلة ملقتش غيرها وتشاركها
وإن شاء الله مشروع ايه ده

-ممدوح : عاوزين يعملوا مشروع أكل وطبخ منزلي كده ويوصلوا الطلبات للناس ديلفري

-فوقية : قولها تتنيل مراتك على عينها مش لما تطبخ الأول عدل في بيتها تبقى تطبخ للناس بلا وكسة

معهلش يا حبيبي بس لازم تلمها آه من الأول كده وتقولها لأ وتقول لسامية أختها خليكي في حالك وملكيش دعوة بينا

-ممدوح : حاضر يا حبيبي حلمها وهشكمها واحتمال إنقلها نقله نفسها فيها

-فوفة : نقله ايه دي مش فاهمة كلامك عموماً مع السلامة يا حبيبي

-ممدوح : مع السلامة يا ماما

-إلهام : ايوون كل شئ انكشفت وبان

أملك بتحرضك عليا أنا وأختي

أنا مش قاعدلك في البيت وهسيبه لك لغاية لما تنفذ طلباتي

اه وتعرف إن ليا أهل

-ممدوح : محدش يحوشنننني

تعاليلي بقي أنفذلك طلباتك

-إلهام : آه يا دراغي آه آه بالراحة يا دوحة آه

يا لهوووي شعري كله إلا الشعر

يا لهوووي ألحقوني يا عيال ... خالد ... رهدف

الحلقة الرابعة و الثلاثون

بعد مشاحنات إمبارح وعمایل إلهام وطلباتها الى مبتخلصش
-إلهام: كدهون يا ممدوح طب والنييعة ما مسمحاك ها وحسب لك
البيت وأروح عند ماما وأخليها تشوفي حل
-ممدوح: روجي مطرح ما أنتي عاوزة ولا اقولك خلي ماما تدفعلك ال
20000 ج ههههههههه (علشان تولع فيك وأخلص منكم أنتم الأثنين)
-إلهام: ماشي يا ممدوح ماشي
-ممدوح: ممدوح ممدوح يقطع ممدوح وسنينه السوداء والحظر الي مقعدني
في وشك ليل نهار أنتي والعيال
وبعد شوية والوقت عدى والدنيا هديت
-إلهام: بقولك مش عارفة التكييف مالة أنا مش قادرة الجو صعب مووت
-ممدوح: ماله الهباب مش لسة مغيرينه قريب
-إلهام: مش ده الثاني بتاع العيال
-ممدوح: مش مغير حاجة يولع أنا التكييف
-إلهام: مالك يادوحة هو إحنا لنا غيرك هانروح لمين يعني
-ممدوح: ايوة بلاش السكة دي معايا أنتي عارفي بضعف بسرعة
-إلهام: يعني مجد انا لسة بأثر فيك زي زمان

- رهف : ماما ماما ماما
- ممدوح : أسكتي العيال بتنادي
- إلهام: وايه يعني مش بتكلم مع حبيبي وحياتي
- ممدوح : ايوه يارهف تعالي يا حبيبتي الباب مفتوح بشوف بس التكييف
- إلهام: ايه يا حبيبتي عايزة ايه
- رهف : الفون مش عارف ماله
- ممدوح : أستني بس لما أشوف التكييف الهباب ده الأول
- إلهام: ماله الفون هاتي كده وربي
- ده واقف عند الأشعارات شكله عاوز سوفت وير
- ممدوح: يادي النصيبة شكل التكييف باظ يادي الداهية
- إلهام: أستني بس يادوحة هاتصل بالمهندس الي صلح الثاني
- رهف: صلح اية يا حبيبتي دا غيره خالص أنتي ناسيه ولا ايه
- إلهام: أسكتي يا بت متفكرهوش خلي المهندس يجي الأول)
- ممدوح : بتقولي اية يارهف
- إلهام: لا ياروحي دا بتتكلم على الفون هانعمل فيه ايه
- ممدوح :طيب أتصل بالهباب المهندس يجي يشوف التكييف الأول
- إلهام: حاضر برن عليه أهو فتح أهو
- ألووو أزيك يابشمهندس ممكن تيجي تشوف التكييف بتاعنا أصله
- عطلان

-إلهام لا مش الي غيرناه ده بتاعنا احنا الأولاني كان بتاع الأولاد
-ممدوح : خلصي هاتي أكلمه أنا
-إلهام: أستنى ياممدوح هاتيبي أمتي يابشمهندس
ماشي بكره الصبح ... ممدوح هايبي الصبح
-إلهام: ايوه جهز مبلغ بقى علشان الظروف
-ممدوح : اي مصيبة جهز أنت اخربوا وأنا ادفع كل على دماغي أنا
-إلهام: طبعاً يا حبيبي إحنا لنا من غيرك
-ممدوح : لاء بلاش الشوية دول وأنا جسمي مش خالص
-إلهام: (البت واقفة بلاش فضايح)
إلهام خلاص يارهف هاخلي بابا يودي الفون للصيانة
-ممدوح :والله ما عندكم دم أنا في ايه ولا في ايه
لا هصلح تكييف ولا هصلح فون وأولعوا بقى.. ها
إلهام: يعني بدلع وبطبطب فيك من الصبح وتنازلت عن مشروعني وأهداني
ومش عاجب كمان
ممدووووووح طلقني
بكرة نشوف آخرة ممدوح وإلهام

الحلقة الخامسة و الثلاثون

بعد خناقات ممدوح مع إلهام والولاد بسبب التكيف والفون الي باظوا

و نشوف بقى

-ممدوح : يووووه هو أنتي كل حاجة متعجبكيش تقولي طلقني

طيب ايه رأيك يا إلهام هتهف في نفوخي مرة وأطلقك وأشوف هتعملي ايه

-إلهام : أهى إهى وأهون عليك يا دوحة تطلقني وتشت الجيران فيا

-ممدوح : آه يهون عليا علشان تحرمي تقوليها تاني

وبعدين ماله الجيران ما ناس زي الفل ومبسمعش صوت لجارتنا أنغام

ولا عمرها صوتها على

-إلهام: آه قول بقى أنغام هانم جارتنا بتاعة الجروب إياه مش كده

الي حضرتك منور فيه ومانعني حتى أعمل هاهاها

-ممدوح: يا نهار ملوش شمس مفيش فايده فيك ولا في دماغك

أنغام مين يا مجنونة دي

-إلهام: بتاعة الركن البعيد الهادي .. الي بتقارني بيها على علطول

-ممدوح: أنا يا مجنونة بقارنك بيها ولا بقولك ملهاش صوت ولا بتتخانع

زيك ليل نهار ... ست هادية كده في نفسها

-إلهام : ايه بتقول ايه يا

- رھف : یووووه علی خناقتکم یا ماما لیل نھار
تعالی کلمی ناناه توحه علی الفون الأرضی
فضحوتنا واللہ مع النناات والجیران
یاررب توب علینا بقی وفک الحظر
- ممدوح : یارب یا أختی هو أنا الی حابب الحظر ده
فین أيام الکافیہ مع أصحابی ولا الواحد وهو ییلعب له ماتشین بلای سشن
ویغلب صحابه ولا أنزلی غطسین فی البسین
هییییہ کانت أيام
- إلهام : هکلم ماما وارجعلک نشوف آخرة أنغام معاک والأیام
ألو أزیک یا ماما عاملة ایه یا حبیبتی
- توحه: (ماما إلهام) عاملة ایه یا حبیبتی وعیالک وممدوح وکلکم
- إلهام: الحمد لله یا ماما هعمل ایه یعنی أدینی عایشة أهو
- توحه: مالک یا إلهام أنا لما أتصلت کنت سامعة صوتکم أنتی وممدوح
- إلهام : إهئ إهئ یا ماما بقی عصبي خالص من ساعة الحظر وکل ما نطلب
منه حاجة یزقق ویصرخ وأجبلکم منین وأرهمونی
- توحه : معهلش یا بنتی کل الرجاله کده زهقانین من الحظر والحبسة
ووقف حالهم
خدیہ بالراحه یا حبیبتی
- إلهام: منا أهو یا ماما متحملة وبدلع فیہ ومش عاجبه برضه

علطول يزعق فينا زي ما أكون أنا الي حضرته
 -توحة: معهلش يا حبيبتي كله بثوابه المهم عملي ايه في مشروعك مع
 سامية أختك جهزتي نفسك والفلوس
 -إلهام: إهئ إهئ مرضيش يا ماما وكان هيخنقني وفضل يزعق يوم
 مش عارفة أقنعه خالص
 -توحة: طيب (أنا قلت كده برضه عارفاه متبت على القرش)
 عموماً يا حبيبتي مرات أخوكي أمل هتشارك أختك في مشروعها
 عماد أخوكي أداها الفلوس وقالي أشوفك الأول ناوية ولا لأ
 -إلهام: بتقولي مين مرات أخويا إهئ إهئ ده مشروعي يا ماما وفكرتي أنا
 الي قلت ل سامية عليها تاخدها مني على الجاهز
 -توحة: عماد أخوكي قرشه حاضر مش زي جوزك (ماسك في الفلوس)
 ووافق علشان يقف جنب أختك هي دي الرجالة
 يلا يا حبيبتي مع السلامة وخدي بالك من نفسك وبيتك
 -إلهام: مع السلامة يا ماما
 ممدددح يا ممدددح
 -ممدوح: ايه في ايه علطول بتزعقي كده
 إلهام: طلقني طلقننننننني
 أستنوني بكرة ونشوف ممدوح هيعمل ايه
 هيطلقها ولا

الحلقة السادسة و الثلاثون

-ممدوح: ايه بتزعلي ليه
-إلهام: شوف بقى من الآخر كده طلقني
-ممدوح: إلهام أسكتي ولمي نفسك لأعملها وأطلقك بصحيح
أنتي باينك أتعجننتي
-إلهام: أيووه أتعجننت منك ومن عمايلك معايا إهئ إهئ
-ممدوح: بتزني ليه هو أنا جيت جنبك يا ست أنتي
-إلهام: ايوه جيت جنبي وموقفتش جنبي في مشروعى وأمل مرات أخويا
عماد شاركت سامية في المشروع بعد عماد ما أداها الفلوس من سكات
ولا تقطيم
-ممدوح: آه قولي كده بقى
طب عماد أخوكي لعبة في إيد مراته ومبيتنيش لها كلمة وعلطول حاضر
حاضر إنما أنا حمش يا هانم
ومش بتاع حاضر ولا نعمين
يرضيك دوحه حبيبك يبقى لعبة في إيد مراته
-إلهام: إهئ إهئ لأ ميرضنيش
بس برضه لازم يشوف طلباتي ومستقبلي

-ممدوح: يا هبله لما يكون معايا فلوس زيادة هخليكي تعملي المشروع لوحذك

-إلهام: بجد يا دوحة طب أحلف

-ممدوح: عيب عليكي من غير حلفان كلمتي واحدة وأنتي عارفة
بس أوعي تقولي لحد وخليه سر بينا يا حبيبتي (بالذات أمك)
-إلهام: بتقول حاجة يا دوحة

حاضر يا دوحة من عنيا

قولي بقى وست أنغام دي مالك وما لها

-ممدوح: تالاني يا إلهام مفيش فايده فيكي أبدا
-إلهام: يوووه بغير عليك يا دوحة

مغرش يعني

-خالد: ترررر الله عليكم وأنتم رايقين جوز كناريا يا ناس

-رهف: قمرات يا أخواتي وأنتم حلوين كده

-إلهام: بس يا بت أنتي وهو

هقوم بقى أجهز الاكل وأشوف هنتغدى ايه

-خالد: نتغدى كريب يا ماما نفسي- فيه من رمضان ونعمله بالفراخ

والبطاطس

-رهف: موافقة يا خالد على طلبك

-ممدوح: أعمله أنا بقى الكريب لعبتي من زمان

- رَهْف وخالِد وإِهَام : لأَ بلاش أنت حرررام
تعبنا افتاكسات وإختراعات
أه يا أنا انا من عمائل بابا وسنينه

أنتظروني بكرة ونشوف
ممدوح هيعمل الكريب
ولا...

الحلقة السابعة و الثلاثون

رهف وخالد أقنعوا باباهم ميعملش الكريب ويخلي إلهام تعمله وتتعب هي فيه

علشان يلعب معاهم بلاي ستشن

-ممدوح : يلا يا خالد جهز الماتش وأنا هكتسحك وأوريك الكرة تتلعب إزاي

بلا كريب بلا وجع دماغ

-خالد : جاهز يا بابا يلا تعالى ووريني اللعب يا دوحة هههههه

-إلهام: ممدووووح يا ممددوح ألحقني

-ممدوح: ايه في ايه

-إلهام : حنفيه المطبخ مش راضية تفتح إيدي وجعتني وأنا بفتح فيها

تعالى شوف مالها

-ممدوح: وريني كده دي متروسة خالص مين بوظها كده

روحي هاتيل المفتاح والمفك

-إلهام: مفتاح ايه يا دوحة مش عارفاه

ممدوح : يوووه أنتي خايبة كده علطول المفتاح الى كنا بنركب بيه الأنبوبة زمان

-إلهام: آه أفكرته
-رهف: ماما يا ماما
-إلهام: مالك يا بت صوتك واطي ليه
-رهف: تعالى بس أقولك حاجة
بلاش تخلي بابا يصلح الحنفية وأتصلي بالسباك فتحي أحسنلك
هيخرب المطبخ والخلاط كله يا ماما
أنتي ناسية اي حاجة بيعملها ببيوظها والخسائر بتكون كتيرة ويفضل
يزعق فينا وتتخانقوا
إلهام: أيوه يا رهف صح أبوكي ده خرابة طول عمره كل حاجة يمسكها
بيوظها وأنا خلقي ضيق وأمسك فيه وفي الآخر نجيب الي بيصلح الحاجة
والي يتصلح بقرشين بنصلحه ب 10 قروش بسبب افتكاساته
هلحقه وأقوله هكلم فتحي السباك
شاطرة يا بت فكرتيني
علشان تعرفي طيبة قلب أمك بتنسى أي حاجة
يا عيني عليك وعلى طيبة قلبك يا إلهام
-رهف: الحق يلا بسرعة
-إلهام: دوحة يا حبيبي بلاش أنت تعمل الحنفية وتتعب هكلم فتحب
السباك

الحلقة الثامنة و الثلاثون

ممدوح ضرب الحنفية بالمفتاح وهوب المية ضربت وغرقت الحوض وعمالة
تضرب في كل حطة ... و

-ممدوح : إلهام ألحقي المحبس بسرعة

-إلهام : يا لهوي من عمایل جوزي

ماقلتلک يا دوحة هتخربها مصدقتنیش

-ممدوح : إقفلی یلا بسرعة وإخلصي قبل ما الشقة تغرق

-إلهام : حاضر أهو بقفله (جوزي خرابة عمره ماعمل حاجة ونفعت)
قفلته خلاص أهو

-ممدوح : يا ساتر مش عارف مالها الحنفية دى ايه جرى لها

أخذ نفس ومش هسيبها غير أما أصلحها

-إلهام تعالی إعمليلي كوباية شاي مزاج كده علشان أشتغل

-إلهام : هعملك الشاي يا حبيبي بس والنبي سيب الحنفية هكلم فتحي

السباك یجى یكمل هو (أهو خربها وعلى رأي البت رھف الحاجة الي كانت

هتتصلح بقرشين هتتصلح ب 10 قروش)

-ممدوح : لا ممكن أبداً أنا الي هصلحها بقولك وسعى كده

-إلهام : بلاش يا ممدوح خلي اليوم يعدي ومنتخانقش مرة واحدة

- ممدوح: يوووه جينا بقى للنكد وكلامك الي ملوش لازمة
- خالد: بابا يا بابا موبايلك عمال يرن عمو مصطفى شريكك بيرن عليك
- ممدوح: مصطفى أنقذك مني أخلص منه وأرجع للحنفية
- إلهام: ماشي أنا الي غلطانة زي كل مرة
- رهف: ماما إلحقي كلمي فتحي السباك بسرعة قبل بابا ما يجي تاني
- إلهام: صح يا بت يا رهف ... هاتي الفون أكلمه
- ألو أيوه يا عم فتحي عاوزاك والنبي تيجي تشوفي حنفية المطبخ
- ماشي مستنياك أهو
- ممدوح شغال يتكلم في الفون ونسي الحنفية وفتحي السباك وصل البيت
- و....
- فتحي السباك : ايه ده يا مدام ايه الي كسر الخلاط كده
- إلهام : خلاط ايه بس الي أتكسر دي الحنفية بس الي باظت ولا القلب
- شوف كده تاني
- فتحي السباك : يا مدام بقول لحضرتك حد خبط الخلاط كسره نصين
- ألا هو مين الي خطبه كده
- إلهام : يادي الوقعة السوداء والخلاط ده بكام يا عم فتحي
- فتحي السباك : معاك من 400 ج وطالع
- إلهام : يا لهووي ماله غالي كده ليه ... مفيش أسعار حنينة عن كده

-فتحي السباك : يا مدام ما أنا بقولك في ب 400 صيني
-إلهام: (صيني كمان مش كفاية كورونا والحظر وقعدة ممدوح المهيبة في
البيت)

-فتحي السباك : بتقولي حاجة يا مدام
-إلهام : مبقولش ده أنا بكلم نفسي
ثواني أجيب لك الفلوس

ممدوح يا حبيبي عاوزة 500 ج للسباك علشان انت كسرت الخلاط
-ممدوح : 500 ايه يا هانم ... مش قلتلك متكلميش حد
أهو أنتي بقي بتجيبني النكد لنفسك
-إلهام : دوحة يا حبيبي عيب كده السباك بره وعاوز الفلوس وبعدين أنت
الي كسرتة كالعادة يا دوحة

هات الفلوس من سكات وبلاش فضايح
-ممدوح : فضايح ده أنتي لسه هتشوفيهها أصبري عليا
خدي الفلوس أهو ... بس مخصومة من مصروف البيت لباقي الشهر
-إلهام : يا لهوووووي يا أناااا من جوزي وعمايه
ومن الحظر وافتكاساته

أستنوني بكرة ونشوف الحظر وعمايه مع ممدوح وإلهام

الحلقة التاسعة و الثلاثون

بعد مشاحنات و حبة مشاجرات
 وإلهام غلبانة و من الحظر شقيانة
 هدت ممدوح وجبرت بخاطره
 والحمد لله ركب الخلاط والدنيا تمام و
 -إلهام: ممدوح .. ممدوح.. ممدوح
 -ممدوح: خير .. خير في ايه
 -إلهام: الأنوبة على وشك والاستبن خلصان وأنا عاملة صواني باشميل
 وبطاطس
 -ممدوح: حطيها في فرن البوتجاز ما أحنا عندنا غاز
 -إلهام: فرن البوتجاز بايظ وأنا شغالة على الفرن ده
 -ممدوح: طيب اعمل ايه أنا دلوقتي سايباها فاضية ليه
 -إلهام: (ما أنت مش هنا ولا دريان)
 وبتاع الأنابيب مجاش علشان كورونا
 -ممدوح: آمال كنت بتغيريها ازاي
 -إلهام: جوز جارتنا هههه عارفه
 -ممدوح: أيوه لخصي ههههه ... أي جوز فيهم بالظبط

ولعلمك بقى جارتنا هي الي بتيجى تاخدها مش جوزها
أنا كنت بغيظك
بس أنت طلعت بتشك فيا
إهـى إهـى إهـى
مدوح طلقنننني

الحلقة الأربعون

بعد مشاحنات وحبة فستاكنات من إلهام وآه ياني بتشك فيا يا مجنون
ومصالحات وبشتكنات من ممدوح
أتصلحوا الحمد لله و.....

-إلهام : صباح الفل يا حبيبي إصحي بقى عملتلك الفطار بقينا الظهر
-ممدوح : صباح الخير يا حبيبتى
أكبيد مصحيانى بدرى كده عاوزة طلبات من برة وكالعادة العيال نايمين
ومفيش غيري الي شقيان

-إلهام : بدرى ايه يا راجل ده أحنا الساعة 1 الظهر والعصر داخل علينا
-ممدوح : ما يخش ياستي أهو الأيام شبه بعضها ولا مستعجلة على الغدا
ليه يعنى ما أحنا أهو متهبيين فى البيت
-إلهام : ماهو أنا أصلي نازلة رايحة ل سامية أختي اقعد شوية معاها أفك
عن نفسي يا دوحة

-ممدوح : أيوه يا أختي فكي عن نفسك وجيبلنا كورونا معاكي
العيال عيالها بيخرجوا ويسهروا بره ولا مراعيين حظر ولا زفت ولا أبوهم
كمان مصيبة تانية كل يوم يسهر مع أصحابه بره البيت
أكبيد حد فيهم هيجيب كورونا معاه

مفیش روح لأختك بقولك ولا هي كمان تيجي
 خلي الحظر يعدي على خير ويسترها معانا ربنا
 -إلهام : يوووه أنت كده دايماً قهرني نفسياً إهـئ إهـئ وكاتم حريتي
 الموضوع مش كورونا يا حبيبي ولا عيال اختي وجوزها
 دى غيرة رجالة آه أنا عارفها
 -ممدوح: أصطبجي وقولي يا صبح غيرة مين يا أختي الي بتقولي عليها دي
 فوقك كده وخدي بالك لكلامك لا والله أطلع الحظر عليك من أول اليوم
 ها

-إلهام : إهـئ إهـئ أنت كده لما تتزق ومتعرفش ترد
 تيجي عليا وتقولي أعمل وأسوي
 -ممدوح : مردش على ايه يا هانم وايه الي زنقني يا أختي... ها ما تردي
 -إلهام : علشان أنت إهـئ إهـئ مخلتنيش شاركتها في مشروعها
 وأنت من يومها حاططها في دماغك هي وجوزها وأخويا ومراته كمان
 -ممدوح : طب لمي يومك على الصبح ومش فطران يا إلهام ولا نازل أجيب
 طلبات وهتخمد أنا وإياكي أسمع صوتك
 وكمان مفیش نزول ليكي فاهمة
 -إلهام: لأ مش فاهمة ها و.....
 -خالد: يوووه على الصبح خناقات
 حرام عليكم بقى ... صوتكم صحاني من النوم .. يقطع الحظر وسنينه

صدق المثل الي قال (تعرف أمك وأبوك لأ جربهم في الحظر يا معلم)
-ممدوح: أمك دي خميرة عكننة يا أبني .. شيء كده يخرجك من شعورك
قال بغير من أختها وأخوها قال
-إلهام: ماشي والنيعمة منا قاعدة لكم فيها ورايحة ل ماما و
-ممدوح : يوووووه روجي مطرح ما تروحي ... ها
-خالد : يوه يا بابا روق كده يا حبيبي وأنا هجهزلك فطار ملوكي ونفطر
سوا كده راجل ل راجل بلا ستات بلا هم
-ممدوح: ايه طقم الحنية ده مش مرتاحلك يا ض يا خالد
عموما فطرني مكان أمك الي غضبانة علطول دي
خالد عمل فطور ملوكي وكوبيتين شاي في الخمسينة و
-خالد: بقولك يا بوس
-ممدوح: قول هات ما عندك ماهو يوم باين من أوله
-خالد: بص بقى أنا عاوز أجيب عربية وسألت وعرفت ممكن.
-خالد: اي اي يا عيني
آه الحقيني يا ماما اي
طب استني اسمعني طيب
اي اي حكملك الموضوع
أقولكم أستنوني بكرة
ونشوف هيبج

الحلقة الواحدة الأربعون

ممدوح المرة دي هو الي بيقول ياني من عيالي ويااني من الحظر وعمايه و..

-ممدوح : بتقول ايه ياواد عربية

ده الي ناقص كمان

والنيعمة منا سايبك تعالالي هنا

-خالد: يا ماما يا ماما انا الحقيني

اي اي مجاش فيا الشبشب ههههه

مبتعرفش تنشن يا بوس

-إلهام: في ايه

ايه الصوت العالي والحناق ده يا سي زفت خالد مش عارفة أنام منكم في

الحظر ده

-خالد: ماشي يا ماما بتألشي عليا

ألشي ألشي براحتك

منا وقعت في إيدين من لا يرحم

-إلهام: مش عاملي 7 رجالة في بعض وأحنا نفطر سوا وبا بوس والستات

منكدة علينا

إشرب بقى يا خلودة هههههه

-خالد: اي اي بلاش الشبشب يا ماما أهو رشق في راسي

آه يا دماغي نشانك عمره ما يفلت

خلاص يا ستي حقك عليا إحضرينا بقى يا ماما والنبى

-إلهام: حرمت ياواد وعرفت قيمة أمك

خالد: آه عرفت

أمك

مدوا بهم أثنين

ضحكنا بقى وأتضربت منكم نتكلم جد يا جماعة

-ممدوح: جد مين ياواد إمشى من وشى لأخلى يومك أسود زي شعر أمك

إلهام: نعم نعم يا سي ممدوح مالك بقى بتتلزق في أمه ليه وفي شعرها

أمه مخصماك

إبعد عني بقولك

-ممدوح: وهو أنا جيت جنبك يا هانم ولا

-خالد: يا ناس إرحمونى بقى واسمعونى أبوس إيديكم وإهمدوا شوية وكفاية

خناق أنتم الأثنين مع بعض طول اليوم

-ممدوح: إخلص يا سي زفت عاوز تقول ايه بس والنيعمة ما تعيد كلامك

لا حتلاقي الكمودينو رشق في نفوخك

-خالد: طيب أمرى لله

بص يا بوس

-ممدوح: إتلني يا إلهام وسيبيني أكلم الواد
تعالى يا خالد نتكلم في أوضتك أحنا رجالة زي بعض ونبعد عن الإعادي
-إلهام: بقيت إعادي دلوقتي إهئ إهئ عموماً تشكر يا دوحة أنت وإبنك
حقيقي آخرة خدمة الغز علقه

من الحظر وسنينه
وعمايل ماما وبابا

الحلقة الثانية والأربعون

-ممدوح: نعم يا أخويا
 إخلص يا واد يلا وقولي عاوز ايه
 -خالد: شوف يا حبيبي أحنا هنشتري سيارة أهو مقلتش عربية علشان
 الحساسية الي عندك
 ممدوح : ها
 -خالد: هنجبها بالقسط من بنك ناصر بيقدم قروض لكده والضمان عندك
 يا بابا محل البلاي ستشن أو الأرض الي أنت شاريها
 -ممدوح: عال عال ده أنت دارس الموضوع كويس ومجهز الملف أهو
 أنا مش موافق يا سي زفت وأرتاح بقي
 ده الي ناقص كمان عربية وأقساط هو أنا عارف أأكلكم من كورونا
 الزفت دي ولا أصرف عليكم
 يا أبني أنت مش حاسس بحاجة ما أنت زي أمك بتاكل من أتية محلولة
 -إلهام: مين بيحب سيرتي ها
 أدي الشاي أهو وأنا داخله المطبخ
 وهغزى الشيطان
 -خالد: خير ما عملتي يا ماما
 بص يا بابا يا حبيبي أنت مش هتدفع أقساط ولا حاجة
 -ممدوح : نعم يا أخويا إمال ايه هناخدها ونهرب

-خالد: لأ يا بابا هنعمل بيها مشروع هنشغلها أوبر وندفع منها أقساط الشهر للبنك والباقي ينفعنا وأنا دارس المشروع كويس وحسبته بالساعة وهشغلها كام شفت وكده

ما هو يا بابا لو تهدي شوية هشرحلك الموضوع بالورقة والقلم

-ممدوح: إمام هو مشروع كويس في اليومين الهباب دول أول مرة تفكر صح يا واد

-خالد: إحم إحم شفت بقى يا بوس وأنت هادي حلو إزاي

-ممدوح: مبدئياً أنا موافق لحد ما أدرس الموضوع من جميع الجهات

-خالد: حبيبي يا بوس يا قمر أنت هجهزلك كل الاوراق وهعملك دراسة جدوى للمشروع كله

-ممدوح: دراسة جدوى كمان (ده بين العيال كبروا في الحظر وأنا مش دريان) هيبج

-رهف: بابا يا بابا

-ممدوح: ايه داخله زي القطر كده ليه من غير صباح الخير حتى (طالعة لأأمك مندفة)

-رهف: صباح الخير والسعادة

وهطنش على الجملة الأستهزائية الي قلتها لنفسك ها

-ممدوح: طيب

-رهف: يرضيك يا بابا بنتك حبيبتك تبقى أقل من صحابها ويغيطوا فيا

- ممدوح : ليه عاوزه عربية أنتي الثانية
-رهف : لأ مش طموحاتي خالص
انا طموحاتي أكبر من كده عاوزه أشرفك يا حبيبي وأحقق لك أمنياتك
-ممدوح : ومال أمنياتي وصحابك
-رهف : بص بقى صحابي حولوا لإمريكن وأنا عاوزه أحول زيههم
-ممدوح : يا لهوووووي يا أني من عيالي والحظر وكورونا
محدث يمسكني ولا يحوشني
تعال لي هنا

الحلقة الثالثة والأربعون

ممدوح الحظر عامل عمايله معاه
وولاده كمان قايمين بالواجب
والهام كمان يوووووه مضبطاه ... و.....
-ممدوح : أمريكن أيه يا أم أمريكن أن شاء الله
ده أنتي عديتي أخوكي وأمك بمراحل والله منا سايبك يا رهف
-رهف : يوووه يا بابي كله ألا أنا آه
-ممدوح : ليه إن شاء الله الأميرة ديانا حضرتك
-رهف : لأ يا بابي أنا رهف
وبعدين متخرجش في مواضيعي الحياتية الجادة
-ممدوح : حياتية كمان وجادة
لأ دي مواضيع ميتسكتش عليها
إلهام أنتي يا هانم تعالي هنا شوفي بنتك
-إلهام: في ايه صوتك مالي العمارة
الجيران يقولوا ايه علينا كده كل يوم
-ممدوح: مش هيقولوا حاجة يا أختي هما كمان صوتهم عندنا والحال من
بعضه وحظر ودابير على الجميع

تعالى شوفي بنتك وعماييلها أنا خلاص مش متحمل

-إلهام: في ايه يا رهف

ماله بابا صوته طالع ليه

-رهف: مفيش يا ماما ده أنا يدوب بقوله صحابي حولوا لأمريكن وعاوزة

احول زيهم عمل زي ما إنتي شايفة كده

-ممدوح: شفتي سيبيني عليها يا إلهام

إوعي كده بقولك

-إلهام: أستنى كده يا دوحة بس نفهم منها والي عاوزة أعمله

قولى يا رهف ودي ايه كمان

-رهف: يا ماما يا بابا دي ثانوية إمرىكية في مدرسة جود الأنترناشونال

الى جنبنا هنا هحول لها من السنة الحاية زي صحابي ما عملوا و....

-ممدوح: نعم يا أختي ح

هتحولي كمان يا سلام وخدتي القرار كمان

سيبينى عليها يا إلهام بقولك

ما هي تربيتك يا هانم بانث أهى

ايه

مكنتش فاضي لكم الأيام الي فاتت والحظر بين كل حاجة على حقيقتها

-إلهام: لأ بقى يا سي ممدوح

مالها تربيتي بقى ولا حاجات ايه الي بانث دي

ده أنا بيحلفوا بتربيتي لولادي في كل مكان
-ممدوح : مين دول الي بيحلفوا والنبي أسكتي على خيبتك القوية
ولا علشان ولاد اختك سامية فاسدين ومطلعين عين أمهم
-إلهام : وليه نروح بعيد يا حبيبي ما تشوف عيال أختك إعتدال ولا بلاش
أتكلم ربنا ستار
-رهف : يوووه يقطع الحظر وسنينه كل يوم تتخانقوا وتقطعوا بعض
حرام عليكم يا ناااااا مستقبلي هيضيع وأنتم بتسيحوا لبعض
عيال أختك وعيال اخته
-ممدوح: نعم يا ست رهف بتألشي على إمك وأبوكي
طيب تعالي بقي وأوريكي التسييح على أصوله
-رهف: آه آه يا عيني
سب شعري طيب
آه آه يا مامي
الحقيقي طيب
-إلهام : آه يا اااا من جوزي وعمايله وعايلي وبلاويهم
أستنوني بكرة ونشوف

الحلقة الرابعة والأربعون

ممدوح وإلهام مسكوا في بعض كالعادة نعمل ايه الحظر وسنينه
 يوووة وجة حبشكنات و.....

-رہف : یووووة بقى يا بابا

اي اي سيني أفهمك بقى

دي مش طريقة حوار متحضر مع أنسة زي

-ممدوح: کمان انا همجي يا رھف

عال دي ڪملت اوووي

شوفتي تربيتك يا إلهام

-رهف: یا بابا یا حبیبی اُسمعنی وبلاش خناقات مع ماما

لو معجبكش كلامي خلاص

-إلهام: خلاص يا ممدوح حبة هدؤ نسمع البنت ونكمل خناق بعدين

-ممدوح : ماشي يا هانم أترى أنتي كمان

ما البنت طالعة لك

-إلهام : أنا ااااا ال.....

-رهف : أستوب بقى والنبي يا ماما سيبينى اتكلم أبوس دماغك يا حبيبتي

وبلاش تردي عليه

- إلهام: علشان خاطرك بس هسكت أهو
إتكلمي بقى خيلنا نخلص وأشوف الي ورايا
-رهف: بص يا حبيبي مش أنت نفسك أدخل كلية طب
-ممدوح: لأ نفسي تدخل صيدلة بدل أخوكي الموكوس الي في تجارة
-رهف: ماشي يا حبيبي صيدلة
الإمريكن يا بابا فيها 6 امتحانات في السنة يعني عندي 12 امتحان في
سنتين أجيب بيهم مجموع الصيدلة وهدرس يدوب 3 مواد بس
-ممدوح: عال عال نظام حلوايه المشكلة بقى
-رهف: حضرتك المشكلة يا بابا أول ما سمعت أمريكن ومسكت فيا أنا
وماما
-إلهام: أنا ساكتة أهو وحاطة لساني في بقي
-ممدوح: هاتي الأخر يا رهف
المصاريف كام؟
-رهف: 75000 ج يا حبيبي
-ممدوح: آه في ال 3 سنين ثانوي صح
زي مدرستك كده الي أنتي فيها
مش فارقة خالص والله

- رھف : لأ يا بابا ال 75000 في السنة الواحدة ده غير كل محاولة هتدفع

500 ج بس

ونوفر الدروس الخصوصية

- ممدوح : في السنة صح و 500 بس

آه بسيطة خالص

إلهام تعالي على جنب كده لحسن الكمودينو تجي فيكي

محدث يحوشني ولا يمسكني

آه يا أنا انا من الحظر وعمايله

أستنوني بكرة ونشوف

الحلقة الخامسة والأربعون

بعد مناقشات وخرافات ممدوح ورهف وموال الأمريكن دبلومة ... و....

-رهف : حرام عليكم مستقبلي هيضيع

-ممدوح : ده مستقبلي أنا الي هيضيع لو دخلتك يا مفترية

مالها الثانوية العامة ها

ده حتى خلوها سنة واحدة مش زي أخوكي سنتين

-رهف : اي اي كنت هدخلك صيدلة بسهولة

-ممدوح : إمشي يا بت من وشي مفيش أمريكن ولا نيلة

هو باين مدارس من أصله السنة دي من الكورونا والحظر

كده كده أديكي في البيت وهتتعلمي أونلاين زي الأمريكن بالظبط بس

أنتي أتعبي شوية وذاكري وإفليجي

-رهف : ماشي يا بابي بس هأخذ دروس في كل المواد وهخربها

أي أي جات في وشي المخدة

الوقت عدى وإلهام جهزت الغدا وممدوح أتعدى وأتظبط وهوبه

-ممدوح :أنتي ياهانم يا هانم أنتي فين

-إلهام :نعم ياروحي مالك مش قولت هتنام شوية

-ممدوح : هو خالد فين مش سامع صوته

-إلهام : خالد نزل لاصحابه
 -ممدوح : نعم نعم ياروحي الي هاتطلع منك ومن عيالك
 -إلهام: مالك بس مش عارفة لما بتنام بتقوم غريب (ياريت ماتنمش
 خالص)

-ممدوح : بتقولي حاجة على صوتك
 -إلهام: لاء يا حي بكلم نفسي
 هاتصل به دلوقتي عشان يرجع
 -ممدوح : أنتي عارفة الساعة كام داخله على 10 وأنتي مش عارفة إن في
 حظر وهباب

-إلهام: يووووه عيالك عندك أنت حر معاهم هو في حد بيعبرني
 أنت أبوهم أنت حر معاهم

-ممدوح : هو كل ما أكلمك تعمي الأسطوانة دي
 -إلهام: أنت الي كل شوية تعمل حدوتة وعمايز تجر شكلي وخلاص
 -ممدوح : جرس الباب بيرن روحي افتحي الباب
 -إلهام: مش رايحه ... ها

-ممدوح : هافتح أنا أصل في غبي هايولع في الجرس
 مين ايوه

حسام : (صاحب خالد)

-ممدوح : خير يابني هاتولع في الجرس
-حسام : أسف يا عمو أصل خالد شد في الكلام مع الضابط شوية واخده
القسم

-إلهام: بتقول ايه ماله خالد
-ممدوح :شوفتي تربيتك يا هانم
-إلهام: هو ده وقته
خناقات قدام الواد الغريب كمان
ما تشوف أبنيك حصل له ايه
يووووة مش هنخلص من ممدوح وعياله

أستنوني بكرة

الحلقة السادسة والأربعون

خالد وافتكاساته وحبشتكناته
 هنقول ايه ما هو ابن ممدوح و.....
 - حسام : بسرعة ياعمولسة البوكس على أول الشارع
 - ممدوح : يالا بسرعة نلحقه
 - إلهام: رايح فين يا ممدوح غير هدومك الأول يا حبيبي
 - ممدوح: ربنا يدوخكم زي ما دوختني أنتي وعيالك
 - إلهام: أنا برضه الي مدوخاك ماشي يا دوحة مش وقته خالص
 أنا هكلم ابن خالتي يلحقنا على هناك
 - ممدوح : لاء مش عاوز حد وبذات ابن خالتك ده يا هانم
 مش قولتلك ماتكلميش ابن خالتك ده خالص
 - إلهام : يووه وقت غيرة ده يا حبيبي
 هخلي رهف تكلمه في الفون
 إرتحت كده
 يوووه بعد مشاحنات وممدوح وتحكمات وحبّة غيرة وتشنجات
 خالد رجع البيت و.....

-إلهام: شفت يا حبيبي لولا محمد ابن خالتي أتدخل كنت دفعتلك 4000

جنيه غرامة دلوقتي

الحمد لله هو و الظابط طلعا معرفة ومعملش محضر للولد

-ممدوح: أنا كنت هاخلصها بطريقتي يا هانم

-إلهام: والنبي دي مش اكلة هاتفتكس فيها (زي عوايدك)

ممدوح: بتقولي ايه سمعيني كده

-إلهام: بقولك يا حيااتي أنت الخير والبركة بس المهم إن خالد متعملش له

محضر وخرج (كنت هتدبجنا لو دفعت 4000) كنت هاتسكت خالص

-ممدوح: أنا مش عارف أنتي بتكلمي نفسك كثير اليومين دول

-إلهام: يعني هو الي بيحصل ده من امبارح مش يجنن

-ممدوح: بصي علشان نبقى على نور آخر مرة تتصلي بابن خالتك ده تاني

وتطلبي منه مساعدة

فاهمة ولا رهف ولا زفت لا والله أنتي عارفة هنيل ايه

-إلهام: تاني ياممدوح مفيش فايدة

-ممدوح: ايوه أنا مش برتاح له وأنتي عارف السبب

-إلهام: لاء مش عارفة

ده ابن خالتي ومش ها أقطعه مش كفاية عيلتك كلها أنت قطعتهم

وانا مش مستعدة أخسر عيلتي

-ممدوح: يعني بتتحديني طيب أنتي حرة بقي وأنا حذرتك
 -خالد: يعني كل يوم خناق مش عارفين نرتاح في البيت ده
 -رهف: احنا هانسييلكم البيت ده ونروح عند نناه
 -إلهام: عيشة مايعلم بها إلا ربنا
 -ممدوح: بتقولي حاجة سمعيني
 -إلهام: وأنت مش حافظ الا الكلمة دي ومركز معايا وكل شوية تتخانق
 معايا ومطلع عليا الحظر لوحدي
 وإهئ إهئ عاوز تتحكم فيا وتحبسنى وتبعدني عن عيلتي
 دي عيشة لا تطاق
 -ممدوح: أيوه أنا كده لا اطاق ووريني هتعملي ايه
 -إلهام: إهئ إهئ
 ممدووووح طلقني بقولك
 استنوني بكرة ونشوف أخرة الحظر وعمايله وإلهام الغلبانة ياااني

الحلقة السابعة والأربعون

ممدوح صالح إلهام

واللهام ست مصرية أصيلة مستحيلة جوزها في حضره و.....

-ممدوح : صباح الخير يا حبيبي قومي بقى بطلي كسل عملتلك فطار

ملوكي يستاهل بقك يا قمر

-إلهام : بتقول ايه عملتي فطار

يا هوووووي تبقى عملت عملة منيلة ولا ناوي تتجوز عليا ومستني

موافقتي إهئ إهئ

-ممدوح : يا دي النكد الي عايشة فيه وفي الآخر أطلع أنا الي مفتري

وبتحكم فيكي، سديتي نفسي على الصبح يا خميرة العكننة، والله ما طافح

-إلهام : إهئ إهئ أنا خميرة عكننة برضه ولا أنت الي أمورك مريبة

-ممدوح : يا هووووه يا ناااس ألحقونا، تعالوا شوفوا مراقي المجنونة

-رهف : في ايه على الصبح، مالكم يا بابا بتعطي ليه يا ماما

-خالد : هو ايه النكد بدأ بدري ليه لسه قدامه ساعتين

-إلهام : بتتريق يا سي خالد ما أنت طالع لأبوك إهئ إهئ ملكيش حظ في

عيالك يا إلهام

-رهف : مالك بس يا ماما في ايه يا حبيبي

عملت ايه يا بابا وزعلتها على الصبح ليه (ده اليوم لسه بدري على النكد
على رأي الواد خالد)

- ممدوح : أحضروني يا عيال وأشهدوا عليها علشان لو دبحتها دلوقتي
محدث يمسكني بقولكم أهو ... يا أيامك السوداء يا ممدوح مع الست
المجنونة دي ... فك الحظر بقى يارب

-خالد : صلي على النبي يا بابا
إهدي والنبي يا ماما وأحكونا ايه الي حصل

-إلهام : إهئ إهئ و.....

- ممدوح : أتكتمي أنتس أنا الي هتكلم بصوا يا عيال أنا صحيتها من النوم
وجهزت لها فطار ملوكي وقتلتها قومي يا حبيبتى عملتلك الفطار وعينك
ما تشوف إلا النور قعدت تصوتي وتصرخ ولتكم عليا

-خالد ورهف : بس يا بابا ده الي حصل

- ممدوح : والمصحف آه

-خالد ورهف : صح يا ماما الكلام ده

-إلهام : إهئ إهئ ايوه

-خالد ورهف : يا لهوووووووي يا أنااااا من الحظر وعمايله

إهئ إهئ

استنونا بكرة ...

الحلقة الثامنة والأربعون

صبح الصباح فتاح يا عليم ويوم جديد تاني من الحظر و.....

-إلهام : بص بقي أنا مسافرة ومش قاعدة لكم تاني

ممدوح : يعني ايه مش قاعدة تاني

اتجننتي على الصبح

الناس تصحى تقول صباح الخير الأول

-خالد : اية يابابا مش قادر أفتح عينيا صوتكم مسمع الدنيا

- إلهام: روح نام مش ناقصاك أنت كمان

-ممدوح : شوفت الرد على الصبح أتفرج بقي على النكد الصباحي

-خالد :خير ياماما مالك على الصبح

-إلهام: انا مسافرة عند أختي أمال اتخنقت من القعدة ومن الكل

-ممدوح :شوفت بقي الكلام الي يفور الدم والأسلوب

- إلهام:ايوه انا كده ومش مستحيلة مسافرة يعني مسافرة

-رهف: والله أنا تعبت منكم مش عارفة أنا مومين عاوز يسافر في الأيام

المهيبة دي

- إلهام: هو أنتي كمان يامفعوصه هاتتكلي

- رهف : أنا ياماما مفعوصة ميرسي ياماما والله لاروح أنام يكش تولع الدنيا ها

- ممدوح: عجبك كده حتى البنت بتتكلم زيك وبإسلوبك
خالد: انا زي الاطرش في الزفة مش فاهم حاجة خالص
- ممدوح: ماما عايزة تسافر عند خالتك في الغردقة وتغير جو والدنيا متهبه كورونا

ومش ناقصة هي مناعتها ضعيفة ومش مستحمة
- خالد: شوفتي يا حبيبتي بابا خايف عليكى إزاي
- إلهام: مليش دعوة أنا مش صغيرة وبعرف اتعامل إزاي واخد الاحترازاات
كويس

- خالد : ياماما بالعقل كده هو ده وقت فسح وغيره
طيب إحنا بقى نعمل اية نطق إحنا كمان يا حبيبتي
ما كلنا في الحظر سوا
- ممدوح : كده هاتعملي فتنه في البيت (ومش هعرف اسيطر على العيال
هايعملوا زيك)

- خالد : صوتك واطي لية يا بابا مش عايزني أسمع ايه
- ممدوح: هو أنا اتكلمت بهزر مع ماما وبقولها مانقدرش نستغني عنك
ولا يوم

- إلهام: أيوه اضحك عليه زي كل مرة

وهو أنا محكوم عليه مؤبد اكنس وامسح وأطبخ وأطبب وخلاص
حتى أشياء مش عارفة أعملها
وكمان بتنكد عليا ليل نهار
- ممدوح : أنا برضه الي بنكد عليكي بدمتك يا شيخة
ده أنا عملتلك فطور ملوكي إمبراح فضحتني عليه
- إلهام : ما هو من سؤ نواياك يا دوحة
طيب خلاص شوف الفون بتاعك بيرن
ايه ده وريني كده مين بوسي دي
إهئ إهئ
ممددددودح طلقنننني
طلقني بقولك
يووووة استنوني بكرة

الحلقة التاسعة والأربعون

- إلهام شافت رنة الفون بتاع ممدوح وهوبة نشوف
 -إلهام : مين بوسي دي رد يا بيه على الفون قدامي ولا أقولك طلقني أحسن
 ولا هات هفتح أنا
 -ممدوح : تيه في ايه يا هانم دي بوسي الي كانت ماسكة محل البلاي ستشن
 أنتي نسيتي ولا ايه
 -إلهام : رد عليها قدامي يا رميو
 -ممدوح : لا ده أنتي أتعجنتي خلاص ولا أقولك سافري عند أختك هدي
 أعصابك وأرتاحي (وريحي)
 -إلهام : آه عاوزني أسافر علشان يخلى لك الجو طبعاً
 مش مسافرة يا بيه ووريني الفون ده أنا هرن عليها وتكلمها قدامي
 -ممدوح : طيب عند على عندك مش طالباها ها ووريني هتعملي ايه
 -خالد: يوووه يا ماما عيب عليكي تعملي كده وأنت يا بابا أهدي شوية
 وبطلوا خناق حرام عليكم مش كل يوم
 -رهف : أنا كرهت الحظر ده يارب
 نفسي أطفش بقى منهم
 -إلهام : تطفشي يا زفته وأنت كمان يا زفت

ده تلاقيه متجوزها عرفي الهانم بوسي دي وأنا نايمة على ودني
 -ممدوح : عيب يا إلهام الكلام ده قدام العيال وأتقي الله يا وليه هو أنا بخرج
 من البيت خالص هتجوزها أمتي دي
 -إلهام : ما أنت متجوزها من زمان قبل الحظر والهانم مش قادرة على بعدك
 وبتتصل بيك إهه إهه وأنا يا عيني عليا فانية نفسي- وشبابي في خدمتك
 أنت وعيالك

-خالد : يا ماما إهدي بس وأحنا هنعرف مالها بوسي الزفت دي
 -ممدوح : عيب يا واد وأتلم خالص وخذ اختك يلا وأدخلوا أوضكم
 -رهف : يوووه بقي أحنا تعبنا وقرفنا بقي منكم (توب علينا يارب من
 الحظر)

-ممدوح : عيب عليكي وأتلمي بقولك في يومك الي مش فايت ده
 -إلهام : مردتش عليها ليه وهي بترن عليك ها
 علشان طبعنا الغلابة أنا الغفلة واقفة جنبك
 بس ربنا مبيرضاش بالظلم وكشفك ليا
 -ممدوح : أستغفر الله العظيم صبرني يارب على الست دي
 يا هانم أنا مردتش علشان بنتخانق وصوتنا عالي عاوزة تفضحنا كمان
 قدام الناس الي بتشتغل معانا
 -إلهام : أنا برضه ال الي لي بفضحك ولا عمايلك يا سي دوحه

من يوم ما أتحظرنأ وأنت مقضيها إشي جروبات مع الستات وإشي الست
أنغام جارتنا وجارة جارتنا، وانا أقول معهلش يا بت محظور وبيفضفض
سيبيه ميضرش ومتجيش عليه، هتبقى أنتي والحكومة إهى إهى
إنما توصل لجواز ده الي مرضهوش أبداً .. طلقني بقولك إهى إهى
-ممدوح : يا ست إتقي الله وأتهدي بقى عيب عليكي
-خالد : بابا يا بابا ... خد كلم بوسي بترن على فوني وعاوزاك
-إلهام : شفتوا مش قادرة على بعده الهانم
-ممدوح : إوعي كده من وشي ... ألوايوه يا بوسي ... الحمد لله
خير في ايه ... بتقولي ايه ... يا نهار أسود
طيب أقفلي مع السلامة أنا جايلك بسرعة
-إلهام : في ايه مالها الهانم طلعت حامل
ممدوح : إبعدي عن وشي لأقتلك يلا يا خالد ألبس بسرعة وتعالى معايا
نشوف المصيبة دي
خالد: في ايه يا بابا
-ممدوح: المحل ولع الكهرباء ولعت في أوضه منه
-إلهام: يا لهوووووووي من الحظر وعمايله
استنوني بكرة ونشوف آخرة إلهام وممدوح

الحلقة الخمسون

ممدوح نزل وشاف المحل والحمد لله الخسارة مش كبيرة
والهام يا عيني رقبتهأ أد السمسة و.....
-إهام : دوحة يا حبيبي قدر ولطف الحمد لله
متزعلش يا حبيبي
ممدوح : خلاص نسيت يا إهام والحمد لله الخسارة قليلة يدوب الستارة
ولعت والدنيا أتلحقت
-إهام: بقولك يا دوحة ما تيجي كده نكسر الحظر والروتين يا حبيبي
-ممدوح: ايوه يعني نعمل ايه
-إهام: تعالي نخرج نتمشى شويه أهو نغير وشوش وأماكن
-ممدوح: هنخرج فين كل الأماكن مقفولة والدنيا حر والشمس سخنه
خلينا في البيت وخلاص
-إهام: طيب يا حبيبي الي تشوفه
-رهف: بابا كلم نناه على الفون الأرضي
-ممدوح : الو ايوه يا ماما أزيك يا حبيبي وحشتيني والله
-فوقية: وأنت يا دوحة يا حبيبي وحشتني أنتي والعيال
مالك يا حبيبي

-ممدوح : انا تعبت يا ماما من إلهام والعيال ومش لاقى حل فيهم..أنا عايش في نكد ليل ونهار.

إلهام بتعند فيا لا بقيت عارف أكل ولا أشرب ولا أرتاح في بيتي..خناق وزعيق طول اليوم الجيران بقوا يشتكوا مننا
-فوقية : أقولك أنا تعمل ايه وأزاي تربيها وتعلمها الأدب
-ممدوح: ازاي

-فوقية: هقولك ..بس تنفذ كلامي بالحرف الواحد
-ممدوح : هههههه ماشي يا ماما أهو جنان ب جنان وكده كده خربانة مع السلامة يا حبيبي

وبعد شوية ممدوح رجع بسلام من بره
-إلهام: حمد الله على السلامة يايبى أنت جيت
-ممدوح : لا ياختي لسه مجتش
-إلهام: أنت بتكلمني كده ليه ياروحي
-ممدوح: بلا روحك بلا زفت روجي دلوقت من وشي عاوز ارتاح شوية
-إلهام: إهئ إهئ كده يا دوحة طيب أنا في أوضتي لحد ما أعصابك ترتاح
و..

-رهف : ماما كلمي نناه توحة على الفون
-إلهام : ايوة يا ماما عاملة ايه
-توحة : مالكم كفاالله الشر..صوتكوا عالي ليه انتوا زعلانين ولا إيه؟

-إلهام : أيوة يا ماما ممدوح بقى لا يطاق خالص الحظر جننه وعمال يزعق
فيا من غير أسباب

-ممدوح : أنا الي اتجننت هاتي الفون ده

أيوه يا حماتي أنتي مالك أنتي؟

-توحة: مالك ياممدوح أنت بتكلمني أنا كده ازاي؟

-ممدوح: آه بكلمك كده وإن كان عاجبك

-توحة: ايه النعمة الجديدة دي ياسي ممدوح ده بينك أتنجنت فعلا زي ما
بتقول إلهام

-ممدوح : هي دي النعمة الي هتسمعيها من هنا ورايح أنتي وبنتك و....

-إلهام: هات كده الفون عيب كده الي بتقوله ل ماما ده

يلا يا ماما هكلمك بعدين يا حبيبتي وحقك عليا

-توحة : طيب يا بنتي حصل خير الله يكون بعونك

-ممدوح: أنا داخل أنام وأقوم الاقي الأكل جاهز وإياكم أسمع صوت

-إلهام: تنام ده ايه..ومين الي هي جبلنا الطلبات ويروح للجزار

-ممدوح : إتصرفي منا بجننك لما بنزل علشان جارتنا أنغام ولا ستات

الشارع ولا أقولك أنا أنسان الغاب طويل الناب

-إلهام: لاااا..أنت باين عليك أعصابك تعبانة..و أنا بقى مش هستحمل

كده ااااه يانب إهى إهى يا حطك المهيب يا إلهام يا بختك الأسود يا خيبتك

- ممدوح: قلت عايز أنا م يعني مش عايز صوت.. أخرجي وصوتي بره.. أنا مش ناقص قرف

- إلهام: قرف! ..أنت بتقول علي قرف..طيب انا هريحك مني خالص ياسي ممدوح..أنا ماشية عشان أريحك من القرف

- ممدوح: يلا في داهية وخدي الباب في إيدك عشان مش عايز إزعاج -إلهام: إهئ إهئ طاب أنا ماشية

- ممدوح: ماقتلك مع السلامة ..أنتي واقفة ليه يلا لمي حاجتك وخدي عيالك وامشي

-إلهام: يعني مش هامك..طيب أنا هسيلك عيالك مش وخداهم -ممدوح: يلا في داهية

-إلهام: اتفضل ياسي ممدوح انا ماشية وسيبها لك بيت أبويا أولى بيا -ممدوح: أحسن برضه

-إلهام: إهئ إهئ

يا خالد يا رهف تعالوا شوفوا أبوكم

وأخرة عمايله فيا

-خالد ورهف: يا لهوووووي يا أناااا

من الحظرو عمايله

استنوني بكرة

الحلقة الواحدة و الخمسون

ممدوح سمع كلام أمه فوفة وعلم إلهام الأدب وحرمها تقول تاني هسيبك
البيت وأمشي و

-ممدوح : خلاص حرمتي تقولي كده تاني وإلا ها

هتشوفي الوش التاني

-إلهام : حرمت يا سي ممدوح

-ممدوح : وتبطلي غيرة على الفاضي ونكد وتعقلي كده

-إلهام : حاضر يا سي ممدوح

هعقل وأستحمل الحظر معاك يا دوحة

ومر الوقت وإلهام وممدوح يا سلام عليهم جوز كناريا يا نااس و

-ممدوح: افتح الباب يا خالد

-خالد: أنا في الحمام خلي رهف تفتح

-إلهام : ايه الدوشة دي مالكم مش عايزين تفتحوا الباب ليه

-ممدوح: أنا رايح أهو و الي على الباب مستعجل مش عارف الدنيا طارت

ولا ايه

-إلهام: خليك أنا هتنيل أفتح الباب

أيوه حاضر مين ده مش عارفة

- ممدوح: مين الي على الباب
- إلهام: اسكت دي أختي سامية
- ممدوح: طيب أنا جاي اهوووو خير لسة العصر مأذنش (هو النكد جاي مستعجل ولا ايه)
- إلهام: تعالي يا حبيبتي مالك شكلك معيطة ولا ايه وايه الشنطة دي
- خالد: اهلاً يا خالتو أنتي الي كنتي هتولعي في الجرس
- إلهام: اسكت ياواد لم نفسك وروح هات ميه ساقعة لخالتك
- إلهام: تعالي ندخل الأوضة ونشوف في ايه
- ممدوح: أهلاً يا سامية مالك جاية مستعجلة في ايه
- إلهام: أنت كمان ريح شوية لما نشوف في ايه
- ممدوح: (أكيد الهباب إبراهيم جوزها مزعلها)
- إلهام: أصبر لما نشوف في ايه
- ممدوح: أنا عارف هي المشكلة بتاعة كل مرة
- إلهام: ما أنا متوقعة كده بس خليها ترتاح الأول وتقول في ايه
- سامية: راحة ايه مش عايزة اتنيل
- إلهام: اهدي بس شوية وبعدين قولي مالك
- ممدوح: إنتي عارف لو مد ايده عليكي والله هكسرهما له
- إلهام: أصبر يا ممدوح شوية هي ناقصة تولع فيها
- سامية: بص يا ممدوح أنا زهقت من عشتي خلاص إهئ إهئ

وخفت أروح عند ماما أنت عارف أخويا يبهدله وهو ييفضل مخزنلي
 عمايل ماما وسامح أخويا فيه
 وهو بارد ومش بيدور على حقة وغلبت فيه
 -إلهام : ايوه كده فهمت برضة موضوع الميراث
 -ممدوح: هو في موضوع غيره حقه وورثه في العمارة مش عاوز يتحاسب
 مع اخواته برضه
 وأنا كلمتة كتير ومش فاهم منه حاجة
 ولا منه بيطالب بحقه ولا منه بيقول مليش حاجة
 -سامية : إهئ إهئ هو ده الي مجنني ولا بناخد حاجة من الإيجار بتاع
 العمارة ولا واخدين حتى مكان فيها
 ولا بيروح يعرف نصيبة
 بارد وتلم ولا في دماغه الدنيا
 والواد حمادة ابني عاوز يعمل مشروع محل موبايلات وعاوز فلوس منه
 -إلهام: طبعاً يا حبيبتي مش أبوه ولازم يديله برضه ويقف جنبه
 -سامية: إهئ إهئ مش راضي يدي للواد الـ 500000 ج ولا راضي يديله
 محل في العمارة بتاعتهم
 -إلهام : معهلش يا سامية ما هولسه مديكي 20000 ج لتدوير
 مشروعك

- سامية: وهما 20000 ج دي فلوس يا إلهام ولا تعمل حاجة في الزمن ده
-إلهام: على رأيك يا حبيبتى هما دول فلوس (يا عيني عليكي يا إلهام
أتبهدلتى علشانهم وفي الآخر مخدتهمش)
-سامية : بتقولى حاجة يا حبيبتى
-إلهام : أنا انا لأ مبقولش ده أنا كده متعودة أكلم نفسي
-سامية : ممدوح إلهام إهئ إهئ أنا عايزة أطلق

استنوني بكرة ونشوف
آخرة العيلة دي

الحلقة الثانية و الخمسون

ممدوح يا حررام يلاقيها منين ولا منين
من إلهام مراته ولا سامية أختها
و.....

-ممدوح : طلاق ايه يا سامية ده أستهدي بالله كل حاجة لها حل
(دي بينها هي وأختها مجانين وأنت وقعت وسطهم يا ممدوح)

-إلهام : بتقول حاجة يا حبيبي

-ممدوح : لأ يا حبيبتي

ده أنا بكلم نفسي (شكلي أتجننت زيك)

-خالد: بت يارهدف شكلها خالتوها تعقد معانا

-رهدف: ايوه ياخويا أيامنا طويلة ماما وبابا وخالتو وجوزها

-خالد: ههههه أنا تمام كده هتنام معاكي مش معايا هههههه

-رهدف: لاء يافالح بابا هينام معاك أنا وخالتو وماما مع بعض

-خالد: ايون يعني أيه هدبس أنا في بابا

ومش هستحمل بابا بينام من بدري وهيكتفني ويزعق فيا

-رهدف: أنا مبسوفة فيك أبقى هاتله حبوب منومة

-خالد: ماشي أعملي حسابك خالتو بتروح الشغل في المستشفى ربنا
يسترها

-رهف: ياخبر أبيض كنت ناسية كورونا

ماما يا ماما أنا مش قاعدة في البيت ده هاروح عند نناه

-خالد: عيب يارهف تعالي نحاول نقنعها تروح بيتها وولادها وعمو
إبراهيم أولى بالكورونا

-رهف: عندك فكرة يافالح

-الهام: رهف أنتي يا بنت

- رهف: ايوه ياماما

-إلهام: تعالي امسكي خالتو وخديها أوضتك ونادي على خالد يودي لها
الشنطة جوه الأوضة

-خالد: أنا مش ماسك حاجة

-رهف: ولا أنا كمان

-سامية: تعالي ياروحي ده أنتي حتى مسلمتيش عليا

-رهف: لاء ياخالتو بس إحنا مش بنسلم علشان كورونا

-الهام: بتقولي اية ياغيبية دي خالتو برضة

-خالد: مايمنعش ياماما خالتو جاية من بره ومش عارفين سلمت على مين

-سامية: أقولكم والله أنا همشي أنا غلطانة إني جيت من أصله

-ممدوح : ايه يا سامية عيب عليكي هتخدي على كلام شوية عيال وتساوي عقلك بعقلهم

-سامية: عيال أيه يا ممدوح ده واحد شحط في سنة تالتة كلية تجارة والثانية في أولى ثانوي

-إلهام : يا حبيبي عيال برضه ميقصدوش الكلام
-ممدوح: والله أنتم يا ستات عليكم حركات كده وتاخدوا بالكم من التوافه وتسيبوا أم الموضوع الأساسي

-سامية : كمان ياسي ممدوح تافهة كتر خيرك
إهى إهى إهى أنا مروحة وسيبهلكم الواحدة ملهاش الا بيتها

-إلهام: يا سامية عيب كده متفرحيش حد فينا
-ممدوح : طيب أصبري لما أحل لك المشكلة

-سامية : انا ماشية من خرج من داره إتقل مقدار إهى إهى
-إلهام: يوووووة يا سامية

أنتي حرة

-رهف وخالد : واووووو نجحت الخطة ههههههههه
استنوني بكرة ونشوف آخرتهم

الحلقة الثالثة والخمسون

بعد حورات وحبشتكنات من رهف وخالد سامية خالتهم زعلت وحلفت
ما تبات عندهم و.....

-ممدوح: صباح الخير يا إلهام مالك شدة العزم على الصبح ورايحة فين
-إلهام: منمتش طول الليل يا دوحة بفكر في سامية أختي وأنها مشيت
زعلانة

-ممدوح: كله من مقاصيف الرقبة عيالك دبوها في وشها
(هههههه عيال ممدوح بصحيح)

-إلهام: آه لما يعملوا مصيبة يبقوا عيالي ولما يبقوا فالحين يبقوا عيالك
وعجبي يا دوحة

أنا هنزل أروح لها عند ماما أصلحها

-ممدوح: طيب خدي بالك من نفسك
وعدى الوقت و.....

-سامية: ايه الي نزلك على الصبح يا إلهام كده

-إلهام: جيت أصلحك يا أختي وأتأسف لك من عمايل عيالي

-سامية: مش زعلانة ولا حاجة

-توحة: (ماما إلهام) عيال لسانهم فالت زي أبوهم

عاوزين تربية وقرصة وذن يا إلهام
-إلهام: لا يا ماما معنديش حق في كده ماله ممدوح بقى
-توحة: ملوش يا أختي بس برواي ولسانه متبري منه وعياله زيه
-إلهام: عاجبك كده يا سامية وأنا صاحبة منمش طول الليل علشان أجي
أصالحك وأراضيك
-سامية: خلاص يا ماما أسكتي بقى وبلاش تضايقي إلهام
-توحة: منا ساكتة اهو وحاطة لساني في بوقي (يا ميللة بجتلك يا توحة في
جواز بناتك الأثنين)
-إلهام: قصدك أيه يا ماما ماله ممدوح إن شاء الله
-توحة: أنا لا شفت حاجة ولا سمعت
-سامية : يوووه يا ماما أنا ضغطي عالي ومش ناقصة ونازلة أهو ورايحة
بيتي
-إلهام: شفتي ايه يا ماما
أستني يا سامية متنزليش إلا لما أعرف كل حاجة
-سامية : ايه حبستني هنا ولا ايه يابنتي شيلى إيدك خليني أنزل
-توحة : بصوا بقى أحنا عيلة واحدة والمفروض منخبش حاجة على بعض
ونكون صريحين
-إلهام : في ايه يا ماما خضتيني

-سامية: انا نازلة ألحق عيالي وكمان أنا عندي السكر والضغط ومش حمل
مناهدة

-إلهام: لأبقى محدش نازل ألا لما أعرف أنتم محبين ايه عليا
-سامية: هستأذن أنا بقي عشان سايبة الولاد وحدهم..دي حوارات عائلية
مينفعش نتدخل فيها

-إلهام: نعم ياختي مش كنا عيلة واحدة من شوية تعالي هنا أنتي رايحة فين
وسيبياني لوحدي

-توحة: يا حبيبتي حل مشاكلك أنتي عارفة إن عندي الضغط ومش حمل
انفعالات ولا خناقات

بصي بقي ممدوح متجوز عليكي

-إلهام : إهـئ إهـئ

متجوز عليا

عاوزة أطلق

يووووة استنوني بكره

الحلقة الرابعة والخمسون

إلهام خدت في وشها وسابت سامية ومشاكلها وهوبة

-ممدوح: أيه مالك داخله زي القطر كده ليه وعينيك حمراء بتطق شرار يا ساتر يارب

-إلهام: أيه مالك مخضوض كده ليه؟ ماتقول وتخلص مخبي ايه؟

-ممدوح: أقول ايه أنتي أتجننتي ولا ايه ولا كتر الحظر أثر عليكي

-إلهام: ماما وأخواتي عندهم حق قولها يلا على بلاطة انك متجوز عليا يا دنجوان

إهئ إهئ

-ممدوح: أنتي أتجننتي ولا ايه دول أكيد بيهزروا معاكي

-إلهام: لا يا حبيبي مش بيهزروا إهئ إهئ

-ممدوح: إتعدلي يا إلهام بدل ما أعدلك أنا

هتبقى أنتي والحظر عليا ولا ايه

ده أنتي بقيتي لا تطاقي

الظاهر أنا الي هسيبك البيت وأروح ل ماما

-إلهام: أيووه بتتلحك علشان تروح لها وتقعدها معاها إهئ إهئ

-ممدوح: لا ده أنتي لسعتي فعلاً وشكي كده أنا الي هطفش

-إلهام: يا خالد يا رهف تعالوا شوفوا أبوكم المحترم إهئ إهئ
-خالد: في ايه يا ماما على الصبح مالك يا بابا
-رهف: ايه يا جماعة مسلسل النكد على ايه النهارده
-ممدوح : عاجبك الفضايح قدام الولاد يا هانم
عيب عليكي يا إلهام
-إلهام : العيب منك لما تتجوز عليا وتجلهم مرات أب وأمهم عايشة إهئ
إهئ
-خالد ورهف: أيه بابا أتجوز عليكي
يا لهووووووي يا أناااااا
وعلى الي هيجرى لنا
أستنوني بكرة ونشوف آخرة الجنان

الحلقة الخامسة والخمسون

ممدوح طفش من إلهام وعمايلها

والحظر وسنينه

و..... نشوف

- ممدوح : فهمتي يا هانم يا عاقلة يا رزينة ولا أي حد يقولك كلمتين
تصدقيه

بقي يا مجنونة علشان كنت بحاسب البت بوسي الي ماسكة محل البلاي
ستشن وبديها الفلوس أبقى أتجوزتها خلاص

- خالد : فعلا يا ماما بابا عنده حق وأنتي كبرتي على كده برضه

- إلهام : كبرت ايه يا سي زفت أنت كمان أسكت وخليك في خيبتك

- ممدوح : أنت كمان عال يا هانم

مين الزفت الأولاني

ردي

- رهف : مش قصدها يا بابا دي ذلة لسان منها

مش كده يا ماما (لمي الدور بقي يا ماما وأختصري النكد شوية)

- إلهام : (حتى أنتي يا مقصوفة الرقبة)

حاضر يا دوحة حقك عليا ولاهتسمعلي صوت تاني..ومش هتسمع غير

حاضر ونعم..والنبي ماتزعل وحياء أغلى حاجة عندك

-ممدوح : معنديش حد غالي

ده أنتي كرهتيني في البيت

-إلهام :طيب أعمل ايه علشان تصدق أي ندمت وهصلح كل غلطي ومش

هزعلك تاني

-ممدوح :متعمليش خلاص

-إلهام : يعني ساهحتني خلاص

-ممدوح :ماقلنا خلاص بقى ..ربنا يهديكي..بقولك ايه

-إلهام : ايه؟

-ممدوح : خشي جيبيلي من الي معاكي 5000 ج عاوزهم

-إلهام: يا لهووي عاوزهم في أيه

-ممدوح : ايه فيه ايه..مالك بتصرخي ليه؟

وحقك عليا خلاص وتبت يا دوحة

علشان خاطر خالد ورهف

يبقي تحطب لسانك جوه بؤك وصوتك ميعلاش في البيت تاني ..أنتي فاهمه؟

-إلهام : إهئ إهئ فاهمة يا دوحة

بس بستفسر يعني عاوز الفلوس في ايه

الحلقة السادسة والخمسون

بعد مناقشات وشوية حبشتكنات

وحبة قفشات من ممدوح

إلهام عرفت حيودي الفلوس فين

و..... تعالوا نشوف

-ممدوح: فهمتي يا بحر المفهومية الفلوس هاخدها ليه

-إلهام: فهمت يا دوحة بس أنت الحظر غيرك يا حبيبي وبقيت بتكيد فيا

-ممدوح: لا اسم الله عليكي متغيرتيش خالص وماشية في البيت كده نسمة

لا بتهشي ولا بتنشي ولا الجيران سامعين صوتنا

-إلهام: أناااا يا دوحة

-ممدوح: ايوة أنتي حتى افتكاساتي المطبخية منعيني منها وفضحتني عند

العيلة كلها

-إلهام: بطل إسلوبك المستفز معايا و...

-ممدوح: شايفه نفسك يا إلهام بطلتي تهتمي بيا بين الحظر زهقك مني ولا

بتهتمي بنفسك وياه كمان الربطه إلي أنتي رابطها دي ليل نهار على شعرك؟

ده منظر ده؟

-إلهام: ايه عندي صدام أنت مالك بتضحك على ايه؟

- ممدوح : برجع بذاكرتي لوراء وبضحكك على نفسي
- إلهام : سلامتك يا بيبي أنت اتجننت ولا إيه هههههههه
- ممدوح : بفتكر لما كنت هتجنن عليكي زمان و هموت واعرفك وتحبيني
- إلهام : أيوه طبعاً.. كنت هتموت عليا وكنت بتعاكسني وتمشي ورايا
وتفضل تبحلق فيا بالساعات
- ممدوح : الظاهر بقى الواحد كان عبيط
- إلهام : ليه ان شاء الله
- ممدوح : كنت فاكّر إن الجواز حلو وهتفضلي تتدلعي ليا مش محبكالي
راسك بالبتاع الي عليها ده (وبقيتي شبه عم يحيي البواب)
- إلهام : يا سلام وأنا كمان كنت فاكّة إنك هتفضل تحبني مش تكديني كل
يوم ببوسي وجارتنا أنغام
إهئ إهئ
- ممدوح : أتكتمي واواكي تعيطي ها مش عاوز وجع دماغ
ألا ليه احنا بقينا كده يا حبيبتي
إلهام : كده الي هو ازاوي يعني
- ممدوح : الي هو طول اليوم زعيق و خناق وصوت عالي ونقار في بعض
- إلهام : مش عارفه يمكن من الحظر يا حبيبي وأنك في وشنا ليل نهار
- ممدوح : ممكن برضه أول ما الحظري فك ناخذ لنا أجازة نساfer فيها نغير
جو نبعد شوية عن الضغوط والمشاكل ونعيش لنا يوم غسل يا حي

-إلهام : سفر ايه بس يادوحة احنا ناقصين مصاريف
ده يدوب الحظري فك من هنا وأنزل اشتري حنتين هدوم للعيال
وأنا كمان أجيبي طقمين حلوين وأشيل القمطة من على راسي
وعاوزه أشتري طقمين ملايات و.....
-ممدوح : إلهام بقولك غوري من وشي الساعة دي
يقطع الجواز والي يتجوزوه
واقولك ويقطع العيال ويقطعني أنا كمان
يا لهوووووووي من مراقي وأيامي معاها و....

أستنوني بكرة ونشوف

الحلقة السابعة والخمسون

بعد حورات ومشاحنات وحبة شجارات و.....
نشوف

-إلهام: صباح الخير يا حبيبي

أنت لسه زعلان من امبارح

خلاص أنا فكرت في كلامك يا حي ولاقتني غلطانة

-ممدوح: طيب أنا نسيت خلاص موضوع السفر ده

نفسی اُتسدت خلاص

ماهو يا إلهام الانطباع الأولاني هو الى بيدوم

هيفيد بأيه إنك فكرتي بعد ما دييتي الكلام زي الدبش امبارح

-إلهام: خلاص يا بيبى بقى

أيه ده يا ساتر يارب مال العيال شابطين في بعض ليه وصوتهم عالي

يا خالد يا رھف تعالوا هنا

فی ایہ

-خالد: أصل يا مااما أنااا...

-رهف: أسكت أنت خالص أنا الى هتكلم

-إلهام: ايه اي زفت فيكم يتكلم ويقول في ايه بتتخانقوا ليه

-رهف : سي خالد يا ماما عاملي رميو وبيكم سهى صاحبتى فى الفون

وبيتسهوك لها وسهى قالتلى

-خالد: محصلش ده أنا كنت بسألها على حاجة واحد صاحبي عاوزاها

-إلهام: حاجة ايه يا مسهوك (ما أنت طالع لأبوك سهن) ومتسألش أختك

ليه ولا حتى تخلى أختك تسالها هي

-رهف : قوليله يا ماما

-خالد : أسكتى أنتى أحسنلك

-إلهام: بتزق فى أختك قدامى ده أنا هنادي لك أبوك بقى يشوف له حل

فيك

ممدوح تعالى شوف عيالك

-ممدوح: خير فى ايه

مالككم صوتكم جايب آخر الدنيا

يا فرحة الجيران فينا

-إلهام : هو ده الي هامتك الجيران وست أنعام وبلاوي عيالك مش فى

دماغك

متخافش يا بيبى صوت الجيران عندنا برضه ما هو الحظر مخلاش حد

صوته واطي

هنطق يا خويا كلنا و

-ممدوح : يادي أنغام ويادي الحظر وسنينه معاكي (توب علينا يارب وفكها
من عندك)

-إلهام : أميين يا خويا

يفكها علينا كنا هو الحظر ده طالك بس ما أنا كمان هطق من جنابي

-ممدوح : أه قولي كده بقى

مش طيقاني ولا طايقة قعدتي في وشك

أهو الحظر ده طلع الي جواكي يا هانم وأنا الي أهبل وبفكر أسعدك وأخليك
تسافري يومين

-إلهام: اه منا حسافر برضه بس عند اختي آمال في الغردقة يومين كده أما
يفكوا الحظر أشم نفسي و.....

-ممدوح: سفرايه مفيش سفر وهتشوفي كلمتي يا هانم

-إلهام: لأ بقى حسافر يومين من حقي أغير جو وأرجع لك ريفرش كده
ونعنوشة يا بيبي

-ممدوح : دكي كسر حقك يا هانم مفيش سفر وأنا الي هسافر ومن بكرة
كمان وحسيبلك البيت تمرحي فيه براحتك

(هتبقى أنتي والحظر)

-رهف: يا بابا يا ماما

حرام عليكم كل شوية خناق ونسيتوا موضوع خالد وسهى صاحبتى

-خالد : (ده أنتي نكد زي ماما)

ده أنا ما صدقت مسكوا في بعض ونسيوا موضوعي
 خلاص يا بابا يا حبيبي أنت البوس هنا والقائد لهذا المنزل ومن حقك
 الشرعي تسافر تغير جو يومين كده و
 -إلهام : نعم يا سي خالد يا ابن ممدوح حق مين الشر- عي يا أخويا سمعني
 كده تاني
 -خالد : وأنتي كمان يا ماما حقك الشرعي تسافري برضه ل خالتو وتغيري
 مكان وترجي رفريش
 -رهف: لأ بقى ده بقى جنان في جنان
 ايه ده حقك وحقي
 وأنا حتي فين بقى هو أحننا في أوروبا كل حد فينا يسافر لوحده
 ايه يا بابا أيه يا ماما
 جرالكم ايه الحظر غيركم ليه وخلاكم مش طايقين بعض
 ويا لهوووووي يا أناااا
 من عيلتي ومن عمايلها
 وأستنوني بكرة

الحلقة الثامنة والخمسون

ممدوح وإلهام قرروا يعلنوا الهدنة مع بعض لحد ما أيام الحظر تعدي على خير و.....

-ممدوح : تعالى هنا يا سي خالد وقولي مالها سهى صاحبة أختك وأيه موضوعها معاك

-خالد : ولا موضوع ولا حاجة يا بوس

دي البت رهف نكد زي ما أنت عارف كده

جينات وراثية سبحانه الله بتجري في عروق ستات عليتنا

-ممدوح : أتلّم يا واد لأمك تسمعك وتخلي أيامك أسود من شعرها
مالها البت سهى ومالك

-خالد : مفيش يا بوس ده أنا كنت هسألها على الأمريكن دبلومة علشان
أخت حسام صاحبي مش أكثر

رهف النكد بقى كبرت الدنيا وخلاص

-ممدوح : ماشي يا خويا هصدقك المرة دي سامع المرة دي بس

لو عاوز معلومات تاني خلي أخت حسام تكلمها بنفسها لأقرص لك
ودانك

-خالد : حاضر يا بوس

-ممدوح: أيووة شاطريا ابني الي منرضهوش لبناتنا منرضهوش لبنات الناس
 -إلهام: أهلا بكم مجتمعين في الخير إنشالله
 أنا نازلة مشوارل ماما وخرج كمان ساعة
 هبقى أعمل المكرونة والبانية لما أرجع
 -ممدوح: بالسلامة يا حبيبي

وعدى الوقت وممدوح رجع لهوايته القديمة و
 -ممدوح: اكتشاف مهم جداً اكتشفته أثناء سلق المكرونة إنك ممكن
 تحط شوية زيت على المية.. قوم المكرونة مش هتلق في بعضها وهتبقى كل
 واحدة بوحدها كده.. بلغة المطابخ المكرونة هتفلفل يا دوحة أنت يا
 مفلفلهم

-رهف: أيه ده بابا حبيبي في المطبخ
 تبقى ماما بره البيت ههههههه
 -ممدوح: أستني بقى لما أحط خلطتي السحرية على الصلصة..
 ده أنا طباخ ماهر.. مش أي حد يطبخ مكرونة على فكرة
 -رهف: يا بابا يا جالامد أنت

-ممدوح: شوفي بقى يا بنتي دي شغلانة محتاجة جد واجتهاد والتزام سنين
 طويلة أوي.. المتميزين في عمل المكرونة في الكوكب ده يتعدوا على الأصابع
 اتشرف بكوني واحد منهم
 -رهف: كمل يا بابا ياقمر وأنت بتعمل المكرونة

-ممدوح : نص البنات الي كانت بتجري ورايا قبل الجواز كان سبب دهولتهم الأساسي هو سمعتي العالمية في طبخ المكرونة ب 3 طرق مختلفة.. بالصلصة الحمراء.. من غير صلصلة خالص.. أو الأقوى بقي.. بالفراخ والمشروم.. ذلك فضل الله يؤتيه من يشاء.. الحمد لله بسبب التزامي طول سنين عمري ربنا كافأني عليهم بأنه رزقني مهاره عالية جداً في سلق المكرونة.

-خالد : تيرررررا كمل يا بوس

-ممدوح : الظاهر بقي أمكم مش مقدرة النعمة الي هيا فيها.. كونها تتجوز راجل على هذا القدر من التميز في سلق المكرونة.. فدي حاجة تستاهل إنها تصلي لربنا شكرا كل يوم لكن هو الستات كده. يكفرن العشير ومبيفهموش في المكرونة و

-إلهام : أنا يا دوحة مكفراك ومبفهمش ولامم العيال حواليك وبتشجيني إهئ إهئ

يا عيني عليكي يا إلهام وعلى بختك في جوزك وولادك

ممدووووووح

طلقني

يووووة أستنوني بكرة

الحلقة التاسعة والخمسون

بعد خناقات وشوية حبشتكنات

ممدوح صالح إلهام

و.....

-إلهام: صباح الخير يا حبيبي

-ممدوح: صباح النور يا حبيبتي.. خير لابسك كده ورايحة على فين؟

إلهام: رايحة ل سهام صاحبتني أشوف الكارثة الي حصلت لها

بس أعملي ساندوتشين بسطرمة حلوين من إيديك وكوباية شاي

-ممدوح: بالهنا والشفاء يا ستي.. كُلي واتهني وبرطعي.. هيصي مع الطعام

والشراب المختلف ألوانه وقوامه وأصرفي من الأموال ما شئت ما هو في ثور

مربوط في ساقية عمال يلف ليل ونهار علشانك أنتي وعيالك

إلهام: دلوقتي بقوا عيالي.. كنست عليك السيدة يا شيخ... طب أنا راضية

ذمتك

-ممدوح: ما لها ذمتي سببها في حالها هي كمان محظورة اليومين دول

-إلهام: شفت جوز سهام الواطي أبو عين فارغة اتجوز عليها

ممدوح: وبعدين

-إلهام : وبعدين ايه بقولك اتجوز عليها وأنا رايحة أهديها ونشوف لنا حل فيه أبو عين زايغة ده

-ممدوح: تهديها في ايه مش فاهم يعني هو اتجوز عليها عادي يعني

-إلهام: عادي أنت بتقول عادي

-ممدوح : ايه في إيه إنتي بتحلقي كده ليه

-إلهام : بيحلقلك ياسي دوحة ليه هو أنت ممكن تفكر تتجوز علياً

-ممدوح : بصي يا حبيبتي الشرع محلل للراجل أربعة و.....

-إلهام: شرع أيه دلوقتي ودار أفتاء مين أنا بسأل سؤال محدد

هو أنت ممكن تفكر تتجوز عليا

-ممدوح: أنتي بتبرقي كده ليه

-إلهام: مفيش أنا خارجة ورايحة لها ورجعالك تاني خلي بالك من نفسك يا

بيبي

وبعد شوية

-إلهام : أنااا جيت يا بيبي

-ممدوح : نورتي يا روي

خير احكي لي جوز سهام أتعوز عليها ليه (والله راجل وعمل الي كل

الرجالة نفسها تعمله)

-إلهام: الناقص أبو عين زايغة أتعوز البت الممرضة الي شغالة معاه

شفت يا دوحة السفالة

-ممدوح : هو يعني لو دكتورة تمشي

-إلهام : أنت بتدافع عنه ولا أيه

لأ خد بالك ده أنا مخلقة لك عيال روحهم في أمهم ولا يكسروش لها كلمة

-ممدوح : وأحنا مالنا يا حبيبي وبعدين الواد خالد أي نعم هو شبه أمه

ودي ممكن أعتبرها إعاقة شكلية لا تؤثر في مضمون الواد.. بكره أخليه

شبهي ماهو مش معقول أنا الي أصرف وأطفح وفي الآخر يكبر يقول ست

الحبايب يا حبيبة ده أنا أطرده بره البيت هو وأمه هههههه

-إلهام : نعم يا سي دوحة تطرد مين

-ممدوح : بهزريا إلهام معاكي بطلعك من جو الجواز ده وبنسيك مشاكل

سهام

-إلهام: حبيبي يا دوحة وقلبي أنت أنا هغير هدومي وأعملك كوبيتين

عصير وأجبلك حتتين جاتوه وأدلعك يا عيوني

-ممدوح: على العكس من ظن البعض الوضع المستقر ده مخليني قلقان

نحمد ربنا ليل ونهاراه.. بس الطبيعي في الدنيا هو إن الإنسان يتبهدل.. لما

بلاقي الدنيا ماشية كويس بقلق وبقول استر يارب.. لأن الضربة لو حصلت

وقت الرخاء بتبقى قاسية أوي

يا عيني عليك يا دوحة لما تبهدلك إلهام

و.....

أستنوني بكرة

الحلقة الستون

مفيش خناقات ولا حبشكنات
في على عش الحب و نشوف
-إلهام : صباح الفل يا عيون إلهام طب والنبي لأعملك أحلى سندوتش
أومليت وطبق سلاطة إنما أيه وكوبيتين شاي وصاية
-ممدوح : فحمتيني يا حبيبتي بدلعك ده
طب متنسش تحطي معاه شوية تحابيش كده وتعالى بسرعه علشان
بتوحشيني
-إلهام : تحابيش وبتوحشيني
(وماله أهو كله حب)
-ممدوح : ولبستها العمة من سُكات و
-إلهام : شفت يا حبيبي وأنا بحضر الأكل بفكر في نعم ربنا عز وجل الكثير
أوي علينا
-ممدوح : آه يا حبيبتي بينما أنا في الواقع (قلقان فزعان خوفان) من جو
الرومانسية ده
-إلهام : شفت ربنا مديك زوجة ولا أروع ومستوى اجتماعي كويس
وشغل ممتاز وعيال زي الفل و.....

-ممدوح: حلو أووي ساندوتش الأومليت ده ولا التحابيش تجنن
 -إلهام: تحابيش ايه وأومليت ايه يا راجل
 بقى أنا ضاربة لك رومانسية من الصبح وعمالة أقولك على نعم ربنا عليك
 والبعيد أيه مش عارف يقولي كلمة شكرانية واحدة
 -ممدوح: آه باني بقى أنتي عاملة الجو ده مش لله والوطن
 عاوزاني أشكر فيك وخلاص يا هانم
 -إلهام: وماله يعني لما تقولي كلمتين شكر وحب كده لله في لله
 هو مش أنا مراتك حبيبتيك أم ولادك
 -ممدوح: وهو أنا أنكرت أم ولادي ولا مراتي
 -إلهام: وحبيبتيك كمل الجملة
 -ممدوح: بطلي دلح بقى وأعقلي شوية يا مجنونة
 -إلهام: أنا مجنونة يا ممدوح إهئ إهئ يا ميله بختك يا إلهام
 ممدوووح
 -ممدوح: عارف طلقني

يوووووة أستنوني بكرة

الحلقة الواحدة و الستون

ممدوح طهق من إلهام وعماييلها والحظر وسنينه وقعدته في البيت ليل نهار

و...

-إلهام : دوحة يا حبيبي أصحي بقينا الظهر

-ممدوح : أيوة يابنتي فيه ايه ؟

أنتي بتصحيني ليه دلوقت أنا نايم متأخر من عمأيلك السوداء

-إلهام : هو يعني أنا اللي نايمة من المغرب ما أنا نايمة معاك بعد خناقاتك

ونكدك يا روح الروح

بقولك أنا رايحة لخالتو أعزي مرات أبنها مصطفى ماتت من يومين ولغاية

دلوقت مروحتش أعزيهم

-ممدوح : طيب يا روحي وخدي الباب في إيدك وأنتي نازلة

-إلهام : هو ايه الي طيب ده أقوم يلا

-ممدوح : أقوم ليه عاوزة اعمل ايه بس على الصبح يا إلهام

-إلهام : تيجي معانا توصلنا وتعزي خالتو ومحمد كمان أنت عاوزنا نتبهدل

في المواصلات و نتصاب بالمرض وكورونا

-ممدوح : (يارب يا أختي مش بعيد عن ربنا) لا يا حبيبتني بعد الشر

عنكم كلكم بس أنا هعزي خالتك ليه وقعدة ستات وكده

سيبيني أروح لأبن خالتك مصطفى لوحدي أحسن
-إلهام: هما فين الستات يا حبيبي مفيش عزا أصلاً ما أنت عارف
التجمعات ممنوعة

-مدوح: ولما هو مفيش عزا اصلاً مصحيانى على الصبح ليه وأرفاني معاكى
-إلهام: يا حبيبي علشان ابن خالتي يعني لازم نروح
وبعد ما حضرت الفطار و....

-إلهام: مدوح أنت نمت تاني ولا أيه
-مدوح: هو أنا بعرف أناام ولا أتنبيل في البيت ده منك ومن عمايلك
يا شيخه ألقى الله فيا وشوفيلك شغلانة غيري
-إلهام: الله مطولك يا روح (صدق الي قال لولك عند الكلب حاجة قوله
يا سيدي)

معلش يا حبيبي كلها عشر دقايق بس نسلم على خالتو وابنها ونقولها شدي
حيلك وخلاص

-مدوح: أنتي قلتي ايه يا هانم بصوت واطي في سرك .. سمعيني كده
-إلهام: مقلتش ده أنا بقول

من غير سلامات يا حبيبي عشان الأمراض وكورونا ونمشي علطول
-مدوح: طيب ماشي من غير سلامات ونمشي علطول
أمرك لله يا دوحه، قومي جيبيلي البنطلون الأسود الي شبه إياي الي
عائشها معاكى

-إلهام: طيب يا دوحة الله يسامحك وطي صوتك شوية علشان مش كل
شوية العيال والحيران يسمعو صوتنا ... دوحة، مش لاقية البنطلون الأسود
بينه في الغسيل ياروحي

-ممدوح: طيب مش هتخافق فين البنطلون الكحلي

-إلهام: ايه على صوتك شوية مش سامعه

-ممدوح: يوووووه ... فين الزيت البنطلون علشان نخرج

-إلهام: ماقلنا وطي صوتك البنطلون الكحلي آه في دولاب الواد خالد

-ممدوح: بينيل ايه في دولاب المحروس ابنك

-إلهام: لبسه مرة، ايه جريمة يعني

-ممدوح: ويلبسه ليه يا هانم، طبعاً جريمة وتسبب منك وإهمال

أنتي عارفة إني مبحبش حد يلبس لبسي

-إلهام: وأنا أيش عرفني أنك بتقرف من إبنك هو أنا هحرسلك هدموك

-ممدوح: اوعي من وشي كان يوم أسود يوم ما اتجوزت

حسبي الله ونعم الوكيل فيكي يا بعيدة أشوف فيكي يوم والله ما أنا قاعدك

فيها ولا رايح معاكي

-إلهام: إهـى إهـى يا ميلة بختك يا إلهام توب عليا يارب من الحظر وسنينه

ياعيني عليا من عمايل جوزي فيا و

يوووووة أستنوني بكرة

الحلقة الثانية و الستون

بعد مشاحنات وهبشتكنات و حبة خناقات و يوم جديد بدأ ونشوف و ٠٠٠٠

-رهمف : ماما يا ماما

-إلهام: ايه على الصبح عاوزة ايه

وطي صوتك لأبوكي يصحى وينكد علينا

-رهمف: عارفة يا ماما جارتنا تانت سوسو الي فوق في الدور السابع

-إلهام: أه مالها مش دب الي ضاربة شعرها أوكسحين وهو شبه المقشدة كده

بالظبط

-رهمف: ايوة هي دي

لاقيت بابا أمبارح واقف معاها ساعة وبعدين قالتله هتعبك معايا يا

أستاذ ممدوح ومستنيك بكرة الساعة 6

-إلهام : مستنياه ده أنا هخلي اليوم مطلعتش له شمس

وأنتي يا جزمة قديمة يالي معرفتش أربيكي إزاي تتجسي- على أبوكي يا

كلبة

يلا غوري على أوضتك بلا هم

رهمف : إهئ إهئ هو ده جزاقي أني بنور لك المحكمة

تستاهلي الي بيعمله فيكي بابا

- إلهام : يلا يا كلبة على أوضتك
وبعد شوية وقت و
-إلهام : شفت جارتنا سوسو عملت إيه
-ممدوح : مين سوسو دي
-إلهام : سوسو الي ساكنة معانا في العمارة
-ممدوح : آه أم رامي الي ساكنة في الدور السابع
-إلهام : أيووه دي الي شعرها شبه المقشّة وضاربة أكسجين فيه
-ممدوح : آه عارفها شعرها أصفر وحلوه شويه كده
-إلهام : بتقوول ايه
-ممدوح : إيه ماها غير أنها حلوه وشعرها أصفر
-إلهام : عال يا ممدوح بتقول حلوه في وشي وكمان خدت بالك من شعرها
وعامل نفسك متعرفش حد في العمارة
-ممدوح : لا أبداً دا أنا شفتها مرة واحدة بس
-إلهام : كل ده من مرة واحدة أmaal لومرتين كنت عملت ايه
-ممدوح : بقولك ايه يا إلهام أنا مش ناقص جنان على الصبح عاوزة مني إيه
الساعة دي
-إلهام : كنت واقف معاها ليه ساعة بحالها وإدتك ميعاد النهاردة الساعة 6
تروحها

-مدوح: نهارك أسود يا إلهام بتتنطبي عليا من ورايا
-إلهام: جوزي وبحافظ عليك مش عيب الواحدة تاخد بالها من جوزها
-مدوح: إخرسي يا هانم
بقي بتتنطبي عليا بعد كل السنين دي وتقولي بتحافظي عليا
طيب تعاليلي بقي والله ما سيبك من إيدي
-إلهام: أي أي يا دوحة سيب شعري
ده مش مقشة زيها
أي يا عيني أي أي بالراحة يا دوحة
أي أي حرمت خلاص
يا لهوووووي يا عيال
ألحقوني

يوووة استنوني بكرة

الحلقة الثالثة و الستون

- ممدوح قالها كان ليه واقف مع جارتهم سوسو أم شعر أصفر
والهام يا حرام كالعادة رقبتهأ أد السمسة و تعالوا نشوف
-ممدوح : إلهام يا إلهام
-إلهام : ايوه يا حبيبي صباح الخير يا روجي خير بتنادي عليّا تأمرني يا قلبي
-ممدوح :ايه ده بسم الله الرحمن الرحيم
-إلهام :مالك يا حي أنت بتبصلي ومستغرب كده ليه
-ممدوح : أصل من يوم ما اتحظرنا أول مرة أنادي عليك وتتردي على طول
من غير ما تنكدي علينا
-إلهام : أنت كنت عاوز حاجة
-ممدوح : آه جهزيلي الفطار وكوبية الشاي والقميص الكروهات الأحمر في
الأزرق
-إلهام : أهو يا روجي مغسول وجاهز ومكوي اتفضل
-ممدوح : والبنطلون الجينز الكحلي والكوتشي الأسود
-إلهام : أهه كنت بمسحه والبنطلون أهو اتفضل يا عيوني
-ممدوح :مالك يا حبيبتي أنتي عيانة؟
-إلهام : لا يا قلبي أنا كويسة بتقول كده ليه

-ممدوح : مفيش بس مستغرب يعني عموماً عاوزة طلبات من السوق أو السوبر ماركت

-إلهام : الي تجيبه يا حبيبي هاته والحمد لله على كل حال
-ممدوح :أنتي فيكي حاجة متغيرة النهاردة مالك يا إلهام أنتي حاسة بحاجة بتوجعك

-إلهام : أنا زي الفل تمام والحمد لله
دي أقل حاجة أعملها لجوزي حبيبي هو أحنا لنا غيرك
-ممدوح : أنتي متأكدة انك كويسة صارحيني حاسة بسخونة أو تعب يابنتي
لو تعبانة قوليلي ليكون الوباء الي يقولوا عليه جالك

-إلهام : ربنا يبعد عنك المرض يا حبيبي
-ممدوح : اللهم آمين طيب بقى أنا خارج
-إلهام : ربنا يكتبلك في كل خطوة سلامة ويكفيك شر العين مع ألف مليون سلامة يا روجي

-ممدوح : لأ بقى أنتي النهاردة مش طبيعية وأنا مش خارج غير لما أعرف فيه ايه

(على العكس من ظن البعض الوضع المستقر ده مخليني قلقان نحمد ربنا ليل ونهار آه .. بس الطبيعي في الدنيا هو إن الإنسان يتبهدل.. لما بلاقي الدنيا ماشيه كويس بقلق ويقول أستريارب.. لأن الضربة لو حصلت وقت الرخاء بتبقي قاسيه أوي)

-إلهام : بتقول حاجة يا روجي

-ممدوح : لا مبقولش ده أنا بكلم نفسي (والله هتجننيني بعمايلك)

وبعد شوية

-ممدوح: حبيبتى أنا مضطر

انزل بقى مجدي عمال يرن على الفون بينه وصل تحت البيت

-إلهام: ماشي يا حبيبي واجب برضه ... تزور صاحبك المكسر في البيت

-ممدوح: أنتي بتتكلمي بجد؟! أنا مش مصدق والله إني هخرج كده من غير

خناق ولا زعيق ولا طلبات

-إلهام: معهلش يا دوحة سماح بقى على الي فات

انزل يا حبيبي وخد راحتك بس أوعي تقلع الكمامة والكحول في إيدك

علطول وممنوع السلامة يا روجي ... أحنا ملناش غيرك

وبعد شوية

-إلهام : ألوو أيووه يا ماما عملت بنصيحتك أهو وكنت كيوت على الآخر

أهو ... يا ساتر خليه ينزل بقى ويريحنا شوية من قعدته في البيت و

-ممدوح : أيووه يا هانم باني على حقيقتك وأن الحب ده كله علشان زهقتي

من قعدتي بسبب الحظر ... الحمد لله أني نسيت محفظتي ورجعت أخذها

وسمعتك

-إلهام : يا لهوووووي بتتنصط عليا يا دوحة ... ممدوووووح طلقني

يووووة أستنوني بكرة

الحلقة الرابعة والستون

أصطبحنا وأصطبح الملك لله

وممدوح وإلهام مبيخلصوش حكايات و.....

-ممدوح: صباح الخير

قايمة بتزعقي ليه يا وليه على الصبح

-إلهام: محدش من العيال راضي يصحى علشان أروق الشقة وأروق أوضهم

الي زي مزبلة التاريخ دي

حتى الفطار مفطرتش يا دوحة

قوم أعمل لنا كام ساندوتش أفطر بيهم يسندوني في الشقا الي جاي ده

-ممدوح: طيب وطى الصوت شوية هو أنا في قاره تانية وبعدين سندوتش

ايه تاني ما أنتي كلتي كيك وكوكيز مع الشاي

-إلهام: تعبانة وشقاينة يا راجل أنت هتعد عليا اللقمة

-ممدوح: وهو كل ده اسمه لقمه دول 7 لقم أعد ايه ولا ايه بس يارب شقاء

عمري راح في الكورونا والحظر حرام عليكي

-إلهام: ده بدل ما تقولي صحتين يا راجل

-ممدوح: وهو صحتين بس هينفعوا

إلا قوليلي يا إلهام

لما بتقفى في المطبخ تعملي لنا الأكل بتبقى سعيدة؟
 إلهام: والله على حسب لو فيها خاتم ذهب مثلاً أكيد هبقى سعيدة
 ممدوح: اتلمي يا إلهام وأتكلمي جد من غير الألش بتاعك
 إلهام: لو هنتكلم جد من غير ألش آه طبعاً ببقى مبسوفة جداً لأنى
 بسعدكم يا حبيبي وبعدين المطبخ ده مملكتي الحقيقة وهي ملعبي بقى يا
 دوحة

-ممدوح: ملعبك أه الي حرمانى أدخل وأشوط فيه وأجيب أجوان
 -إلهام: أنا يا حبيبي حرماك منه علشان بصراحة كده الأكل بيعع علينا
 بالخسارة وفي الآخر محدش بياكله
 ها بقى

-ممدوح: خلاص يبقى ربنا عاوز كده متعكرش ليا دمي كل شوية وتقرفيني
 وأنا محظور عاوز اشتغل وأسلي نفسي مش معقول كده جتني هترنخ من
 الركنة

-إلهام: ما هو يا دوحة أنت بتفتكس لنا حاجات غريبة وإيشي كحك ناعم
 ملون ولا سلطة الخضار الي عملتها بالمستردة وطلعت يع خالص
 -ممدوح: يووووة كفاية عكننتي عليا اليوم يا شيخة وبعدين يعني يا إلهام
 في مثل بيقول

إربط الحمار مطرح ما يعوز صاحبه
 يعنى إفهى شوية وسيبيني افتكس براحتي

-إلهام : طب ولو صاحبه حمار وعاوزني اربطه في عربية نازله في الترعة
 -ممدوح : أنتي بتقولي على جوزك حمار طيب والله منا سيبك يا إلهام
 وهخلي يومك أسود من شعرك
 قال حمار قال ده الي ناقص
 يقطع الحظر وسنينه
 تعالي لي بقى
 -إلهام: أي أي يا لهوووووي
 اه يا عيني سبني يا دوحة يتقطع لساني والنبي ما أقصد
 ألحقووووني يا عيال يا لهوووي
 يوووة أنا تعبت من عمايلهم
 وبفكر أنهي حكايتهم ونرتاح منهم
 أستنوني بكرة

الحلقة الخامسة و الستون

(الأخريرة)

بعد خناقات واشتباكات و حبة حبشكنات الدنيا هديت
-خالد: بابا يا بابا قوم أصحى الحظر أتفك والقهاوي أتفتحت
-ممدوح: صح يا ولا ... الكلام ده يا وش الخير
-رهف: أفتح التلفزيون بسرعة يا بابا وشوف رئيس الوزراء
-إلهام: دوحة يا دوحة فرجت يا حبيبي فتحوا القهاوي والنوادي والسينما
إفراج يا دوحة إفراج
-ممدوح: أستنوا كده أما أسمع رئيس الوزراء
-خالد: يا خسارة يا بابا مش هتفتح البلاي أستشن ولا البسين والملاعب
-ممدوح: أهون نص العمى ولا العمى كله
-إلهام: بيقولك أهم حاجة وعي المواطن يا دوحة شكل الحكومة زهقت مننا
وهتضحي بالأم والجنين مع بعض هههههه
-ممدوح: تضحي ايه وزفت ايه ألي بتقوليه ده
يا بنتي الناس تعبت من الحظر ولازم الحياة ترجع تاني بس مجذر
-رهف: صح يا بابا ناخذ حذرنا لو نزلنا ونلبس الكمامة ونراعي التباعد
متر ونص زي ما قالوا

-إلهام : شاطرة بنتي القمر واعية لأمرها
 -ممدوح: أخيراً هروح القهوة وأقابل صحابي أحمدك يارب
 إلهام: لولوولي أخيراً هتنزل يا حبيبي كل يوم وأرجع أرن عليك وأقولك
 وحشتني يا دوحة أطلع بقى

-خالد : أنا أتصلت وحجزت يا بوس الكافية علشان نكون من ضمن ال
 25% الي هننزل الكافية ... أكيد يا بوس الإقبال تاريخي النهاردة

-ممدوح: أبنائي الأعزاء وأسرتي الجميلة بمناسبة أنتهاء الحظر وليست
 أنتهاء كورونا وعودة الحياة لنص مجاريها هقولكم بقى حكمتي الافتكاسية
 للحياة و الي أتعلمتها من الحظر (قطع وسنيه)

هي الدنيا كده السعادة دائماً في الرحلة مش في هدف الوصول السعادة في
 انتظار الإجازة مش في الإجازة نفسها السعادة في الصيد مش في الشوي ولا
 القلي ولا السنجاري.. السعادة بنكتشفها بعد ما العمر يعدي والأيام
 تتسرب من بين صوابنا بعد موضوع الحظر أنا اكتشفت إن الي عدى
 فعلاً كانت أجمل أيام عمري كنت مستمتع جداً بارتكاب الأخطاء عن
 جهل.. كل يوم بتعلم درس جديد واكتشف إنني كنت حمار في اليوم الي
 قبله.. متعة استكشاف الحياة لا تضاهيها أي متعة في الدنيا.. مع الوقت لما
 الإنسان بيكبر بيحس بالملل.. بيتضخم جواه شعور عام بالزهق من كل شيء

وأي شيء لأن مفيش جديد ولا تجديد.. معادش في حاجة قادرة إنها
تدهشني و...

-إلهام: بقيت فيلسوف يا أبو خالد

-ممدوح: الأ ليت الشباب يعود يوماً فأخبره بما فعل المشيب

-إلهام: طيب حضرتك بدل ما أنت عاوز تخبر الشباب بما فعل المشيب الي
هو أساساً لسه مجاش .. أخبرنا أحنا هنحتفل ازاي النهاردة بفتح الحظر
والكافيات والنوادي

-ممدوح: أنتهت الحدوتة على كده

وبعترف أن شيلت مراقي همومي هي معندهاش أي شيء تقدمه إلا كلمة
حلوة أو دعوة كويسة.. هي ست عادية جداً زيه زي كل الستات.. لا تملك
من مقومات الدعم إلا طبخة دسمة كويسة أو صينية بقلادة تخفف بيها
النكد الي كلنا كنا سبب فيه من الحظر والكورونا ولكني اكتشفت إن
البساطة دي هي سبب قوتي أنا هو ده بالظبط الي ربنا قال عليه سكن أد
ايه كنت عاصف غضبان لما بدأ الحظر وسنينه وأد ايه دلوقتي أنا ساكن
تماماً و.....

رايحة الكوافير ... رايح القهوة

بتحبنى ... أيوه يا بسبوسة

وتوتة توتة خلصت الحدوتة

أنتظروني في حكايات جديدة....

افتكاسات زوج محظور

حلفات كوميديا

إيمان العادلي



الطبعة الأولى

1442 هـ - 2020 م

دار ديوان العرب للنشر والتوزيع

مصر - بورسعيد

جوال: 00201211132879

E-mail: mohamedhamdy217217@gmail.com